

四庫全書

經部

欽定四庫全書

經部

書傳輯錄纂註卷一

詳校官監察御史_臣查善長

通政使司副使_臣莫瞻菴覆勘

總校官降調編修_臣倉聖脉

校對官中書_臣王慶長

謄錄監生_臣陳守觀

欽定四庫全書

書傳輯錄纂註卷一

元 董鼎 撰

虞書

虞舜氏因以為有天下之號也書凡五篇堯典

典以下夏書也所作當曰夏書春秋傳亦多纂註陸氏

書凡十篇為三聖授文貫乎一道謂之唐書則可以該

舜不可以該禹謂之夏書則可以該舜不可以

堯典

也此篇以簡冊載堯之事故名曰堯典後

世以其所載之事可為常法故輯錄死謚周道

又訓為常也今文古文皆有

輯錄

也史云夏

商以上無謚以其疏為謚如堯舜禹之類者來

堯舜禹也無意義堯字從三土謂如土之堯然

而高也舜只是花名所謂類如舜華之舜也無

意義禹者獸跡今說文篆禹字如獸跡之形若

死而以此為號也無意義况虞舜側微時已云

有鰥在下曰虞舜則不得為死而加之號矣看

來堯舜禹只是名非號也周綱看二典之纂註

書堯舜所以卷舒作用直如此熟精語

呂氏曰二典與他書不同如易之有乾坤

巨基反說文云下基也愚案篇題下每書古

今文有無者孔壁伏生二書

之分耳非以字畫言辭論也

曰若稽古帝堯曰放勳欽明文思安安允恭克讓光被

四表格于上下

曰粵越通古文作粵曰若者發語辭周書越若來三月亦此例也稽考也史臣

將叙堯事故先言考古之帝堯考其德如下文所云也曰者猶言其說如此也放至也猶孟子言放乎四海是也敷功也言堯之功大而無所不至也欽恭敬也明通明也敬體而明用也文文章也意思思也文著見而思深達也安安無所勉強也言其德性之美皆出于自然而非勉強所謂性之者也允信克能也常人德非性有物欲害之故有強為恭而不實欲為讓而不能者惟堯性之是以信恭而能讓也光顯被及表外格至上天下地也言其德之盛如此故其所及之達如此也蓋放敷者總言堯之德業也欽明文思安安本其德性而言也允恭克讓以其行實而言也至于被四表格上下則放敷之所極也孔子曰惟天為大惟堯則之故書叙帝王之德莫盛于堯而其贊堯之德莫備于此且又首以欽之一字為言此書中開卷第一義也讀者深味而自得

欽定四庫全書

卷一

焉則一經之全體不外是矣其可忽哉

輯錄

曰若稽古帝堯是作書者叙曰若稽古元城說是

林少穎解放勲之放作推而放之四海之放比之程氏說為優廣堯是初頭出治第一箇聖人尚書堯典是第
一篇典籍說堯之德都未下別字欽是第一箇字如今
看聖賢千言萬語大事小事莫不本于敬收拾得自家
精神在此方看得道理盡看道理不盡只是不曾專一
賀孫敬是徹上徹下工夫做到聖人田地也只放下這
箇敬不得如堯舜也只終始是一箇敬如說欽明文思
頌堯之德四箇字獨將這箇敬為首如說恭已正南面
而已如說為恭而天下平皆是格言堯欽明文思欽是箇
本領能敬便能明惟明故文理詳察粲然可觀而其間
意思自是深遠又曰敬字當理會雖堯舜之聖亦從這
下來語略潘子善問欽明文思某謂恐當從去聲讀若
只作思應之思不見其發揮于事業處先生答曰作去
聲讀為是安安只是箇重疊字若小心翼翼成性存

存言堯之欽明文思皆本于自然不出于勉強也允則是信實克則是能廣允恭克讓從張綱說謂信恭能讓作書者贊詠堯

纂註

馬永卿錄劉元城語曰堯典下當德如此經說為粵若稽古粵若發語之辭稽考

也言史氏考古有此事也馬曰粵若者則所謂越若來三月也稽古者則所謂惟稽古是也先生曰然今案藝

文志註秦廷君說曰若稽古二三萬言則是曰若稽古當作四字一句秦恭字廷君見前儒林傳孔氏曰能順考

古道而行之者帝堯呂氏曰散而在外則為文欽明之發見也蘊而在內則為思欽明之潛蓄也文思表裏

之謂堯閭呂氏曰君子莫不有是德惟堯為能安安故其欽也明也文也乃不勉而中思也乃不思而得所

謂安而行之格極其所至也德之克明俊德以親九族

戚者上下與天地同流而無間也

九族既睦平章百姓百姓昭明協和萬邦黎民於變時

雍

明明之也俊大也堯之大德上文所稱是也九族高祖至玄孫之親舉近以該遠五服異姓之親亦在其

中也睦親而和也平均章明也百姓蠻內民庶也昭明皆能自明其德也萬邦天下諸侯之國也黎黑也民首皆黑故曰黎民於數美辭變變惡為善也時是雍和也此言堯推其德自身而家而國而天下所謂放勳者也

輯錄

堯明俊德是明明德之意德明克明俊德只是說堯之德與文王克明德同廣顯道問堯典自欽明

文思以下皆說堯之德則所謂克明俊德者古註作能明俊德之人似有理先生曰且看文勢不見有用人意

任道問堯典以觀九族說者謂上至高祖下至玄孫林少顧謂若如此只是一族所謂九族者父族四母族

三妻族二是否先生曰父族謂本族姑之夫姊妹之夫女子之夫家母族謂母之本族母族與姨母之家妻族

則妻之本族與其母族是也上殺下殺旁殺只看所畫宗族圖可見人傑儿族以三族言者較大然亦不必如

此泥但其所親者皆是九族且從古註堯明德是再
提起堯德來說百姓或以為民或以為百官族姓亦不
可考姑存二說可也廣平章百姓只是近處百姓黎民
則合天下之民言之矣與漢中百姓只是說民如周鼎
百姓之類若國語說百姓則多是說百官族姓廣過問
堯典平章百姓孔傳云百官族姓程子謂古無此說呂
刑只言百官族姓後有百姓不親于百姓非百姓皆言
民豈可指為百官族姓後漢書亦云卻刺史職在辦章
百姓宜美風俗辦章即平章也過敬云族姓亦不可不
明先生只曰未曾如此思量平章百姓只是畿內之
民非百官族姓也此家齊而後國治之意百姓昭明乃
三綱五常皆分曉不鶻突也人傑又曰昭明只是與他
分別善惡辯是與非以上下文言之則齊家治國平天
下之事論忠恕一貫曰如堯之克明俊德黎民於變
時雍夫子止之斯立動之斯和
這須裏面發出來方會如此

纂註

孔氏曰上自高祖
下至五孫凡九族

馬鄭同

夏侯氏曰

父族四

母族三

妻族二

歐陽同

唐

孔氏曰喪服小記云親親以三為五以五為九上殺下

殺旁殺而親畢矣睦即親也章即明也雍即和也各自變丈以類相對王氏曰親者親之也睦者交相親也

唐氏曰睦者親之應昭明者平章之應時雍者協和之應也陳氏大猷曰於如詩於穆之於益神化之妙難

以形容與直言變者氣象不侔矣真氏曰欽明丈思者衆德之目大德即其總名也明俊德者修身之事其

下即齊家治國平天下之事也此帝者為治之序也先言明俊德謂堯自明其德後言平章百姓而百姓昭明

謂新民而民亦有以明其德也大學以明明德為新明之端與夫修身齊家治國平天下之序蓋本之堯典也堯典

其大學之宗祖與新安陳氏曰大學傳帝典曰克明俊德皆自明也證據顯然孔註之非不辯而明矣以修身

齊家治國平天下論此章自司馬溫公始說見稽古錄朱子從之真氏又揭此章冠大學衍義一書且斷斷然

以為大學之宗祖至論也充明俊德者明此德之全體以親九族至時雍皆推此德之大用舉天地間盡在春風和氣中矣傳謂此言堯推其德自身而家而國而天下所謂放勳者也即指此為放勳帝德之用無所不至者即功勳之無所不至者也豈功自功德自德哉

乃命羲和欽若昊天厯象日

月星辰敬授人時

乃者繼事之辭羲氏和氏主厯象授時之官若順也是廣大之意厯所以

紀數之書象所以觀天之器如下篇璣衡之屬是也日陽精一日而繞地一周月陰精一月而與日一會星二十八宿衆星為經金木水火土五星為緯皆是也辰以日月所會分周天之度為十二次也人時謂耕穫之候凡民事早晚之所關也其說詳見下文

輯錄

羲和主厯象授時而已非是各行其方之事德明羲和即是

鄭四子或云有羲伯和伯共六人未必是羲則厯是古時一件大事故少皞以鳥名官首曰鳳鳥氏厯正也歲

月日時既定則百工之事可考其成程氏王氏兩說相兼其義始備廣歷是書象是器無歷則無以知三辰之所在無璣衡則無以纂註孔氏曰重黎之後羲氏和氏見三辰之所在廣

元氣廣大唐孔氏曰日月所會之辰十有二正月會亥辰為陬訾二月戌為降婁三月酉為大梁四月申為

實沈五月未為鶉首六月午為鶉火七月巳為鶉尾八

月辰為壽星九月卯為大火十月寅為析木十一月丑

為星紀十二月子為玄枵星與辰一也舉其人之所見

為星論其日月所會謂之辰呂氏曰作歷之前欽若

是天是先天而天非違作歷之後敬授人時是後天而

來天時皆以欽敬為主程子曰事之最大最先在推

測天道治歷明時萬事莫不本于此修齊治平治之道也

順時治歷創制立度治之濬也聖人治天下惟此兩端

而已王氏曰昔少昊氏命官鳳鳥氏司歷玄鳥氏司

分伯趙氏司至青鳥氏司啓丹鳥氏司閉伍五鳩五雉

九扈之上古聖人重歷數如此堯世步占曰欽曰敬最為詳嚴
及夏羲和合為一其職已略至周為太史正歲年以敘事以
下大夫為之馮相氏掌日月星辰以中士為之則其官
益輕益創端造始推測天度非上哲有所不能及成法
已具有司守之亦可步占所以始重終輕其勢然也
新安陳氏曰重黎自掌天地神民羲和自掌四時作歷
疑是兩官紛紛之說不足深泥四子先總命之繼分命
之末復總命之雖分方與時其實通掌正如今太史局
春官正至冬官正雖
分四時實通兼云
分命羲仲宅嵎夷曰暘谷寅賓出

日平扶東作日中星鳥以殷仲春厥民析鳥獸孳尾此

四節言歷既成而分職以頒布且考驗之恐其推步之
或差也或曰上文所命蓋羲伯和伯此乃分命其仲叔未
詳是否也宅居也嵎夷即禹貢嵎夷既略者也曰暘谷
者取日出之義羲仲所居官次之名蓋官在國都而測

候之所則在于隅寅東表之地也寅敬也賓禮接之如
賓客也亦帝嘗歷日月而迎送之意出日方出之日益
以春分之旦朝方出之日而識其初出之景也平均秋
序作起也東作春月歲功方興所當作起之事也蓋以
歷之節氣早晚均次其先後之宜以授育司也日中者
春分之刻于夏永冬短為適中也晝夜皆五十刻舉晝
以見夜故曰日星鳥南方朱鳥七宿唐一行推以鶉火
為春分昏之中星也殷中也春分陽之中也析分散也
先時冬寒民聚于隕至是則以民之散處而驗其氣之
溫也乳化曰孳爰接曰尾以物之生育而驗其氣之和
也

輯錄 古字宅度通用宅端夷之類恐只是四方度其
日景以作歷耳如唐時尚使人去四方觀望廣問

寅賓出日寅餞納日如何先生曰恐當從林少穎解寅
賓出日是推測日出時候寅餞納日是推測日入時候
如土圭之法是也賜谷南交昧谷幽都是測日景之處
宅度也古書度字有作宅字者東作南訛西成朔

易皆節候也東作如立春至雨水節之類寅賓則求之於日星鳥則求之於夜廐民析因寅隄非是使民如此民自如此因者因其析後之事夷者萬物收成民皆優適之意孳尾至龍毛亦是鳥獸自然如此如今歷書紀鳴鳩拂羽等事程泰之解賜谷南定昧谷幽都以爲築一臺而分爲四處非也若如此則是東方之民得東作他處更不耕種矣西方之民享西成他處皆不欲穫矣大抵羲和四子皆是掌歷之官觀于咨汝羲暨和之辭可見敬致乃冬夏致日春秋致月是也春秋分無日景夏至景短冬至景長人傑平秩東作之類只是如而今穀雨止種之節候爾林少穎作萬物作之作說即是此意東作只是言萬物皆作當春之時萬物皆有發動之意與南訛西成爲一類非是今民耕作歲仲一人東方甚廣如何管得許多在地之位一定不易在天之象運轉不停惟天之星加于地之干纂註王氏曰分命位乃與地合得天運之正楚辭集注纂註使分陰陽而

治之也。申命使繼二仲而治之也。孔氏曰：「暘明也，日出於谷，而天下明，故稱暘谷。」蘇氏曰：「隅夷之類，乃四極之地，測候日景以定分至，而後歷可起，必驗之於四極，非常宅也。」唐孔氏曰：「居治東方之官，居在帝都而遷統領之，以春位在東，因治于東方，其實主四方春政。」林氏曰：「東作謂萬物發生于東，非全取農作之意。」曾云：「春為陽中，萬物以生，秋為陰中，萬物以成，且引詩：『亦作止，老子萬物並作，為證可補先儒之失。』」孫氏曰：「仲春，陽中，故舉日仲秋陰中，故舉宵。」永嘉鄭氏曰：「二十八宿環列四方，隨天而西，轉角亢太房心尾箕東方宿也，斗牛女虛危室壁北方宿也，奎婁胃昂畢觜參西方宿也，井鬼柳星張翼轸南方宿也，四方雖有定星，而星無定居，各以時見于南方，天形北傾，故北極居天之中，而常在天北二十八宿常半隱半見。」日東行歷二十八宿，故隱見各有時，必于南方考之。唐孔氏曰：「星鳥總舉七宿，以象言，夏言星火，以次言。」獨指房心虛昂為

舉一宿以宿言文不同者互相通也 金氏曰牛上有
鶉鳥星在星之東首西尾東故星為星鳥未為鶉首
已為鶉尾是也 張氏曰南方星鳥則東方蒼龍北方
玄武西方白虎可知東言大火則南之鶉火西之大梁
北之玄枵可知西言虛北言昴則東之房南之星可知
皆互推之也 武夷熊氏曰中星者非指天之中而言
人君之位坐北而西南則日月五星之運行皆在北極
垣外意亦是適在南北極之間故于此而取中而謂之
中星也大梁東端西谷南交朔方是就平地而言東西
南北也南方朱鳥東方蒼龍北方玄武西方白虎是就
周天而言東西南北也 新安陳氏曰諸家解皆以分
命申命四子為作四時歷姑以羲仲言使待春分之旦
實出日而識其景然後作春歷不亦晚乎其不通可知
矣惟朱子訂傳以此四節為歷既成而分職頒布且恐
其推步或差而審定考驗之方為可通蓋乃命之初既
案歷法之成法以作歷分命申命又恐其或戾于法而

審訂之以謹後來之歷此敬重之至也古者常以冬頒
來歲之朔雖今亦然豈待分至而後觀日景乎此訂傳
所以超出諸解
申命羲叔宅南交平秩南訛敬致日永
而不可及也

星火以正仲夏厥民因鳥獸希草

申重也南交南方交趾之地陳氏曰南交

下當有曰明都三字訛化也謂夏月時物長成所當變化之事也史記索隱作南為謂所當為之事也敬致周禮所謂冬至之景尺有五寸謂之地中者也永長也日永畫六十刻也星火東方蒼龍七宿火謂大火夏至昏之中星也正者夏至陽之極午為正陽位也因析而又析以氣愈熱而民愈散處也輯錄潘子善問平秩南訛敬布草鳥獸希而草易也致林氏謂如周禮致日之致此乃致南方之中星先生答曰致日乃考日中之景如周禮土圭之法非考中星也敬致只是冬至致日

之致寅賓是賓其出寅餞是餞其入敬致是致其中北方不說者北方無日故也廣伊川曰測景以三萬里為準若有窮然有至一邊已及一萬五千里者而天地之位盛如初也此言盛誤所謂升降一萬五千里中者謂冬夏日行南陸北陸之間相去一萬五千里耳非謂周天只三萬里也格言

纂註 劉氏敬曰南曰交趾後人傳寫脫兩字爾唐孔氏曰七宿房在其中但房心連體心統其名左傳言火中火見詩稱七月流火皆指房心為火故曰火蒼龍之中星特舉一星與鳥不類金氏曰心宿有三星中一星名曰大火出步天歌林氏曰敬致猶周禮冬夏致日左氏曰官居卿以底日前天文志云日有黃道一曰光道黃道北至東井去北極近南至牽牛去北極遠夏至至于東井近極故畧短立八尺之表而畧景長一尺五寸八分東至至于牽牛遠極故畧長立八尺之表而畧景長一丈三寸一寸四分畧景者所以知日之南北也春秋分日至妻

角去極中而晷中立八尺之表而晷景長七尺三寸六分此日去極遠近之差晷景長短之制也 分命

和仲宅西曰昧谷寅餞納日平秩西成宵中星虛以殷

仲秋厥民夷鳥獸毛毼

西謂西極之地也曰昧谷者以日所入而名也餞禮送行者之

名納日方納之日也蓋以秋分之莫夕方納之日而識其景也西成秋月物成之時所當成就之事也宵夜也宵中者秋分夜之刻于夏冬為遠中也晝夜亦各五十刻舉夜以見日故曰宵星虛北方玄武七宿之虛星秋分昏之中星也亦曰殷者秋分陰之中也夷平也暑退而人氣平也毛毼鳥獸毛落更出潤澤鮮好也
纂註
蘇氏曰秋獨曰宅西徐廣云今天水之西縣也孔氏曰昧冥也日入于谷而天下冥故曰昧谷昧谷曰西則隅夷東可知唐孔氏曰谷者日所行之道非實有谷而日入也送行飲酒謂之餞故餞為送也
申命和叔

宅朔方曰幽都平在朔易曰短星昴以正仲冬厥民隩

鳥獸氄毛

朔方北荒之地謂之朔者朔之為言蘇也萬物至此死而復蘇猶月之晦而有朔也日行

至是則淪于地中萬象幽暗故曰幽都在察也朔易冬
月歲事已畢除舊更新所當改易之事也日短晝四十
刻也星昴西方白虎七宿之昴宿冬至昏之中星也亦
曰正著冬至陰之極子為正陰之位也隕室之內也氣
寒而民聚于內也氄毛鳥獸生髮毳細毛以自溫也蓋
既命羲和造厯制器而又分方與時使各驗其實以審
夫推步之差聖人之敬天勤民其謹如是是以術不違
天而政不失時也又案此冬至日在虛昏中昴今冬至
日在斗昏中壁中星不同者蓋天有三百六十五度四
分度之一歲有三百六十五日四分日之一天度四分
之一而有餘歲日四分之一而不足故天度常平運而
舒日道常內轉而縮天漸差而西歲漸差而東北歲差

之由唐一行所謂歲差者是也古厯簡易未立差法但隨時占候修改以與天合至東晉虞喜始以天為天以歲為歲乃立差以追其變約以五十年退一度何承天以為太過乃倍其年而又反不及至隨劉焯取二家中數七十五年為近之然亦輯錄明易亦是時候歲一改未為精密也因附著于此易于此有終而復始之意廣中星自堯時至今已差五十度格言今之造厯者無定法只是趕趁天之行度以求合或過則損不及則益所以多差因言古之鐘律紐筭寸分豪釐絲忽皆是定法如合符契皆自然而然莫知所起古之聖人其思之如是之巧然皆非私意撰為之也意古之厯書亦必有一定之法而今亡矣三代而下造厯者紛紛莫有定議愈精愈密而愈多差由不得古人一定之法也李道嘗言天之運無常日月星辰積氣皆動物也其行度疾徐或過不及自是不齊使我之法能運乎天而不為天之所運則其疎密遲速或過不及之間不出乎我此虛

實之大數縱有差忒皆可推而不失矣何者以我法之
有定而律彼之無定自無差也李通言非是天運無定乃
其行度如此其行之差處亦是常度但後之造厯者為
數窄狹而不足以包之爾堯時昏旦星中于午月令差
于未漢晉以來又差今比堯時似差四分之一古時冬
至日在牽牛今却在斗大史公厯書說是太初然却
是顓頊四分厯劉歆三統厯唐一行大衍厯最詳脩五
代王朴司天考亦簡嚴然一行王朴之厯皆止用之二
三年即差王朴厯是七百二十加去季唐孔氏曰
通亦用却依康節三百六十數並精語纂註唐孔氏曰
方萬物盡故言朔李巡曰萬物盡于北方蘇而復生故
北稱朔王肅云改易者謹約益藏循行積聚引詩嗟我
婦子曰為改歲入此室處釋宮云西南隅謂之隅孫炎
云室中隱隅之處也隅是室內之名故以隅為室也
王氏曰不言北而言朔如月朔更始之意北方以位言
之則日月星辰之象皆伏而不見以時言之則草木歸

根昆蟲閉蟄皆有隱伏之意故謂之幽都三時言平秩
主農事也至冬農事畢矣歲事且終天氣更始故言平
在朔易 孫氏覺曰北者存而有察意朔者終而有始
意 呂氏曰北方終其陰而後始其陽故曰朔方既成
今歲之終又慮來歲之始故謂之朔易始而終終而始
此天地生生不窮之道而聖人體之以贊化育良始終
萬物之意也 新安胡氏曰東萊實本程子經說而略
潤色之程子又曰古者功作之事皆于冬月間隙之際
如修完室廬牆垣之類皆為來歲計皆是一歲之事既
終則復慮其始也 胡氏旦曰孔訓隤為室是音烏到
反說文亦同故孫引爾雅西南隅謂之隤陸德明音於
六反馬融云煖也則是民就隤煖之所 顧氏臨曰月令
仲春日在奎考之書則冬之時也仲夏在東井則書之
春也仲秋在角則書之夏也仲冬在斗則書之秋也月
令與書異蓋天道三十年小變百年中變五百年大變
故曰伏羲神農之歷不可用于堯舜之時堯舜之歷不

可用于夏商之際 新安陳氏曰顧氏此條當與訂傳
歲差之說參看訂傳謂今冬至日在斗昏壁中所謂今
者文公之時也證之今日又不同矣近歲方氏曰當至
元十八年辛巳作孫君山經序有曰今冬至日在箕九
度昏室中由此觀之烏可不用歲差法隨時追其變而
治歷以與天合哉既當時修改以與天合則孰經牀
況以求與古合決所不可也 金氏曰堯典中星與月
令不同月令中星與今日又不同歲有差數先賢故立歲
差之法以步之差法當以七十三年者為稍的堯時冬
至日在虛七度昏昴中至月令時該一千九百餘年
令冬至日在斗二十二度昏奎中至本朝初該一千七
百餘年冬至日在斗初度昏壁中今延祐又經四十餘
年而冬至日在箕八度矣昏 帝曰咨汝羲暨和朞三百
亦壁中以此驗之誠有不同

有六旬有六日以閏月定四時成歲允釐百工庶績咸

熙官庶衆績功成皆熙廣也天體至圓周圍三百六十五度四度之一繞地左旋常一日一周而過一度日麗天而少遲故日行一日亦繞地一周而在天為不及一度積三百六十五日九百四十分日之二百三十五而與天會是一歲日行之數也月麗天而尤遲一日常不及天十三度十九分度之七積二十九日九百四十分日之四百九十九而與日會十二會得全日三百四十八餘分之積又五千九百八十八如日法九百四十一而一得六不盡三百四十八通計得日三百五十四九百四十分日之三百四十八是一歲月行之數也歲有十二月月有三十日三百六十者一歲之常數也故日與天會而多五日九百四十分日之二百三十五者為氣盈月與日會而少五日九百四十分日之五百九十二者為朔虛合氣盈朔虛而閏生焉故一歲閏率則十日九百四十分日之八百二十七三歲一閏則三十

二日九百四十分日之六百單一五歲再閏則五十四日九百四十分日之三百七十五十有九歲七閏則氣朔分齊是為一卓也故三年而不置閏則春之一月入于夏而時漸不定矣子之一月入于丑而歲漸不成矣積之之久至于三失閏則春皆入夏而時全不定矣十二失閏子皆入丑歲全不成矣其名實乖戾寒暑反易農桑庶務皆失其時故必以此餘日置閏月于其間然後四時不差而歲功得成以此信治百官而衆工皆廣也

輯錄

天道左旋日月亦只左旋但天行健一日一夜而周常差過一度日月違天而退日是一日退一度

月退十三度有奇周天三百六十五度四分度之一每歲以有三百六十日餘了五日四十分之一又除小月計六日所以置閏所餘六日為氣盈所少六日為朔虛占說集三百有六旬有六日而令一歲三百五十四日者積朔空餘分以為閏朔空者六小月也餘分者五日四十分之一也大雅如何見得天有三百六十五度甚

麼人去量來只是天行得過處為度天之過處便是日之退處日月會為辰格言問周天之度是自然之度是強分曰天左旋一晝一夜行一周而又過了一度以其行過處一日作一度三百六十五度四分度之一方是一周只將南北表看今日恁時看時有甚星在表處明日恁時看這星又差遠或別是一星了天道與日月五星皆是左旋天道日一周天而常過一度日一日一周天起度端終度端故比天道常不及一度月行不及天十三度十九分度之七今人却云月行連日行連此錯說也但歷家以右旋為說取其易見日月之度爾義剛言伯靜在此因與之理會天度問伯靜之說曰伯靜云天是一日一周日則不及一度非天過一度也先生曰此說不是若以為天是一日一周則四時中星如何不同如此則日日一般却如何紀歲把甚麼時節做定限若以天為不過而日不及一度則趲來趲去將次午時便打三更矣因取禮記月令疏指其中說早晚不

同及更行一度兩處曰此說得甚分明其他歷書都不
如此說蓋非不曉但是說滑了口後信口說習而不察
更不去子細檢點而今若就天裏看時只是行得三百
六十五度四分度之一若把天外來說則是一日過了
一度季通常有言論日月則在天裏論天則在太虛空
裏若去太虛空裏看那天自是日日衮得不在舊時處
先生至此以手畫輪子曰謂如今日在這一處明日自
是有衮動著些子又不在舊時處了又曰天無體只二十
八宿便是體且如日月皆從角起天亦從角起日則一
日運一周依舊只在卯角上天則一周了又過角些子
日日累上去則一年便與日會次日蔡仲默附至書傳
天說云天體至圓止是為一章也見傳先生以此示義
剛曰此說分明淳問天道左旋自西而東日月右行則如
何先生曰橫渠說日月皆是左旋說得好蓋天行甚健
一日一夜周三百六十五度四分度之一又進過一度
日行速健次于天一日一夜周三百六十五度四分度

之一正恰好被天進一度則日為退一度二日天進二度則日為退二度積至三百六十五日四分日之一則天所進過之度又恰周得本數而日所退之度亦恰好退盡本數遂與天會而成一年是謂一年一周天月行進一日一夜行三百六十五度四分之度之一行不盡比天為退了十三度有奇至二十九日半強恰與天相值在恰好處是謂一月一周天進數為順天而左退數為逆天而右歷家以進數難算又以退數算之故謂之右行且曰日行遲月行速歷家止算所退之度却云日行一度月行十三度有奇此乃截法故有日月五星右行之說其實非右行也橫渠云天左旋處其中者順之少遲則反右矣此說最好書疏璣衡禮疏星回于天漢志天體沈括渾天儀議皆可參考問經星左旋緯星與日月右旋是否曰今諸家是如此說橫渠說天左旋日月亦左旋看來橫渠之說極是只恐人不曉所以詩傳只載舊說或問此亦易見且以一大輪在外一小輪載

日月在內大輪轉急小輪轉緩雖都是左轉只有急有慢便覺日月似右轉了先生云若如此則歷家逆字皆著改作順字進字皆著改作退字問日是陽如何反行得遲於月先生云正是月遲又問日行一度月行十三度有奇如何却是遲先生云歷家是將他退底度數天至健故日行常少及他一度月又遲故不及天十三度有奇且如月生于西一夜一夜漸漸向東便可見月遲問如此則當日比天行遲了一度月比天行遲了十三度有奇曰歷家若如此說則算著那相去處度數多今只以其相近處言故易算開季通云西域有九執歷却是順算又云便是那這箇物事難說歷家自有一種言語並介軒理墓問歷法何以推月之大小曰只是以每月二十九日半九百四十分日之四百九十九計之觀其合朔為何如何如前月大則後月初二日月生明前月小則後月初三日月生明中氣只在本月若躋得中氣在月盡後月便當置閏格言一歲之間六陰六陽三

年三十日故三年一閏五
年六十日故五歲再閏精
纂註孔氏曰恆四時曰春

則置閏焉以定四時之氣節成一歲之應象唐孔疏大
要已見傳中吳氏亨壽曰歲無定日閏有定法春閏

歲三字為此一節之大要春者一歲之足日也歲者一
歲之省日也閏者補三歲之省日姿為三歲之足日也

蘇氏曰有六旬有六日續為又古有又通陳氏普

曰天繞地左旋東出西入一日一周而少過之日皆天

之精與天左旋日遠一周以天之過也而為少不及馬

天日進而日日退也日非退也以天之進而見其退耳

歷家謂日月皆右旋以此蓋不計天之進而但以日月

之退為右旋以背而為面也然苟不計天之進則是四時

昏旦中星常不移矣無是理也說畧見隋書歷志文公

以為橫渠首發之蓋隋書之說略後人未有述之而橫渠

首得其說爾積三百六十五日四分日之一而天與日

復相遇于初進初退之地而為一年寒暑四時更迭代

謝生成散歟皆于是而周夫天日者氣數之始其每日之進退既有常則故一日之進退遂為一度三百六十五日四分日之一進退一周而周天之數遂為三百六十五度四分度之一而凡天之東西南北縱橫參伍與夫星辰遠近之相去月與五星之行皆以其度為度焉度數也則也天本無度以與日離合而成天日東西行其周布本東西而縱橫南北皆以其度為數見日者數之本日數既定而在地無非其度也月行進常以二十七日十一十六分日之三百二十七而與天會二十九日九百四十分日之四百九十九而與日會一月一周天者以與日會言也其實二十七日有奇而周天又二日有奇始與日會文公註十月之交以為月二十日九日有奇而周天又不及于日而與日會蓋未詳也其不及天日之度于日之不及天既多十餘倍則其與天日會者自速十餘倍此日之所以歲周而月之所以月周也日一年與天一會月一年與天十三會者日十二

會其與天會者無所用故古今少道之天以日為天故
日與天會而為歲功月于氣無與故其與天會者一無
所用而僅以與日會者紀乎二十四氣之行日月每三
十餘會而一閏西閏之中為十五十六會也但以晦朔
弦望為度則漸違乎氣以晦朔弦望為度而閏以追之
則雖暫違而常振以及之日月一會二十九日半有奇
二氣之日常在其內每三十餘會中氣必出一會之外
入再會之初而其月惟一氣在其月之中於此置閏天
不用之而人用之也人之用之者以望前半月終前月
望後半月起後月終前月則月無久違而及日起後月
則日有餘裕而待月農桑之候常不失序而人與天常
不相違矣十九年七閏則日月二百三十五會與天月
一十九會平等而無少不及故為一章也 金氏曰氣
盈而不置閏則晦朔弦望差朔虛而不置閏則春夏秋
冬差氣盈而失閏則立春為正月一日驚蟄為二月一
日隨節氣而為月累累皆然當朔不朔當晦不晦安得

合初一十五初八二十三之晦朔弦望乎朔虛而失閏則只以三箇月為春三箇月為夏又兩箇三月為秋為冬隨十二月而為一歲累累皆然而春非春秋非秋夏不熱冬不寒矣經三十三箇月則氣盈朔虛之數積及一月便合置閏前閏距後閏亦三十三箇月數內大月多則過數而閏三十四箇月者有之大月少則不及數亦閏三十二箇月者亦有之閏所以消其盈而息其虛也大略經三十三箇月則消息停當氣節差移自然月內無中氣而為閏焉新安陳氏曰四分度之一者周天全度外其零度有一度四分之中也以對周歲全日外其零日亦有一日四分之中之一分所謂四分日之一也九百四十分為一日其二百三十五分即四分中一分九百四十分日之二百三十五即四分日之一也月一日不及天十三度有奇是不足日十二度有奇積二十九日零四百九十九分而月與日會四百五十九分是六時零三刻弱也二十九日零六時三刻實為

一月十二會得全日三百四十八乃十二箇二十九日
餘分之積以日法算之其五千六百四十分該六日而
得六者得六日也零者尚有三百四十八分三百四十
八日加六日一歲通三百五十四日此一歲小歲之數
也十九年閏餘通得二百單六日須置七閏月所以每
十九年或二十年必氣朔同月者一番也然一歲只有
三百五十四日而經云暮三百有六旬有六日何也此
一歲大歲之數也蓋今年立春到明年立春二十四氣
全數並有三百六十五日零二十五刻二十五刻即四
分日之一以二十五刻當一日舉全數而言故曰三百
有六旬有六日也二氣為一月必有三十日零五時三
刻始交後月節氣合二十四氣該三百六十五日零二
十五刻此氣盈之溫數也十二月有六小盡者此朔虛之
虧數也一朔無三十日全非朔虛而何二氣必三十日
添五時二刻非氣盈而何節氣之有餘與小盡之不足
二者並行而不相悖因此有餘不足而置閏于其間三

者參合而交相成茲其為萬世不能易之妙法與
氏曰二十七章為一會五百一十三年三會為一統八
十一章一千五百三十九年三統為一元四年六百一
十七年章會統元運于無窮
呂氏曰釐工熙緒二句
乃史紀堯因治歷明時而致正官立治之方非堯言也
愚謂日月麗乎天宜皆隨天而行也而曰天左旋日
月五星右轉何哉大要天最佳而行速日月五星不相
及耳然二十八宿亦星也何以與天並行日月五星獨
不能並行也朱子曰天無體二十八宿便是體二十八
宿之行即天行也是以謂之經星猶機絲之有經一定
而不動而日月五星緯乎其中所以分晝夜而列四時
無非順天而成造化也故自地面而觀其運行則皆東
升西沒繞地而左旋自天度而考其次舍則日月五星
獨以漸而東為逆天而右轉蓋由其行不及天而次舍
日以退然舍雖退而行未嘗不進也退雖逆而進未嘗
不順也于天雖逆而右轉于地則未嘗不順而左旋也

蔡氏書傳曰天左旋日月麗天亦左旋而語錄中載朱子引橫渠曰天之左旋處其中者順之故日月星辰亦左旋北洞見天道之流行就地面而順觀之也論語或問曰經星隨天左旋日月五緯右轉詩十月之交傳曰周天三百六十五度四分度之一左旋于地一晝一夜則其行一周而人過一度日月皆右行于天一晝一夜則日行一度月行十三度十九分度之七此步占日月之躔次于天度而逆取之也儒家論天道則皆順而左旋歷家考天度則日月五星逆而右轉然其次舍雖逆其趨向則順自天度考之雖成右轉自地而觀之仍是左旋明于天于地之說則知左旋右轉雖異而實同矣又案論語或問乃朱子未定之書而語錄中又謂日月左旋之說恐人不曉故詩傳中

帝曰疇咨若時登庸故

齊曰肩子朱啟明帝曰吁嚚訟可乎

此下至縣續用弗成皆為釋辭張本也

時誰咨訪問也若順庸用也堯言誰為我訪問能順時
為治之人而登用之乎故齊臣名庸嗣也庸子朱堯之
嗣子丹朱也啟開也言其性開明可登用也吁者嘆其不
然之辭罵謂口不道忠信之言訟爭辯也朱益以其開
明之才用之于不善故罵訟禹所謂微虐是也此見堯
之至公至明深知其子之惡而不以一人病天下也或
曰庸國子爵堯時諸侯也夏書有庸侯周書有
庸之舞衣今亦未見其必不然姑存于此云
輯錄
時
若時登庸到篇末只是一事皆是為禪位設也一舉
而放齊舉庸子再舉而驩兜舉共工三舉而四岳舉
皆不得其人故卒以天下授舜廣顯道問朱先稱啟明
後又說他謫訟恐不相協先生曰便是放齊以白為黑
以非為是所以舜治他但那人也是曉崎且說而今暗
昧的人解與人健訟不解惟其是欲明後方解謫訟義
剛堯問時若時登庸放齊不應舉一箇明于為惡之
人此直是放齊不知子朱之惡失于薦揚耳經說庸子

來古註與程氏說當而孔氏曰誰能順是事者將

存之啟明之說亦然登用之呂氏曰君子因

啟明以為善小人因啟明以為帝曰疇咨若予采驩兜

慈來益有才而不善用之者也都共工方鳩僝功帝曰吁靜言庸違象恭滔天米事

歎美之辭也驩兜臣名共工官名益古之世官族也方

且鳩聚僝見也言共工方且鳩聚而見其功也靜言庸

違者靜則能言用則違背也象恭貌恭而心不然也滔

天二字未詳與下文相似疑有舛誤上章言順時比言

順事職任輯錄共工驩兜看得來其過惡甚于放齊者

大小可見子來廣方鳩僝功語未可曉此篇出于

伏生便有此等處亦未灼然知僝功為見功亦且

依古註說滔天二字義文也因下文而誤廣纂註

孔氏曰貌象恭敬而心傲慢若漫天唐孔氏曰鳩聚

釋詁文僝然見之貌歎共工能方聚見其功謂每于所

在之方皆能聚集以見功
林氏曰方方且之方與方
割方祇厥叙同
新安陳氏曰兜共四凶之二同惡相
濟敗為欺固堯已燭其姦未及誅
之耳舜既受禪長惡不悛故罪之
帝曰咨四岳湯湯洪

水方割蕩蕩懷山襄陵浩浩滔天下民其咨有能俾人

僉曰於繇哉帝曰吁咈哉方命圯族岳曰异哉試可乃

已帝曰往欽哉九載績用弗成

四岳官名一人而總四
岳諸侯之事也湯湯水

咸貌洪大也孟子曰水逆行謂之澤水洊水者洪水也
蓋水涌出而未洩故汎濫而逆流也割害也湯湯廣貌
懷抱其四面也襄駕出其上也大阜曰陵浩浩大貌滔
漫也極言其大勢若漫天也俾使人治也言有能任此
責者使之治水也僉眾共之辭四岳與其所領諸侯之
在朝者同辭而對也於歎美辭繇繇索伯名歎其美而薦

之也。弗者甚不然之。之辭。方命者。逆命而不行也。王氏曰。圓則行。方則止。方命猶令言。廢閣詔令也。蓋鯨之為人。憐戾自用。不從上令也。圮敗族類也。言與衆不和。傷人害物。鯨之不可用者以此也。楚辭言鯨。鯨直是其方命。圮族之證也。岳曰。四岳之獨言也。昇義未詳。疑是已廢而復強舉之之意。試可乃已者。蓋廷臣未有能于鯨者。不若姑試用之。取其可以治水而已。言無預他事。不必求其備也。堯于是遣之往治水。而戒以飲戒。蓋任大事。不可以不敬。聖人之戒。辭約而意盡。輯錄問四岳是也。載年也。九載三考功用。不成。故黜之。輯錄問四岳是長否。先生曰。周官言內有百揆。四岳則百揆是朝廷官之長。四岳乃管領十二牧者。四岳通九官十二牧。為二十有二人。則四岳為一人矣。又堯咨四岳。以汝能庸命。巽朕位。不成。堯欲以天下與四人也。人傑問堯既知鯨如何。猶用之。曰。鯨也是有才智。想見只是很拗。自是所以弄得恁地狼藉。所以楚辭說鯨。悻直以亡身。必是

他去治水有不依道理環事處弄了八九年無收煞了
故舜殛之義州異哉是不用亦可試可乃已言試而可

則用之亦可已而已之也廣庸命方命之命皆謂命令
也庸命者言能用我之命以與朕位也方命者言止其

令而不廣纂註孔氏曰昇已也言餘人盡已惟鯀可試呂
行也廣纂註氏曰鯀非無治水之才其方命地族乃恃

才而不順理不能行其所無事必矣惟欽字可治鯀之
病鯀不能用也堯時天下皆君子惟此二人與衆異為

小人故書之乃春秋常事不書之意陳氏大猷曰祭法
云禹能修鯀之功鯀非無功但不成而于人所共賢而

賢之易于人所共賢而知其非賢難二人當
時所賢堯猶知其不然此可見堯之知人也帝曰咨四

岳朕在位七十載汝能庸命巽朕位岳曰否德忝帝位

曰明明揚側陋師錫帝曰有鯀在下曰虞舜帝曰兪子

聞如何岳曰瞽子父頑母嚚象傲克諧以孝烝烝乂不格姦帝曰我其試哉女于時觀厥刑于二女釐降二女

于媯汭嬪于虞帝曰欽哉

朕古人自稱之通號吳氏曰
巽遜古通用言汝四岳能用

我之命而可巽以此位乎蓋丹朱既不肖羣臣人多不稱故欲舉以授人而先之四岳也否不通泰辱也明明上明謂明顯之下明謂已在顯位者揚舉也側陋微賤之人也言惟德是舉不拘貴賤也師衆錫予也四岳羣臣諸侯同辭以對也鰥無妻之名虞氏舜名也俞應許之辭予聞者我亦嘗聞是人也如何者復問其德之詳也岳曰四岳獨對也瞽無目之名言舜乃瞽者之子也舜父號瞽叟心不則德義之經為頑母舜之後母也象舜異母弟名傲驕慢也諧和也烝進也言舜不幸遭此而能和以孝使之進進以善自治而不至于大為姦惡

也女以女與人也時是刑法也二女堯二女娥皇女英也此堯言其將試舜之意也莊子所謂二女事之以觀其內是也蓋夫婦之間隱微之際正始之道所繫尤重故觀人者于此為尤切也釐理降下也媯水名在今河中府河東縣出歷山入河爾雅曰水北曰洎亦小水入大水之名蓋兩水合流之內也故從水從內蓋舜所居之地媯婦也虞舜氏也史言堯治裝下嫁二女于媯水之北使為舜婦于虞氏之家也欽哉堯戒二女之辭即禮所謂往之女家必敬必戒者況以天子輯錄先儒多疑舜之女嫁于匹夫尤不可不深戒之也輯錄乃前世帝王之後在堯時不應在側陋此恐不然若漢光武只是景帝七世孫已在民間耕稼了況上古人壽長傳數世之後經歷之遠自然有微而在下者 然堯東萊說亦好帝曰我其試哉女于時觀厥刑于二女皆堯之言釐降二女于媯水媯于虞乃史官之辭言堯以女下嫁于舜爾帝曰欽哉是堯戒其二女之辭如所謂往之女家

必敬必戒也若如此說不解亦自分明但今解者便添入許多字了說釐則訓治釐降只是他經理二女下

降時事纂註

孔氏曰堯年十六以唐侯升為天子在位七十年則時年八十六以二女妻舜以治

家觀治國呂氏曰烝烝二字舜之工夫在此烝烝者有熏灌之意詩曰烝之浮浮如甑之炊物薪然不繼則氣息不騰烝烝之工間斷不能熟物火既不歇則自然烝烝以至于熟舜處頑父嚚母傲弟之間彼為惡之力日不已苟非孝誠熏灌工夫源源安能至于不格姦之地若有間斷則無以勝其為惡矣益為善為惡各有力量力者勝此烝烝不格姦之意唐孔氏曰紱世本堯是黃帝玄孫舜是黃帝八代孫計堯女于舜之曾祖為四從姊妹以之為妻于義不可世本之言未可據信孫氏曰刑謂以身儀之與詩刑于寡妻之刑同周子曰家難而天下易家親而天下疎也家人離必起于婦人故睽次家人以二女同居而志不同行也堯所以釐降二女

于媯汭舜可禪乎吾茲試矣是治天下觀乎家治家觀
身而已矣地志河東郡青山中有二泉下南流者曰
媯下北流者曰汭二水異泉而合流出西注于媯陳氏
大猷曰舜自處頑嚚傲之間而盡其道固難使二女處
焉而亦盡其道尤難使非化二女與已同德安能如此
二女亦舜之傳也歐武夷熊氏曰孔子定書斷自唐虞
以下堯典是第一篇書以前更有文字韓子曰堯以是
道傳之舜舜以是道傳之禹湯文武周公孔子則堯典
是第一傳道之祖以前雖有伏羲神農黃帝三聖人者
作孔子作易大傳不過略述其開物成務大槩而已創
制立法益未詳也堯典曰放勳孔子稱之亦曰巍巍乎
其有成功煥乎其有文章益混沌既判至堯適當一元
大明之會讀書者不可不熟玩而深求也此一篇當作
五截者首至黎民於變時雍此第一節是言堯之德十
萬世聖學源流皆起于此自羲和欽若是天至庶績咸
熙此第二節是言堯之理會天道一截自疇咨若時至

象恭此第三節是言理會人道一截自帝曰咨四岳湯
湯洪水至績用弗成此第四節是理會地道一截又自
帝曰咨四岳至欽哉此第五節是言禪讓之事人君之
職以用人為重以知人為難一咨若時而得丹朱之頑
咨若采而得其工之靜言庸違三咨治水而得鯀之方
命圯族直至四咨岳舉舜為天下得人命蓋命稷命皋
皆是舉舜以後事人君以一身出而為天地人物之宗
主不過為生民立極盡其輔相財成之道以立人極之責
三才之責既盡則聖人之能事畢矣舜典言攝位亦只
是此三事首言璿璣玉衡是理會天道次言朝覲巡狩
是理會人道次言封山濬川是理會地道此後不過去
四岳咨岳牧命九官而已此外熙餘事也蓋人君職分
之大綱不過如此愚謂帝堯為五帝之盛帝堯典為百
篇之首篇呂氏謂書首二典猶易首乾坤乾君道坤臣
道也天地之道備于乾坤而君臣之道見于二典至當
之論也然堯典篇中不過三大節修齊治平一也治愚

明時二也知人舉舜三也節目有三而綱領惟一者
欽而已欽敬者一心之主宰而萬世之根本見于修齊
治平者此敬見于治厯明時者亦此敬見于知人傳賢
而不溺于親愛之子不遺于疎賤之舜者亦此敬一篇
之中言欽不一曰恭曰寅何注非一敬所貫通者先儒
謂敬者百聖傳心之法而實自堯啟其端禹續是書者
毋亦曰毋不敬

舜典

今文古文皆有今文合于堯典而無篇首
二十八字唐孔氏曰東晉梅賾上孔傳闕

舜典自乃命以位以上二十八字世所不傳多
用王范之註補之兩皆以慎徽五典以下為舜
典之初至齊蕭驚建武四年姚方興于大航頭
得孔氏傳古文舜典乃上之事未施行而方興
以罪致戮至隋開皇初購求遺典始得之今案
古文孔傳尚書有曰若稽古以下二十八字伏

生以舜典合于堯典只以慎徽五典以上接帝
曰欽哉之下而無此二十八字梅賾既失孔傳
舜典故亦不知有此二十八字而慎徽五典以
下則固具于伏生之書故傳者用王范之註以
補之至姚方興乃得古文孔傳舜典于是始知
有此二十八字或者由此乃謂古文舜典一篇
皆盡亡失至是方全得輯錄東萊謂舜典止載
之遂疑其偽蓋過論也
說此是作史之妙則不然然纂註程子曰舜典篇
末載舜死是夏
馬知當時別無文字在
時所作可知與堯
典虞時所作同

曰若稽古帝舜曰重華協于帝濬哲文明溫恭允塞玄

德升聞乃命以位

華光華也協合也帝謂堯也濬深哲
智也溫和平粹也塞實也玄幽潛也升

上也言堯既有光華而舜人有光華可合于堯因言其目則深沈而有智文理而光明和粹而恭敬誠信而篤實有比四者幽潛之德上聞

輯錄

濬哲文明溫恭允塞細分是八字合而言

之却只是四字濬是明之發處哲則見于事也文是文章明是明著易中多言文明比是就事上說塞是其中實處虞舜典自虞舜側微至乃命以位一本無云直自堯典帝曰欽哉而下接起慎徽五典所謂伏生以舜與合于堯典也玄德難曉書傳中亦無言玄者今人避諱以玄為元如玄黃之玄本黑色若云元黃是子思子正之類也

纂註

孔氏云舜有深智文明溫恭之德信允塞上下王氏曰休曰濬哲繼以文明若曰濬

哲而不文明則若深藏智巧者豈聖人之深智溫恭繼以允塞若曰溫恭而不允塞則若徒事外貌者豈聖人之溫恭程子曰此八事也凡論聖人者必取其德之煥發者稱之隨其所取不必同也故稱堯曰欽明文思稱文

王曰微采懿恭稱孔子曰溫良恭儉讓譬論王之美者
或取其色之溫潤或取其質之堅正或取其聲之清越
舉其一則知其為寶矣陳氏經曰重華協帝此見明兩
作離聖人繼出不約而同自內形之外則濬哲之發乃
所以為文明由外本乎內則溫恭之實乃所以為允塞
新安陳氏曰堯德光華舜德之光華與之重故曰重華
舜繼堯曰重華如武繼文曰重光濬哲文明溫恭允塞
之盛德由其光輝而不可掩言之則曰重華本于幽潛
而未見言之則曰玄德幽潛之中光華出焉此與闇然
而日章同意又堯允塞當從信實之說然孔註亦當存
蓋如孟子則塞于天地之間與格于上下同意慎微五典五典克從納于百揆

百揆時叙賓于四門四門穆穆納于大麓烈風雷雨弗

迷

微美也五典五常也父子有親君臣有義夫婦有別
長幼有序朋友有信是也從順也左氏所謂無違教

也此蓋使為司徒之官也揆度也百揆者揆度庶政之官惟唐虞有之猶周之冢宰也時叙以時而叙左氏所謂無廢事也四門四方之門古者以賓禮親邦國諸侯各以方至而使主焉故曰賓穆穆和之至也左氏所謂無凶人也此蓋又兼四岳之官也麓山足也烈迅迷錯也史記曰堯使舜入山林川澤暴風雷雨舜行不迷蘇氏曰洪水為害堯使舜入山林相視原隰當雨大至衆懼失常而舜不迷其度量有絕人者而天地鬼神亦或有以相之與愚謂遇烈風雷雨非常之變而不震懼失常非固聰明誠智確乎不亂者不能也易震驚百里不喪匕鬯意為韓錄人傑問慎微五典是使之掌教納于百揆是使之宅百揆賓于四門是使之為行人之官納大麓恐是為山虞之官先生曰若為山虞則其職益卑且合從史記說使之入山雖遇烈風雷雨弗迷其道也納于大麓當以史記為據謂如治水之類弗迷謂舜不迷于風雨也若主祭之說某不敢信且雷雨在

天如何解迷若是舜在主祭而乃有風雷之變豈得是好義剛烈風雷雨弗迷只當從太史公說若從主祭說則弗迷二字說不得弗迷乃指人而言廣顯道問約于大麓烈風雷雨弗迷說者或謂大錄萬機之政或謂登封泰山二說如何先生曰史記載使舜纂註呂氏曰慎入山林烈風雷雨弗迷其道當從史記纂註微二字當玩味慎有敬敷之意蔽有在寬之意夏氏曰五典之屬即命以位之事孔氏曰麓錄也納舜使大錄萬機之政陰陽和風雨時各以其節不有迷錯愆伏舜之德合于天蘇氏曰漢以來有大錄萬機之說故章帝始置太傅錄尚書事晉以後強臣將篡者多為之考其所由蓋古文麓作麓故誤爾林氏曰虎時官莫尊于百揆者大錄萬機之政非百揆而何可證孔註之非李氏曰胡不以孟子考之所謂主事而事治即典從揆叙穆穆之類是也所謂主祭而百神享即納大麓風雨弗迷是也孟子之說書之義疏也新安陳氏曰主祭錄

萬機之說姑並存之 愚謂此一節與堯典以觀九族而九族睦至協和萬邦而民時雍語意氣象相似分明上句是感下句是應見二聖人隨感隨應功用神速處 帝曰格汝舜詢事考言乃

言底可績三載汝陟帝位舜讓于德弗嗣

格來詢謀乃汝底致陟升也

堯言詢舜所行之事而考其言則見汝之言致可有功于今三年矣汝宜升帝位也讓于德讓于有德之人也或曰謙遜自以其德不足為嗣也 輯錄 陸農師點乃言底可績三載句當如此格言堯命舜曰三載汝

陟帝位舜讓于德弗嗣則是不居其位也其曰後終于文祖則是攝行其事也故舜之攝不居其位不稱其號只是攝行其職事爾到得後來舜遜于禹不復言位止曰總朕師爾其曰汝終陟元后則今不陟也率百官若帝之初者但率百官如舜之初爾虞舜居攝時不知稱號謂何觀受命則是已將天下分付他了廣纂註

呂氏曰數言試功此唐虞觀人之成法舜登庸之初非特歷試以事必嘗數陳以言故堯于此美其言與實相稱

也正月上帝受終于文祖

上日朔日也葉氏曰上旬之日曾氏曰如上戊上辛上丁之

類未詳孰是受終者堯于是終帝位之事而舜受之也文祖者堯始祖之廟未詳所指為何人也

纂註

唐孔氏曰上帝言一歲日之上也受堯終帝位之事于堯文德之祖廟也王氏炎曰文祖堯所從受天下者

也呂氏曰堯已為天下得人則堯之責塞矣故曰受終言受終則舜正始可知愚謂堯老舜攝堯之為帝

自若也而遽以受終告祖者蓋天子之有天下當以其身為始終昔由祖以有其始今告祖以受其終此為告

攝而謂之受終蓋以重舜之責也

在璿璣玉衡以齊七政

在察也美珠謂之璿璣機

也以璿璣機所以象天體之轉運也衡橫也謂衡簫也以玉為管橫而設之所以窺璣而齊七政之運行猶今

之渾天儀也七政日月五星也七者運行于天有渾有速有順有逆猶人君之有政事也此言舜初攝位整理庶務首察璣衡以齊七政蓋厯象授時所當先也案渾天儀者天文志云言天體者三家一曰周髀二曰宣夜三曰渾天宣夜絕無師說不知其狀如何周髀之術以為天似覆盆蓋以斗極為中中高而四邊下日月傍行速之日近而見之為晝日遠而不見為夜蔡邕以為考驗天象多所違失渾天說曰天之形狀似鳥卵地居其中天包地外猶卵之裏黃圓如彈丸故曰渾天言其形體渾渾然也其術以為天半覆地上半在地下其天居地上見者一百八十二度半強地下亦然北極出地上三十六度南極入地下亦三十六度而高高正當天之中極南五十五度當嵩高之上又其南十二度為夏至之日道又其南二十四度為春秋分之日道又其南二十四度為冬至之日道南下去地三十一度而已是夏至日北去極六十七度春秋分去極九十一度冬至去

極一百一十五度此其大率也其南北極持其兩端其
天與日月星宿斜而迴轉此必古有其法遭秦而滅至
漢武帝時洛下閎始經營之鮮于妄人又量度之至宣
帝時耿壽昌始鑄銅而為之象宋錢樂又鑄銅作渾天
儀衡長八尺孔徑一寸璣徑八尺圓周二丈三尺強轉
而望之以知日月星辰之所在即璿璣玉衡之遺法也
歷代以來其法漸密本朝因之為儀三重其在外者曰
六合儀平置黑單環上刻十二辰入于四隅在地之位
以準地面而定四方側立黑雙環背刻去極度數以中分
天脊直跨地平使其半入地下而結於其子牙以為天
經斜倚赤單環背刻赤道度數以平分天腹橫繞天經
亦使半出地上半入地下而結於其卯酉以為天緯三環
表裏相結不動其天經之環則南北二極皆為圓軸虛
中而內向以挈三辰四遊之環以其上下四方于是可
考故曰六合次其內曰三辰儀側立黑雙環亦刻去極
度數外貫天經之軸內挈黃赤二道其赤道則為赤單

環外依天緯亦刻宿度而結于黑雙環之卯酉其黃道
則為黃單環亦刻宿度而又斜倚于赤道之腹以交結
于卯酉而半入其內以為春分後之日軌半出其外以
為秋分後之日軌又為白單環以承其交使不傾墜下
設機輪以水激之使其日夜隨天東西運轉以象天行
以其日月星辰于是可考故曰三辰其最在內者曰四
遊儀亦為黑雙環如三辰儀之制以貫天經之軸其環
之內則兩面當中各施直距外指兩軸而當其要中之
內面又為小竅以受玉衡要中之小軸使衡既得隨環
東西運轉又可隨處南北低昂以待占候者之仰窺焉
以其東西南北無不周徧故曰四遊此其法之大略也
沈括曰舊法規環一面刻周天度一面加銀丁蓋以夜
使天晦不可目察則以手切之也古人以瞻師璣疑亦
為此今太史局秘書省銅儀制極精緻亦以銅丁為之
歷家之說又以北斗魁四星為璣杓三星為衡今詳經
文簡質不應北斗二字乃用寓名恐未必然姑存其說

以廣輯錄

孔註謂舜察天文齊七政以審已當天心與否未必然只是從新整理起此是最先當理

會者故從此理會去廣書正義璿璣玉衡處說天體極好閑祖書疏載在璿璣玉衡處先說箇天令人讀著亦

無甚緊要以某觀之若看得此亦可以想象天之形與日月星辰之運進退疾徐之度皆有分數而歷數大槩

亦可知矣道夫先生一日論及璿璣玉衡及黃赤道日月躔度渚子善曰嵩山本不當天之中為是天形歟側逐當

其中耳先生曰嵩山不是天之中乃是地之中黃道赤道皆在嵩山之北南極北極天之樞紐只此處不動如

磨臍然此是天之中至極處如人之臍帶也歷法要當先論太虛以見三百六十五度四分度之一一一定

位然後論天行以見天度加損虛度之歲纂註唐孔疏

分歲分既定然後七政乃可齊耳精語人安已

見傳中林氏曰璿衡以步七政之軌度時數而不差謬故曰以齊日月五星在天有常度其災祥與政事相

應故曰七政 真氏曰舜受終之初察璿璣以揆七政之
運正如人子之事親候伺顏色惟恐一毫少拂于親心
此大舜事 肆類于上帝禋于六宗望于山川徧于羣神
天之敬也 肆類于上帝禋于六宗望于山川徧于羣神
肆遂也類裡望皆祭名周禮肆師類造于上帝註云郊
祀者祭昊天上帝之常祭非常祀而祭告于天其禮依郊祀
為之故曰類如泰誓武王伐商王制言天子將出皆云類
于上帝是也裡精意以享之謂宗尊也所尊祭者其祀
有六祭法曰埋少牢于泰昭祭時也相近于坎壇祭寒
暑也王宮祭日也夜明祭月也幽宗祭星也雩宗祭水
旱也山川名山大川五嶽四瀆之屬望而祭之故曰望徧
周徧也羣神謂邱陵墳衍古昔聖賢之類言受終觀象
之後即祭祀上下 輯錄類只是祭天之名其義則不可
神祇以攝位告也 曉與所謂旅上帝同皆不可曉
然決非是常祭廣雉問六宗先生曰古註說得自好鄭
氏宗讀為崇即祭法中所謂祭時祭寒暑祭日祭月祭

星祭冰旱者如此說則先祭上帝次禋六宗次望山川
然後偏及羣神次序則皆順又問五宰取張髦之說如
何先生曰非惟用改易經文兼之古者昭穆不盡稱宗
惟祖有功宗有德故曰祖文王而宗武王且如西漢之
廟惟文帝稱太宗武帝稱世宗至
唐廟乃盡稱宗此不可以為據
纂註王氏十朋曰肆
起後事之辭鄭氏曰泰昭昭者明也亦壇也時四時
也亦謂陰陽之神也埋之者陰陽出入于地中也凡此
以下皆祭用少牢相近讀為禳祈卻也求也寒于坎暑于
壇王宮日壇夜明月壇宗禋為榮幽榮星壇雩榮水旱
壇蘇氏曰晉張髦以六宗為三昭三穆受終之初既
有事于文祖其事必及餘廟矣春秋不郊猶三望三望分
野之星與國中山川乃知古者郊天必及天地間尊神
魯諸侯故三望而已此之禋六宗望山川偏羣神益與
類上帝為一禮爾考之祭法其泰壇祭天即此類上帝
也祭時寒暑日月星水旱即此禋六宗也四坎壇祭四

方與山林川谷邱陵能出雲為風雨見怪物皆曰神有天下者祭百神即此望山川編羣神也祭法所叙舜典之章句義疏也但鄭玄曲為之說改宗為縈不可信耳

輯五瑞既月乃日觀四岳

羣牧班瑞于羣后

輯斂瑞信也公執桓圭侯執信圭伯執躬圭子執穀璧男執蒲璧五等諸

使執之以合符于天子而驗其信否也周禮天子執冒以朝諸使鄭氏註云名玉以冒以德覆冒天下也諸侯始受命天子錫以圭圭頭斜銳其冒下斜刻小大長短廣狹如之諸使來朝天子以刻處冒其圭頭有不同者則辨其偽也既盡觀見四岳四方之諸侯羣牧九州之牧伯也程子曰輯五瑞徵五等諸使也此已上皆正月事至盡此月則四方諸侯有至者矣遠近不同來有先後故日日見之不如他朝會之同期于一日蓋欲以少接之則得盡其詢察禮意也班頌同羣后即侯牧也既見之後審知非偽則又班還其瑞以與天下正始也

輯錄

問輯五瑞既月乃日觀四岳羣牧班瑞于羣后恐只是王畿之諸侯輯敘瑞玉是命圭合信如點檢

牌印之屬如何先生曰不當指殺王畿如顧命太保率東方諸侯畢公率西方諸侯不數日間諸侯皆至如此之速人傑觀是正君臣之禮較嚴天子當依而立不下堂而見諸侯朝是講賓主之禮天子當宁而立之路寢門之外相與揖纂註陳氏大猷曰類帝而下見君受命進而入精語纂註于天輯五瑞而下見臣受命于君

陳氏曰瑞玉堯所賜也舜敘而復班之然歲二月東是玉也在堯則為堯賜在舜則為舜賜矣

巡守至于岱宗柴望秩于山川肆覲東后協時月正日同律度量衡修五禮五玉三帛二生一死贄如五器卒乃復五月南巡守至于南岳如岱禮八月西巡守至于

西岳如初十有一月朔巡守至于北岳如西禮歸格于

藝祖用特

孟子曰天子適諸侯曰巡守巡守者巡所守也歲二月當巡守之年二月也岱宗泰山也

柴燔柴以祀天也望望秩以祀山川也秩者其牲幣祝號之次第如五岳視三公四瀆視諸侯其餘視伯子男者也東后東方之諸侯也時謂四時月謂月之大小日謂日之甲乙其法略見上篇諸侯之國其有不齊者則協而正之也律謂十二律黃鍾大簇姑洗蕤賓夷則無射大呂夾鍾仲呂林鍾南呂應鍾也六為律六為呂凡十二管皆徑三分有奇空圍九分而黃鍾之長九寸大呂以下律呂相間以次而短至應鍾而極焉以之制樂而節聲音則長者聲下短者聲高下者則重濁而舒緩上者則輕清而剽疾以之審度而度長短則九十分黃鍾之長一為一分而十分為寸十寸為尺十尺為丈十丈為引以之審量而量多少則黃鍾之管其容子穀秬

黍中者一千二百以為侖而十侖為合十合為升十升為斗十斗為斛以之平衡而權輕重則黃鍾之侖所容千二百黍其重十二銖兩侖則二十四銖為兩十六兩為斤三十斤為鈞四鈞為石此黃鍾所以為萬事根本諸侯之國其有不一者則審而同之也時月之差由積日而成其法則先粗而後精度量衡受法于律其法則先本而後末故言正日在協時月之後同律在度量衡之先立言之叙益如此也五禮吉凶軍賓嘉也修之所以同天下之風俗五玉五等諸侯所執者即五瑞也三帛諸侯世子執纁公之孤執玄附庸之君執黃二生卿執羔大夫執鴈一死士執雉五玉三帛二生一死所以為贄而見者此九字當在肆覲東后之下協時月正日之上誤脫在此言東后之覲皆執此贄也如五器劉侍講曰如同也五器即五禮之器也周禮六器六贄即舜之遺法也卒乃復者舉祀禮覲諸侯一正朔同制度修五禮如五器數事皆畢則不復東行而遂西向且轉而

南行也故曰卒乃復南岳衡山西岳華山北岳恒山二月東五月南八月西十一月北各以其時也格至也言至于其廟而祭告也藝祖疑即文祖或曰文祖藝祖之所自出未有所考也特特挂謂一牛也占者君將出必告于祖禰歸入至其廟而告之孝子不怨死其親出告反面之義也王制曰歸格于祖禰鄭註曰祖下及禰皆一牛程子以為但言藝祖舉尊爾實皆告也但止就祖廟共用一牛不如時祭各設主于其廟也二說未知孰是今兩輯錄問先生建牧立伯小大相維自可以垂拱無存之輯錄為矣何故復有巡守之舉豈牧伯不足任邪或云因以祭天且朝諸侯又云君民一體不可邈然不相接故必躬親巡撫然後上下情通而教化洽矣此先王之誠心二說孰是先生曰建牧立監與巡守之義並行不悖祭天朝諸侯巡撫之意皆在其中矣先王之政體用兼舉本末備具非若後世儒者一偏之說有體而無用得本而遺末也精語巡守亦非舜創立此制蓋亦

循襲將來故黃帝紀亦云披山通道未嘗寧居註家以至岱宗柴為句某謂當以柴望秩于山川為一句如柴望大告武成漢郊祀志亦云柴望秩于山川協時月正日只是去合同其時月日爾非謂作歷也每遇巡守凡事理會一遍如文字之類廣問修五禮吳才老以為只是五典之禮唐虞時無此因說舜典比段疑有錯簡當云肆覲東后五玉三帛二主一死贊協月正日同律度量衡修五禮如五器卒乃復如者齊一之義卒乃復者事畢復歸也非謂復歸京師只是事畢還歸故亦曰復前說班瑞于羣后則是還之也此二句本橫渠說又曰卒乃復是事畢而歸非是以贊為復也義剛人傑問舜之巡守是一年一遍四岳否曰觀具末後載歸格于藝祖用特一句則是一年一遍巡四岳矣問四岳惟衡山最遠先儒以為非今之衡山別自有衡山不知在甚處曰恐在嵩山之南若如此則四岳相去甚近矣又云唐虞時以潛山為南岳五岳亦近非是一年往一處然古之天

子一歲不能徧及四岳則到一方境

纂註

林氏曰律之十二

上會諸侯亦可周禮有此禮廣

十二前律歷志云推歷成律故同律度量衡必先協時

月正日禮有因革損益故謂之修

陳氏經曰時月日

正朔所自出律度量衡制度所自始五禮名分上下所

由正非天子不議禮不制度不考文此所以大一統而

無國異政之患也

夏氏曰以物言則曰玉以寶言則

曰瑞以形言則曰器

鄭氏曰羔取其羣而不失其類鴈

取其候時而行雉取其守介死不失節也

孔氏曰器

謂圭璧禮終則還之三帛生死則否

陳氏曰此言復

後言歸復自方岳返也歸至帝都也春秋書公子遂如

齊至黃乃復書自彼返也又書季子來歸書至國都也

陳氏經曰歸而告至則出告可知

呂氏曰巡守而

歸苟民物有一不得其所其見祖廟有愧必矣想舜歸

格之時此心無愧對越在廟慰懼可知也

林氏曰胡

旦疑一歲不能周萬五千里此不然叔恬問王通舜一

歲而巡守四岳國不費而民不勞何也曰儀衛少而征求寡也陳氏大猷曰天下非一人所能獨治于是有

封建諸侯不能保其常治于是有巡守巡守所以維持封建也歲月易流人心易懈法度易弛上下易隔非天子時巡考察作新之治豈能久而無弊哉呂氏曰自此以下至過密八音以前皆史雜載舜攝位二十八年中

事之五載一巡守羣后四朝敷奏以言明試以功車服以

庸五載之內天子巡守者一諸侯來朝者四蓋巡守之明年則東方諸侯來朝于天子之國又明年則南方

之諸侯來朝又明年則西方之諸侯來朝又明年則北方之諸侯來朝又明年則天子復巡守是則天子諸侯雖

有尊卑而一往一來禮無不答是以上下交通而遠近洽和也敷陳奏進也周禮曰民功曰庸程子曰敷奏以言

者使各陳其為治之說言之善者則從而明考其功有功則賜車服以旌異之其言不善則又有以告飭之也

林氏曰天子巡守則有協時月日以下等
輯錄五載一

事諸侯來朝則有敷奏以言以下等事

巡守此

是立法如此若一歲間行一遍則去一方近處會一方
之諸侯如周禮所謂十二歲巡守殷國殷國則是會一
方之諸侯使來朝也則纂註孔氏曰功成則賜車服以
巡守去回禮一番義則纂註孔氏曰功成則賜車服以

表顯其能用

鄭氏曰巡

守之年諸侯各朝于方岳其間四年諸侯來朝于京師以庸
表顯其人有才能可用也人以車服為榮故天子之賞
諸侯皆以車服賜之覲禮云天子賜侯氏以車服是也
又如采菽詩云君子來朝何以予之雖無子之路車乘
馬又何予之玄衮及黼

皆庸以車服之證也 肇十有二州封十有二山濬川

肇始也十二州冀兗青徐荆揚豫梁雍幽并營也中古
之地但為九州曰冀兗青徐荆揚豫梁雍禹治水作貢
亦因其舊及舜即位以冀青地廣始分冀東恒山之地
為并州其東北醫無閭之地為幽州又分青之東北遼東

等處為營州而冀州止有河內之地今河東一路是也
封表也封十二山者每州封表一山以為一州之鎮如
職方氏言揚州其山鎮曰會稽之類濬川濬導十二州
之川也然舜既分十有二州而至商時又但言九圍九
有周禮職方氏亦止列為九州有揚荆豫青雍幽冀
并而無徐梁營也則是為十二州蓋不甚久不知其自
何時復合為九也吳氏曰此一節在禹治水之後其次
叙不當在四罪之先蓋史官泛記舜所行之大事初不
計先後輯錄肇十有二州冀州堯所都此地已狹若又
之叙也輯錄分而為幽并二州則三州疆界極不多了
青州分為營州亦然葉氏曰分冀州西為并州北為幽
州青州又在帝都之東分其東北為營州唐蔡仲默集
註尚書至肇十有二州因云禹即位後又并作九州先
主曰也見不得但後面皆只說帝命式于九圍以有九
有之師不知是甚時纂註孔氏曰封大也唐孔氏曰
又復并作九州義則纂註爾雅釋地九州之名于禹貢

無梁青而有幽營孫炎以爾雅與禹貢職方皆不同疑是殷制新安陳氏曰舜即位初咨十有二牧後又曰

州十有二師則終舜之世分九州為十二州可見矣又曰禹又并為九州有左傳可證宣三年昔夏之方有德

也貢金九牧龜山楊氏曰十二州九州或分或合因時而已不必強為之說劉氏貞曰帝都冀州冀州北

接北狄而其域大于九州分冀為幽并以此二州捍狄使不得接畿甸所以壯帝畿之翼衛而禦外夷之輕侮

也曾氏曰舜分冀州之正北為幽州西北為并州東北為營州王氏炎曰孔氏謂分青為營非也姑脩二

說呂氏曰禹治水膏濬州今水平復濬安不忘危也川不言十二川無大小皆濬也象以典刑

流宥五刑鞭作官刑扑作教刑金作贖刑青災肆赦怙

終賊刑欽哉欽哉惟刑之恤哉

象如天之垂象以示人而典者常也示人以常

刑所謂墨劓剕官大辟五刑之止也所以待夫元惡大
慙殺人傷人穿窬淫放凡罪之不可宥者也流宥五刑
者流遣之使遠去如下文流放竄殛之類也宥寬也所
以寬夫罪之稍輕雖入于五刑而情可矜法可疑與夫
親責勲勞而不可加以刑者則以此而寬之也鞭作官刑
者木末垂草官府之刑也朴作教刑者夏楚二物學校
之刑也皆以待夫罪之輕者金作贖刑者金黃金贖贖
其罪也益罪之極輕雖入于鞭朴之刑而情法猶有可
議者也此五刑者從重入輕各有條理法之正也肆縱
也責災肆赦者責謂過誤災謂不幸若人有如此而
入于刑則又不待流宥金贖而直赦之也賊殺也怙終
賊刑者怙謂有恃終謂再犯若人有如此而入于刑則
雖當宥當贖亦不許其宥不聽其贖而必刑之也此二
句者或由重而即輕或由輕而即重蓋用法之權衡所
謂法外意也聖人立法制刑之本末此七言者大略盡之
矣雖其輕重取舍陽舒陰慘之不同然欽哉欽哉惟刑

之恤之意則未始不行乎其間也蓋其輕重毫釐之間各有攸當者乃天討不易之定理而欽恤之意行乎其間則可以見聖人好生之本心也據此經文則五刑有流宥而無金贖周禮秋官亦無其文至呂刑乃有五等之罰疑穆王始制之非法之正也茲當刑而贖則失之輕疑赦而贖則失之重且使富者幸免貧者受刑又非所以為輯錄云云夫豈一于輕而已哉又以舜命皋陶之平也輯錄辭考之士官所掌惟象流二法而已其曰惟明克允則或刑或宥亦惟其當而無以加矣又豈一于宥而無刑哉今必曰堯舜之世有宥而無刑則是殺人者不死而傷人者不刑也是聖人之心不忍于元惡大憝而反忍于銜冤抱痛之良民也是所謂怙終賊刑刑故無小者皆為空言以誤後世也其必不然也亦明矣夫刑雖非先王所恃以為治然以刑弼教禁民為非則所謂傷肌膚以懲惡者亦既竭心思而繼之以不忍人之政之一端也今徒流之法既不足以止穿窬淫放之姦而

其過于重者則又有不當死而死如強暴賊滿之類者
荀米陳羣之議一以宮刑之辟當之則雖殘其支體而
實全其軀命且絕其為亂之本而使後無以肆焉豈不
仰合先王之意而下適當時之宜哉况君子得志而
有為則養之之具教之之術亦必隨力之所至而汲汲
焉固不應因循苟且直以不養不教為當然而熟視其
爭奪相殺于前也答鄭景望書後一半前一半蔡傳全
用止好生之本心象者象其所犯之罪而加之以所
犯之刑典常也即墨劓剕宮大辟之常刑也象以典刑
此一句乃五刑之綱領諸刑之總括猶今之刑皆結于
笞杖徒流絞斬也凡人所犯合墨則加以墨刑所犯合
劓則加以劓刑刺宮大辟皆然猶夷人定法傷人者償
創折人手足者亦折其手足傷人目者亦傷其目之類
流宥五刑者其所犯合此五刑而情輕可恕或因過誤則
全其支體不如刀鋸但流以宥之屏之遠方不與同商
如五流有宅五宅三居之類是也擬作官刑者此官府

之刑猶今之鞭撻吏人蓋自有一項刑立以治官府之胥吏如周禮治胥吏鞭五百鞭三百之類扑作教刑此一項學官之刑猶今之學舍夏楚如習射習藝春秋教以禮樂冬夏教以詩書凡教人之事有不率者則用此刑扑之如侯明捷記之類是也金作贖刑謂鞭扑二刑之可恕者則許用金以贖其罪如此解釋則五旬之義豈不粲然明白象以典刑之輕者有流以宥之鞭扑之刑之輕者有金以贖之流宥所以寬五刑贖刑所以寬鞭扑聖人斟酌損益低昂輕重莫不合天理人心之自然而無毫釐秒忽之差所謂既竭心思馬繼之以不忍人之政如何說聖人專意只在教化刑非所急聖人固以教化為急若有犯者須以此刑治之豈得置而不用問贖刑非古法曰然贖刑起周穆王古之所謂贖刑者贖鞭扑耳夫既以殺人傷人矣又使之得以金贖則有財者皆可以殺人傷人而無辜被害者何其大不幸也且殺人者安然居乎鄉里彼孝子順孫之欲報其親者

豈肯安于此乎所以屏之四裔流之遠方彼此兩全之
也個聖人之心未感于物其體廣大而虛明絕無毫髮
偏倚所謂天下之大本者也及其感于物也則喜怒哀樂之
用各隨所感而應之無一不中節者所謂天下之達道也
蓋自本體而言如鏡之未有所照則虛而已矣如衡之未
有所加則平而已矣至語其用則以其至虛而好醜無
所適其形以其至平而輕重不能違其則此所以致其
中和而天地位萬物育雖以天下之大而不外乎吾心
造化之中也以此而論則知聖人之于天下其所以處
賞威刑之具者莫不各有所由而舜典所論敷奏以言
明試以功車服以庸與夫制刑明辟之意皆可得而言
矣雖然喜而賞者陽也聖人之所欲也怒而刑者陰也
聖人之所惡也是以聖人之心雖曰至虛至平無所偏
倚而于此二者之間其所以處之亦不能無少不同者
故其言又曰罪疑惟輕功疑惟重此則聖人之微意然
其行之也雖曰好賞而不能賞無功之士雖曰惡刑而

不敢縱有罪之人而功罪之實苟已曉然而無疑則雖欲輕之重之而不可得是又未嘗不虛不平而大本之立達道之行固自若也故其賞也必察其言審其功而後加以車服之賜其刑也必曰象以典刑者畫象而示民以墨劓剕宮大辟五等內刑之常法也其曰流宥五刑者放之于遠所以寬夫犯此內刑而情輕之人也其曰鞭作官刑扑作教刑者官府學校之刑所以馭夫罪之小而未麗于五刑者也其曰金作贖刑者使之入金而免其罪所以贖夫犯此鞭扑之刑而情之又輕者也此五者刑之法也其曰膏災肆赦者言不幸而觸罪者則肆而赦之其曰怙終賊刑言有恃而不改者則賊而刑之此二者法外之意猶今律令之名例也其曰欽哉欽哉惟刑之恤哉者此聖人畏刑之心閔夫死者之不可復生刑者之不可復續惟恐察之有不審施之有不當又雖已得其情而猶必矜其不教無知而抵冒至此也嗚呼詳此數言則聖人制刑之意可見而其于輕重淺

深出入取舍之際亦已審矣雖其重者或至于誅斬斷割而不少貸然本其所以至此則其所以施于人者亦必嘗有如是之酷矣是以聖人不忍其被酷者併寬其痛而為是以報之雖若甚慘而語其實則為適得其宜雖以不忍之心畏刑之甚而不得赦也惟其情之輕者聖人于此乃得以施其不忍畏刑之意而有以宥之然亦必投之遠方以禦魑魅蓋以此等所犯非殺傷人則亦或淫或盜其情雖輕而罪實重若使既免于刑而又得使還鄉復為平民則彼之被其害者寡妻孤子將何面目以見之而此幸免之人髮膚支體了無所傷又將得以遂其前日之惡而不悔此所以必曰流以宥之而又宥五流有宅五宅三居之文也若夫鞭扑之刑則雖刑之至小而情之輕者亦必許其入金以贖而不忍輒以真刑加之是亦仁矣然而流專以宥而刑而不下及于鞭扑贖專以侍鞭扑而不上及于肉刑則其輕重之間入未嘗不致辨也至于過誤必赦故犯必誅之法則

又權衡乎五者之內欽哉欽哉惟刑之恤之旨則常通
貫乎七者之中此聖人制刑明辟之意所以雖或至于
殺人而其反覆表裏至精至密之妙一皆從廣大虛
明心中流出而非私智之所為也而或者之論乃謂上
古惟有肉刑舜之為流為贖為鞭為扑乃不忍民之斬
戮而始為輕刑者則是自虐以上雖犯鞭扑之刑者亦
必使從墨劓之坐而舜之心乃不忍于殺傷淫盜之凶
賊而反忍于見殺見傷為所侵犯之良民也聖人之心
其不如是之殘忍偏倚而失其正亦已明矣又謂周之
穆王五刑皆贖為能復舜之舊者則固不察乎舜之贖
初不上及五刑又不察乎穆王之法亦必疑而後贖也
且以漢宣之世張敞以討菟之役兵食不繼建為入殺
贖罪之法初亦未嘗及夫殺人及盜之品也而蕭望之
等猶以為如此則富者得生貧者獨死恐開利路以傷
治化曾謂三代之隆而以為得哉嗚呼世衰學絕士
不聞道是以雖有粹美之實而不免一偏之弊其于聖

人公平正大之心有所不識而徒知切切焉飾其偏見之私以為美談若此多矣可勝辨哉若夫穆王之事以予料之殆必由其巡遊無度財匱民勞至其末年無以為計乃特為此一切權宜之術以自豐而又託于輕刑之說以違道而于譽耳夫子存之蓋以示戒而程子策試嘗發問焉其意亦可見矣或者又謂四凶之罪不輕于少正卯舜乃不誅而流之以為輕刑之驗殊不知共兇朋黨縣功不就其罪本不至死三苗拒命雖若可誅而蠻夷之國聖人本以荒忽不常待之雖有負犯不為畔臣則姑竄之遠方亦正得其宜耳非故為是以輕之也若少正卯之事則予嘗竊疑之蓋論語所不載子思孟子所不言雖以左氏春秋內外傳之誣且駁而猶不道也乃獨苟況言之是必齊魯陋儒憤聖人之失職故為此說以夸其權吾又安敢信其言遽稽以為決乎聊并記之以俟來者原刑說問吳才老云是五典之刑如所謂不孝之刑不悌之刑先生曰此是亂說凡人有罪合

用五刑如何不用荀子有一篇專論此意說得甚好
或問欽哉欽哉惟刑之恤哉先生曰多有人解書欽
恤之恤某之意不然若作寬恤如被殺者不令償命死
者何辜大率是說刑者民之司命不可不謹如斷者不
可續乃矜恤之恤耳友仁今之法家多惑于報應禍福
之說故多出人罪以求福報夫使無罪者不得直而有
罪者反得釋是乃所以為惡耳何福報之有書曰欽哉
欽哉惟刑之恤哉所謂欽恤云者正以詳露曲直令有
罪者不得免而無罪者不得濫刑也今之法官惑于欽
恤之說以為當寬人之罪而出其法故凡罪之當殺者
莫不多為可出之塗以俟奏裁既云奏裁則大率減等
當斬者配當配者徒當徒者杖當杖者笞是乃盡弄條貫
侮法而受賕者耳何欽恤之有古之律令謂法不能決
者則俟奏裁今乃明知其罪之當死亦莫不為可生之
塗以生之惟壽皇不然其情理
重者皆殺之月間奏用格言

流共工于幽洲放驩兜

于崇山竄三苗于三危殛鯀于羽山四罪而天下咸服

流遣之遠去如水之流也放置之于北不得他適也竄則驅逐禁錮之殛則拘囚困苦之隨其罪之輕重而異法也共工驩兜鯀事見上篇三苗國名在江南荆揚之間恃險為亂者也幽州北裔之地水中可居曰洲崇山南裔之山在今澧州三危西裔之地即雍之所謂三危阨它者羽山東裔之山即徐之蒙羽其藝者服者天下皆服其用刑之當罪也程子曰舜之誅四凶怒在四凶舜何與焉蓋因是人可有怒之事而怒之聖人之心本無怒也聖人以天下之怒為怒故天下咸服之春秋傳所記四凶之名與此不同說者以窮奇為共工渾敦為驩兜饕餮為三苗檮杌為鯀

輯錄

放驩兜于崇山或云在今澧州慈利縣義剛

鯀鯀于

羽山想是偶然在彼而殛之程子謂時適在彼是也若曰罪之彰著或害功敗事于彼則未可知也夫抵此等

隔絕遙遠又無證據只說得箇大綱如此便了不必說
殺了便受折難廣四凶只緣堯舉舜而遜之以位故不
服而抵于罪在堯時則其罪未彰又他畢竟是箇世家
大族又未有過惡故動他未得廣極非殺也洪範云殛
死猶言貶死問舜不惟德威又且才高嗣位未幾如
齊七政觀四岳協時月正日同律度量衡肇十二州封
十二山及四罪而天下服一齊做了其功用神速
如此曰聖人作處自別故書稱三載底可績德明纂註
孫氏贊曰放重于流竄重于放殛重于竄林氏曰經
錄竄苗當在洪水未平之前巡守肇十二州當在禹平
水之後更因言舜言之恤刑遂舉四凶事繫于下耳世
徒見四凶得罪不在堯世則謂堯不能去不知舜之去
四凶乃在歷試之時實受堯命如禹居攝時亦受舜命
征苗也新安胡氏曰觀此在帝乃殛落之前則可見
矣

二十有八載帝乃殛落百姓如喪考妣三載四海遏

密八音

殂落死也死者魂氣歸于天故曰殂體魄歸于地故曰落喪為之服也過絕密靜也八音金石絲

竹匏土草木也言堯聖德廣大恩澤隆厚故四海之民思慕之深至于如此也儀禮圻內之民為天子齊衰三月圻外之民無服今應服三月者如喪考妣應無服者過密八音堯十六即位在此七十載又試舜三載不聽政二十八載乃崩輯錄林少穎解殂落云魂殂而魄在位通計百單一年輯錄落說得好便是魂升于天魄降于地底意思方子堯崩百姓如喪考妣三載四海過密八音百姓如喪考妣此是本公四海過密八音以禮論之則為過為天子服三年之喪只是圻內諸侯之國則不然為君為父皆服斬衰君謂天子諸侯及大夫之有地者大夫之邑以大夫為君大夫以諸侯為君諸侯以天子為君各為其君服斬衰諸侯之大夫却為天子服齊衰三月禮無二斬故也公之喪諸達官之長杖達官謂通于君得奏事者各以其長其長杖其下者不杖

可知文蔚問後世不封建諸侯使天下一統百姓當為天子何服曰三月天下服也雖有遠近聞喪有先後然亦不過三

纂註

孔氏曰堯凡壽一百一十七年唐孔氏曰計堯之壽惟有一百一十六歲蓋誤為

七也王氏炎曰此言哀慕之情非言喪服之禮也月正元日舜格于文祖

正月

也元日朔日也漢孔氏曰舜服堯喪三年畢將即政故復至文祖廟告蘇氏曰受終告攝此告即位也然春秋國君皆以遭喪之明年即位于廟而輯錄堯舜之廟雖改元孔氏云喪畢之明年不知何所據也

輯錄

堯舜之廟雖不可考然以

義理推之堯之廟當立于丹朱之國所謂修其禮物作賓于王家益神不歆非類民不祀非族故禮記有虞氏禘黃帝而郊饗祖顓頊而宗堯伊川以為可疑方子詢于四岳闢四門明四目達

四聰詢謀闢開也舜既告廟即位乃謀治于四岳之官開四方之門以來天下之賢俊廣四方之視聽以

決天下之壅蔽輯錄

問明四目達四聰是達天下之聰明否曰固是曰孔安國言廣視聽于四方如何曰

亦是以下天下之目為目以傑纂註唐孔氏曰明四方之目天下之耳為耳之意人傑纂註使為已達視四方也達

四方之聰使為已達聽聞四方也聽達方有所壅塞令為已悉聞見之陳氏大猷曰舜初攝位則觀岳牧初即

位則復詢岳牧益內外之要職莫先焉新安陳氏曰自此至惟時亮天功紀舜初即位事四岳總四方諸

侯故以闢四方之門廣視聽于四方者咨詢之闢四門有以天下為一家之氣象焉明四目達四聰有以天下

為一身之精神焉 咨十有二牧曰食哉惟時柔遠能邇惇德允

元而難任人蠻夷率服

牧養民之官十二牧十二州之牧也王政以食為首農事以時

為先舜言足食之道惟在于不違農時也柔者寬而撫之也能者擾而習之也遠近之勢如此先其略而後其

詳也。惇厚允信也。德有德之人也。元仁厚之人也。難拒絕也。任古文作壬。包藏凶惡之人也。言當厚有德信仁人而拒奸惡也。凡此五者處之各得其宜則不待中國順治雖蠻貊之國亦相率而服從矣。**輯錄**人能通柔遠却說得輕能通是奈何得他使之帖服之意人傑惇德允元只是說自己德使之厚其德信其仁難字只作平聲任如字難任人言不可**纂註**孔氏曰所重輕易任用人也。廣與傳異姑存之。敬授民時柔安言當安遠乃能安近厚行德信使足長善任佞難拒也。蘇氏曰能讀如不相能之能懷柔遠者使與近者相能。陳氏曰能者馴服其教化之意。呂氏曰難非特去之常有戒懼之意。吳氏曰任古文作士以孔士觀之可見。新安陳氏曰重民食一邇邇親君子遠小人則內治舉而外夷服欲州牧以是為國而率諸侯也。**舜曰咨四岳有能奮庸熙帝之載使宅百揆亮采**

惠疇僉曰伯禹作司空帝曰俞咨禹汝平水土惟時懋

哉禹拜稽首讓于稷契暨皋陶帝曰俞汝往哉

奮起熙廣載事

亮明惠順疇類也一說亮相也舜言有能奮起事功以廣帝堯之事者使居百揆之位以明亮庶事而順成庶類也僉衆也四岳所領四方諸侯之在朝者也禹如姓崇伯鯀之子也平水土者司空之職時是懋勉也指百揆之事以勉之也蓋四岳及諸侯言伯禹見作司空可宅百揆帝然其舉而咨禹使仍作司空而兼行百揆之事錄其舊績而勉具新功也以司空兼百揆如周以六卿兼三公後世以他官平章事知政事亦此類也稽首首至地稷田正官稷名棄姓姬氏對于卻契臣名姓子氏封于商稷契皆帝嚳之子暨及也皋陶亦臣名俞者然其舉也汝往哉者不聽其讓也此章稱舜曰此下方稱帝曰以見堯老舜攝堯在時舜未嘗稱帝此後舜方

真卽帝位
輯錄

問亮米惠時先生云時類也與侍同惠時順衆也時咨若予采舉其類而咨詢也

人雖禹以司空行宰相事汝平水土則是司空之職惟時懋哉則又勉以行百揆之事廣禹以司空宅百揆猶

周以六卿兼三公今以戶部侍郎兼平章事模樣義剛

纂註

林氏曰書于名分之除最嚴蓋恐涉于疑

似而起後世之論也如舜居攝疑其稱帝故于命禹稱舜曰以見前此未嘗稱帝也周公攝政疑其稱王故于步

方言周公曰王若曰以見周公雖攝而號令皆成王之命也後世尚有言舜南面而立堯北面而朝及周公負

黼宸以朝諸便者呂氏曰當時紹堯極治何用奮迅激昂蓋天下之治不進則退必常存奮起之心乃有日新

不窮之理雖極治之時此意不可忘也陳氏曰舜豈不知禹之必詢于衆者付之公論而我無與也唐孔

氏曰伯爵也禹代父鯀為崇伯入為天子司空故稱伯禹劉氏向曰舜命九官濟濟相讓和之至也帝

曰棄黎民阻飢汝后稷播時百穀

阻厄后君也有爵土之稱播布也穀非一

種故曰百穀此因禹之讓而申命之使仍舊職以終其事也

纂註

唐孔氏曰黎民阻飢謂往者洪水時

張氏曰棄以名命之稷以官稱之

唐孔氏曰稷五穀之長故以名主穀之官孔氏曰播百穀美其前功以

勉之 樂氏曰史記言稷少好耕農民皆法則之堯舉為農師使教民稼穡則棄之為稷堯時已然舜以舊官

中命之耳 呂氏曰阻飢猶夏常時豈有此事然尚憂此所以為唐虞也

帝曰契百姓不

親五品不遜汝作司徒敬敷五教在寬

親相親睦也五品父子君臣夫

婦長幼朋友五者之名位等級也遜順也司徒掌教之官敷布也五教父子有親君臣有義夫婦有別長幼有叙朋友有信以五者當然之理而為教令也敬敬其事也聖賢之于事雖無所不敬而此及事之大者故特以

敬言之寬裕以待之也蓋五者之理出于人心之本然
非有強而後能者自其拘于氣質之偏溺于物欲之蔽
始有昧于其理而不相親愛不相遜順者于是因禹之
讓又申命契仍為司徒使之敬以敷教而又寬裕以待
之使之優柔浸漬以漸而入則其天性之真自然呈露
不能自己而無無耻之患矣孟子所引堯言勞來匡直輔
翼使自得之又從而輯錄之命契不過是欲使父子
振德之亦此意也
有親止有信只是此五者至
于後來聖賢千言萬語只是欲明此而已語略義剛問
堯德化如此久何故至舜猶曰百姓不親五品不遜先
生曰也只怕恁地敬敷五教在寬只是不急迫慢慢
地養他節古人為政一本于寬竊謂今必須反之以嚴
蓋必須如是矯之而後有以得其當今人為寬至于事
無統紀緩急予奪之權皆不在我下稍却是姦豪得志
平民不蒙其惠反受其殃矣
略
事不管其謂壞了這箇寬字
格
言
禮樂所以成教化而

兵刑輔之當唐虞之時禮樂之官析為二纂註唐氏曰
兵刑之官合為一詳略之意可見精語命授而

後命契富而後教之序也成四百家曰不觀由于不

遜陳氏大猷曰以敬為主則所以教之者無不至特

慮其失之迫耳故言在寬寬得無縱弛之患乎曰主于

敬而行之以寬自不至於縱弛也新安陳氏曰施教之

道敬寬二字不可闕一穆王命召牙曰敬明乃訓曰勿

數五典得敬寬之意舜此二義上以堯之匡直自得為

法下可以為萬世法朱子教學者曰帝曰臯陶蠻夷猾

嚴立課程寬著意思其亦此意也夫

夏寇賊姦宄汝作士五刑有服五服三就五流有宅五

宅三居惟明克允

猶亂夏明而大也曾氏曰中國文明之地故曰華夏四時之夏疑亦取此

義也初人曰寇殺人曰賊在外曰姦在內曰宄士理官也服服其罪也呂刑所謂上服下服是也三就孔氏以為

大罪于原野大夫于朝士于市不知何據竊恐惟大辟棄之于市宮辟則下蠶室餘刑亦就屏處茲非死刑不欲使風中其瘡誤而至死聖人之仁也五流五等象刑之當宥者也五宅三居者流雖有五而宅之但為三等之居如列爵惟五分上惟三也孔氏以為大罪居于四裔次則九州之外次則千里之外雖亦未見其所據然大槩當略近之此亦因禹之讓而申命之又戒以必當致其明察乃能使刑當其罪而人無不信服也

輯錄

義剛問蠻夷猾夏是有苗否先生曰也不專指此但官為此而設五服三就若大辟則就市宮刑則如漢時就蠶室其墨劓則三刑度亦必有一所在刑之既非死刑則傷人之肌體不可不擇一深密之所但不至如蠶室耳廣三就只當從古注五宅三居宅只訓居人解五刑三就用五刑就三處故大辟棄于市宮刑下蠶室其他底刑也是就箇隱風處不然牽去當風處割了耳鼻豈不害破傷風胡亂死了人義剛纂註

曰命畢陶次于契刑所以弼教也 王氏曰三就就輕就重與就輕重之中三居居遠居近與居遠近之中姑備一說 陳氏曰易卦言用刑者如噬嗑如賁如旅其象皆有取于離月刑在惟明可知矣居刑官不明不足以盡人心不允不足以當人罪故戒以惟明克允 夏氏曰舜命契教以一言曰寬命畢教以一言曰明簡而易守也 孫氏曰惟明則情偽畢知克允則輕重適當復齊董氏曰或言帝者之世詳于化而略于政王者之世詳于政而略于化虞時兵刑之官合為一而禮樂分為二成周禮樂之官合為一而兵刑公為二故此蠻夷猾夏亦以命畢然經只言五刑五流未嘗言兵也後征苗之兵禹實掌之未嘗用畢則兵刑非兼掌矣 新安胡氏曰一說有稍夏則姦究因以生舜命畢掌刑治姦賊主意不在蠻夷也姑存之 帝曰疇若予工兪曰垂哉帝曰兪咨垂汝共工垂拜稽首讓于殳斨

暨伯與帝曰俞往哉汝諧

若順其理而治之也曲禮六工有土工金工石工木工獸

工草工周禮有攻木之工攻金之工攻皮之工設色之工搏埴之工皆是也帝問誰能順治于百工之事者臣名有巧思莊子曰機工倕之指即此也又斯伯與三臣名也父以積竹為兵建兵車者斯方登斧也古者少以其所能為名父斯豈能為二器者歟往哉汝諧者往哉汝和其職也

纂註

張氏曰守法信度因聖人

創作之制而持循之此之謂若新安陳氏曰乘之巧因萬物自然之理而為之行所無事之大智大巧耳豈若後世之器械技巧威精其能作為淫巧以蕩上心之比哉

陸音攬郭呂係力結二反

帝曰疇若

予上下草木鳥獸僉曰益哉帝曰俞咨益汝作朕虞益

拜稽首讓于朱虎熊羆帝曰俞往哉汝諧

上下山林澤藪也虞掌山

澤之官周禮公為虞衡屬于夏官朱虎熊羆四臣名也
高辛氏之子有曰仲虎仲熊意以獸為名者亦以其能
服是獸而得名與史記曰朱虎熊羆為伯
蓋之佐前父析伯與當亦為垂之佐也
輯錄孟子說

澤而焚之是使之除去障翳驅逐禽獸耳未必使之為
虞官也至舜命之作虞然後使之養育其草木鳥獸耳

廣纂註

孔氏曰若謂順施政教取之有時用之有節
張氏曰聖人以萬物為一體故曰予草木鳥獸

先王之世山澤為之厲禁獮荼魚然後漁人入澤梁與
夫昆蟲未蟄不以火田之類皆若之之事故獸魚咸若
所以為夏后鹿濯魚躍所以為文王然至於禽獸繁殖則有
益之烈而焚有周公之驅而寧益若順也居于山澤順
也交于中國非順也豈以姑息為若哉
呂氏曰君為
天下萬物之主故為獸草木莫不有職以掌之後世之
君不識代天理物民與物理一而分殊民且不恤安能
用心到此此見唐虞天涵地育廣大氣象
新安陳氏

曰所以盡人之性亦必盡物之性也
林氏曰蓋向輔

掌火烈山澤特為禹之佐至此方正為虞
禮有山虞澤虞等蓋蓋衆虞之長耳
陳氏大誡
帝曰周

咨四岳有能典朕三禮僉曰伯夷帝曰俞咨伯汝作秩

宗夙夜惟寅直哉惟清伯拜稽首讓于夔龍帝曰俞往

欽哉

典主也三禮祀天神享人鬼祭地祇之禮也伯夷臣名晏姓秩叙也宗祖廟也秩宗叙次百神之官

而專以秩宗名之者蓋以宗廟為主也周禮亦謂之宗伯而都家皆有宗人之官以掌祭祀之事亦此意也夙

早寅敬畏也直者心無私曲之謂人能敬以直內不使少有私曲則其心潔清而無物欲之污可以交于神明

矣夔龍輯錄

惟寅故直惟直故清義剛問夙夜惟寅直哉惟清曰人能敬則內自直內直則看得

那禮文分明不糊塗也廣問伯夷典禮而曰夙夜惟寅直哉惟清何也曰禮是見成制度夙夜惟寅直哉惟清乃所以行其禮也今葉氏曰天秩之禮天下莫不太常有寅清堂人傑纂註宗馬故曰秩宗或曰宗如宗主之宗天秩之禮此官實主之新安陳氏曰九官惟百揆秩宗咨四岳而命重可知矣心者神明之舍所以交于神明之本也敬則能直內直內則清明在躬敬其本而直清其效也禮敬而已矣既戒以寅猶勉以欽丁寧至帝曰夔命汝典樂教胄子直而溫寬而栗剛而無

虐簡而無傲詩言志歌永言聲依永律和聲八音克諧

無相奪倫神人以和夔曰於予擊石拊石百獸率舞

是

也自天子至卿大夫之適子也栗莊敬也上二無字與母同凡人直者必不足于溫故欲其溫寬者必不足于

栗故欲其栗所以慮其偏而輔翼之也剛者必至于虐故欲其無虐簡者必至于傲故欲其無傲所以防其過而戒禁之也教胄子者欲其如此而其所以教之之具則又專在于樂如周禮大司樂掌成均之法以教國子弟而孔子亦曰興于詩成于樂蓋所以蕩滌邪穢斟酌飽滑動盪血脉流通精神養其中和之德而救其氣質之偏者也心之所之謂之志心有所以必形于言故曰詩言志既形于言則必有長短之節故曰歌永言既有長短則必有高下清濁之殊故曰聲依永聲者宮商角徵羽也大抵歌聲長而濁者為宮以漸而清且短則為商為角為徵為羽所謂聲依永也既有長短清濁則又必以十二律和之乃能成文而不亂假令黃鐘為宮則太簇為商姑洗為角林鍾為徵南呂為羽蓋以三分損益隔八相生而得之餘律皆然即禮運所謂五聲六律十二管還相為宮所謂律和聲也人聲既和乃以其聲被之八音而為樂則無不諧協而不相侵亂失其倫次

可以奏之朝廷薦之郊廟而神人以和矣聖人作樂以養情性育人材事神祇和上下其體用功效廣大深切乃如此今皆不復見矣可勝歎哉變曰以下蘇氏曰舜方命九官濟濟相讓無緣變于此獨言其功比益稷之文簡編脫誤

輯錄

文蔚問禮書學禮首引舜命契為司徒敷五教命變典樂教胄子兩條文

蔚竊謂古人教學不出此兩者契敷五教是欲使人明于人倫曉得這道理變典樂教胄子是欲使人養其德性而實有諸已此是一篇綱領谷曰固是如此後面只是明此一意如司徒之教即是契敷教事大司馬之教即是變典樂事因曰直而溫寬而栗直與寬本自是好但是變典樂事因曰直而溫寬而栗直與寬本自是好但濟之以溫與栗則盡善至如剛簡二字則微覺有弊故戒之以無虐無傲蓋所以防其失也某所以特與分開欲見防其失者專為剛簡而設不蒙上直寬二句直寬但曰溫而栗至剛簡則曰無虐無傲觀其立言之意自可見文蔚曰教以人倫者固是人欲養其德性便只是

下面詩言志歌永言聲依永律和聲四句曰然諷誦歌詠之間足以和其心氣但上面三句抑揚高下尚且由人到那律和聲處直是不可走作所以詠歌之際深足以養人情性至如播之金石被之管絃非是不和終不若人聲自然故晉人孟嘉有言絲不如竹竹不如肉謂漸近自然至八音克諧無相奪倫神人以和此是言祭祀燕饗時事又是一節直而溫只是說所教胄子要得如此若說做教者事則于教胄子上都無益了廣王氏以直溫以下為教者事古人以樂教胄子綴平和中正詩言志歌永言聲依永律和聲八音克諧無相奪倫古人詩只一兩句歌便行得來長聲是宮商角徵羽是聲依所歌而發却用律以和之如黃鍾為宮則太簇為商之類不可亂其倫序也或問詩言志聲依永律和聲之說曰古人作詩只是說他心下所有事說出來人便將他詩來歌其聲之清濁長短各依他作詩之語言却將律來調和其聲今人却又安排下腔調了然後做言

語去合腔子豈不是倒了却是永依聲也古人是以樂去就他詩後世是以詩去就他樂如何解興起得人祖道詩言志歌永言聲依永律和聲以五聲永言以律和聲之高下節聲依永律和聲此皆有自然之調沈存中以為臣與民不要大事與物大不妨若合得自然二者亦自大不得可學詩之作本言志而已方其詩也未有歌也及其歌也未有樂也以聲依永以律和聲則樂乃為詩而作非詩為樂而作也詩出乎志者也樂出乎詩者也詩者其本而樂者其末也谷陳體仁樂聲是土金木火水洪範是水火木金土音律如尖塔樣闊者濁聲尖者清聲宮以下則太濁羽以上則太清皆不可為樂惟五聲者中聲也道夫問所論樂今考之若以黃鍾為宮便是太簇為商姑洗為角蕤賓為徵徵林鍾為徵南呂為羽應鍾為變宮若以大呂為宮便是夾鍾為商中呂為角林鍾為變徵夷則為徵無射為羽黃鍾為變宮其餘則旋相為宮周而復始若言相生之法則以律生呂便是

下生以呂生律則為上生自黃鍾下生林鍾林鍾上生
太簇太簇下生南呂南呂上生姑洗姑洗下生應鍾應
鍾上生蕤賓蕤賓本當下生今却復上生大呂大呂下
生夷則夷則上生夾鍾夾鍾下生無射無射上生中呂
相生之道至是窮矣遂復變而上生黃鍾之宮再生之
黃鍾不及九寸只是八寸有餘然黃鍾居象也非諸宮
之所能役故虛其正而不復用所用只再生之變者就再
生之變又闕其半所闕其半者蓋若大呂為宮黃鍾為
變宮時黃鍾管最長所以只得用其半聲而餘宮亦皆
倣此先生曰然又曰宮商角徵羽與變宮變徵皆是數
之相生自然如此非人力所能加損此其所以為妙格
言樂律自黃鍾至仲呂皆屬陽自蕤賓至應鍾皆屬陰
此是一箇大陰陽黃鍾為陽大呂為陰太簇為陽夾鍾
為陰每一陽間一陰入是一箇小陰陽樂聲貴鍾凡
寸最濁應鍾最清清聲則四寸半律管只以九寸為
準則上生下生三分益一損一如破竹矣禮記註疏

五聲六律十二管還相為宮處分明 十二律自黃鍾而生黃鍾是最濁之聲其餘漸清若定得黃鍾是入得樂 因論律呂先生曰管有長短則聲有清濁黃鍾之管最長應鍾之管最短長者聲濁短者聲清十二律旋相為宮宮為君商為臣樂中最忌臣陵君故有四清聲清聲者減正律之半如應鍾為宮其聲最短而清或減實為商則商聲高如宮聲是為臣陵君不可用遂用減實減半律為清聲以應之雖減半律然只是此律故亦自能相應也如方響鐵有十六片乃是十二律外添四清聲也杜佑通典載此一項甚詳並精語 獲曰於予擊石拊石 周禮大司樂掌成均之法以教國子弟是重出 廣纂註 以樂德教之曰中和祇庸孝友復以樂語教之曰興道風頌言語而尤以樂舞教之以律同聲音大合樂正自變所職充廣之 程子曰先王之樂必須律以考其聲令律既不可求而聲又不可全信正惟此為難求中聲須得律律不得則中聲無由見律者自然

之數 夏氏曰直溫以下所謂樂德也詩言志至律和
聲所謂樂語也 林氏曰作樂必本之情性稽之度數
本之情性樂所以生稽之度數樂所以成永言以上本
之情性也形之于樂洪纖高下不可無法必稽之度數
聲依永律和聲是也 陳氏經曰直溫以下德之中和
也言志以下樂之中和也將教以中和之德必教以中
和之樂 陳氏大猷曰以是為教宜乎直寬可使溫衆
剛簡可使無虐傲皆協于中德而不偏不過焉諧是衆
音和協倫是各音條理 薛氏曰翕如純如八音克諧
之謂也噉如無相奪倫之謂也 蘇氏曰聲者樂聲永
者人聲也樂聲升降之節視人聲之所能至則為中聲
是謂聲依永永則無節無節則不中律故以律為之節
是謂律和聲聲為樂聲與律異被之八音方為樂聲
新安陳氏曰帝王立教始見于命契教五教命夔教冑
子二章朱子大學序所謂司徒之職典樂之官所由設
也正謂此也直寬剛三句易者簡略不煩者多至傲忽

以常情驗之可見聲依永律和聲最難解歌永言者言之不足而永歌之也聲依永者宮商角徵羽之五聲依傍于永言之歌而見也律和聲者又以十二律而和此五聲也黃鍾為宮則某為商某為角及三分損益隔八相生今為說以明之陽律生陰呂曰下生三分長而損一陰呂生陽律曰上生三分長而益一皆是左旋隔八律而相生黃鍾為第一宮其長九寸隔八下生林鍾為徵三分損一其長六寸林鍾隔八上生太簇為商三分益一其長八寸惟此三律長皆全寸而無餘分餘律則餘分參差不齊矣太簇下生南呂為羽南呂上生姑洗為角林鍾為第二宮宮生徵徵生商商生羽羽生角以下皆倣此以至仲呂為第十二宮上生黃鍾為徵下生林鍾為商上生太簇為羽下生南呂為角十二宮各有五聲凡六十聲宮徵商羽角隔八相生之序也由宮聲之濁而長以漸而清且短之序則為宮商角徵羽假令黃鍾為宮則相去一律而太簇為商又相去一律而姑洗

為角又相去二律以林鍾為徵又相去一律而南呂為羽羽距黃鍾之宮又相去二律馬相去一律則音節和相去二律則音節遠故角徵之間近徵收一聲比徵稍下曰變徵羽宮之間近宮收一聲少高于宮曰變宮所以濟五聲之不及也詳見律呂志律呂新書等此難盡具禮運旋相為宮謂十二律迴還迭相為宮也樂之功用能感神人之和如此則其教胄子而陶寫其性情流通其精神養其中和之德而救其氣質之偏蓋可想也變曰於以下為益稷錯簡無疑節初齊氏曰天高地下萬物散殊而禮制行矣流而不息合同而化而樂興焉是禮者兩儀對待之體而樂者一氣流行之用也故禮常節樂常和禮常嚴樂常泰禮常辨異樂常統同聖人以其分殊者制禮而使人心之不流又以其理一者作樂而使人心之不離是豈可以鐘鼓玉帛視之哉學者當知

其本 帝曰龍朕聖讒說殄行震驚朕師命汝作納言夙

夜出納朕命惟允

聖疾殄絕也殄行者謂傷絕善人之事也師衆也謂其言之不正而能變

亂黑白以駭衆聽也納言官名命令政教必使審之既允而後出則讒說不得行而矯偽無所托矣敷奏復逆必使審之既允而後入則邪僻無自進而功緒有所稽矣周之內史漢之尚書魏晉以來所謂中書門下者皆此職也輯錄聖只訓疾較好廣殄行是傷人之行書曰亦也敢殄戮用乂民殄殲乃誓皆傷殘之義廣納言似今中書門下省義刪納言之官如今之門下審覆自外而進入者既審之目內而宣出者亦審之恐讒說殄行之震驚朕師也廣納言之官如漢侍中今給事中朝廷詔令先過後省可以封駁天纂註一說自絕其行新安陳氏曰自孔注出納朕命以為臆下言納于上受上言宣于下蔡傳又小命令政教敷奏復逆以配出納然終于朕命二字欠通竊意欲其審君命之當否當者出之否者納之惟至于允當而止如後世批

敕審覆之官庶于出納朕命文義明順也新安胡氏
曰出納朕命如詩出納王命王之喉舌欲其謹審上之
命令命之善者宣出之不善者繳納之如後世封還詞
頭之類則在我者既允信尚何憂讒說之得入哉王
氏曰百揆百官之首故先命禹養民治之先務故次命
稷富然後教故次命契刑以弼教故次命皋工立成器
以為天下利人治之末故次命垂如此治人者略備矣
然後及草木鳥獸故次命益民物如此則隆禮樂之時
也故次命夔夔禮先樂後故先夷後夔樂作則治功成
矣庠賢雖盛治功雖成苟讒間得行則賢者不安前功
逆廢故命龍于末所以防讒間術羣賢以成其終猶命
十二牧而終以難任人夫子答為邦而終以遠任人也
帝曰咨汝二十有二臣欽哉惟時亮天功

二十二臣四
岳九官十二

牧也周官言內有百揆四岳外有州牧侯伯蓋百揆者
所以統庶官而四岳者所以統十二牧也既分命之又

總告之使之各敬其職以相天事也曾氏曰舜命九官新
命者六人命伯禹命伯夷咨四岳而命者也命垂命益
咨而命者也命變命龍困人之讓不咨而命者也夫知
道而後可宅百揆知禮而後可典三禮知道知禮非人
人所能也故必咨于四岳若予工若上下草木鳥獸則
非此之比故泛咨而已禮樂命令其體雖不若百揆之
大然其事理精微亦非百工庶務之可比伯夷既以四
岳之舉而當秩宗之任則其所讓之人必其中於典樂
納言之選可知故不咨而命之也若搜契皋陶之不咨
者申命其舊職而已又案此以平水土若百工各為一
官而周制同領于司空此以士一官兼兵刑之事而周
禮分為夏秋兩官蓋帝王之法隨時制宜所謂損益可
知者輯錄搜契皋陶變龍這五官秀才底官所以教他
如此輯錄掌教掌刑掌禮樂這便都是那秀才做底事
如那垂益之類便皆是做禮樂底聖賢所以只教
他治上虞治工之屬便是他只會做這般事

管蔡註

曰各敬其職惟是乃能信立天下之功陳氏大猷曰
皆當敬以趨時以輔相顯明天之功二十二人職雖不
同其為天之事則一故提其綱而總戒之新安陳氏
曰益之嘉言見于書者甚多禹臯之亞也觀禹薦益則
可見矣語錄謂益只做得虞書成事聖人固隨才
授官然隆古之才何施不可此語純錄者之誤

三載

考績三考黜陟幽明庶績咸熙分北三苗

考校實也三
考九載也九

載則人之賢否事之得失可見于是陟其明而黜其幽
賞罰明信人人力于事功此所以庶績咸熙也北猶背
也其善者留其不善者竄徙之使分背而去也此言舜
命二十二人之後立此考績黜陟之法以時舉行而卒
言其效如此也案三苗見于經者如典謨益稷禹貢呂
刑詳矣蓋其自固不服作臣下叛舜攝位而竄逐之禹
治水之時三危已宅而舊都猶頑不即工禹攝位之後
帝命沮征而猶逆命及禹班師而後來格于是乃得考

其善惡而分北之也呂刑之言過紀纂註唐孔氏曰此則通其本末而言不可以先後論也

纂註

以下史述舜

事非帝語也

陳氏大猷曰人情太寬則肆太嚴則拘

故考績于三載時加警策以作其怠黜陟于九載期之

久遠以要其成不肆不拘所以為善成周家宰哉終受

會詔廢置三載計治行誅賞世變不同故也一夏氏曰

分北三苗不與上文相連不可曲為之說北只音如字

三苗國在南遣之于北如周遷頑民之類王氏曰分北

三苗黜幽也然止于三苗黜者寡矣愚謂分北只是分

別義故文兩兩相背天地之氣始于北而終于北北者

陰陽之別也舜生三十徵庸三十在位五十載陟方乃死

也陟方猶言升遐也韓子曰竹書紀年帝王之沒皆曰

陟陟畀也謂昇天也書曰殷禮陟配天言以道終其德

協天也故書紀舜之沒云陟其下言方死者所以擇陟

為死也地之勢東南下如言舜巡守而死宜言下方不

得言陟方也。案此得之，但不當以陟為句絕耳。方猶雲徂乎方之方。陟方乃死，猶言沮落而死也。舜生三十年，堯方召用，歷試三年，居攝二十八年，通三十年，乃即位。又五十年而崩，蓋于篇末總叙其始終也。史記言舜巡守崩于蒼梧之野，孟子言舜卒于鳴條，未知孰是。今零陵九疑有舜塚云。

輯錄

舜生三十微庸數語

只依古注

纂註

孔氏曰：方道也。舜即位五十年，升道南

黜自好。廣。纂註。方巡守死于蒼梧之野，而葬焉。三十微庸三十在位，服喪三年，其一在三十之數，為天子五十

年凡壽百一十二歲。

皇極經世紀舜丙辰即位，至禹

十七年死，通為一百一十年。司馬公詩曰：虞舜在倦勤，薦禹為天子，豈有復南巡，迢迢渡湘水。

新安陳氏

曰：史於舜即位初，惟載咨岳牧，命九官，即以九載黜陟繼之。篇末總叙舜一生始終結之，中間幾五十年熙事。

可見何也。孔子曰：舜有臣五人而天下治。又曰：無為而治者，其舜也與！以此觀之，可見舜惟得聖賢之臣以共為

故終身可恭已而無為也。陟方猶云升天一方。武茂熊氏曰：舜典理會天道人道地道。說見前。此後言恤刑討罪所以去小人也。咨牧命官所以用君子也。末言考績黜陟之法其于君子小人之辨嚴矣。後之欲盡君道者當以此為法。蹟二典者當識此大意而後可以論堯舜之治矣。五峯胡氏曰：惡蹟五帝書而後知聖人澤及斯民之遠也。後世有立功于一時興利于一邦者人猶追思而祀之。是數聖人者有功于天下萬世曾不得推苗裔立宗子建廟庭春秋四時饗天下之報也有天下者端拱九重之內治其國家上之天文下之地理中之人倫衣食之原器用之利法度之章禮樂之則誰推明制作之也而忘之乎？戎狄之人駕一偏空說失事理之正而其神像乃得蟠據中華名山巍業相望又聽其雕梁畫棟羣倫滅三綱之人而恭養之此何道也？其不耕不植使漁民利耗蠹民財乃細事耳為政者恬不為慮中華無人可悲之甚矣。愚謂舜重華協于帝與克承無

分優劣而夫子稱大哉堯之為君君哉舜也尚不無異
于一字之間何也堯為治無迹蕩蕩難名故謂之大舜
責成臣下已若無為故謂之君今讀舜典一篇可見矣
自慎徽五典至汝陟帝位是堯試舜三年內事先為司
徒次為百揆次為四岳未為君之時也自受終文祖至
遏密八音是堯老舜攝二十八年內事不過以百揆代
堯行天子之事亦未為君之時也自格于文祖然後即
帝位方始稱帝舜之君道乃可見爾方攝位時巡四岳
朝諸侯封山濬川考禮正刑汲汲不少暇至即位後則
惟責成于牧岳九官舜不過執黜陟之權以激勵臣下
外此皆不復以身親之在位五十年間有天下而已若
不與豈非得為君之道故如是乎攝政以前可以見臣
道之勞即位以後可以見君道之逸乾知大始坤作成
物君臣之道猶乾坤也故夫子以君哉稱之非優堯而
劣舜也後之人主苟不任三公者有親閱吏案下行文
書者安識君道也哉叢脞惰墮舜無是事而臯猶有是

戒為君者
可以監矣

大禹謨

謨謀也林氏曰虞史既述二典其所載有未備者于是又叙其君臣之間嘉言

善政以為大禹皋陶謨益稷三篇所纂註孔氏以備二典之未備者今文無古文有纂註曰禹

稱大其功陳氏大猷曰序言禹成厥功指

禹之實也書名大禹謨以此書多禹之謨也禹

之功多見于謨之所述姜氏曰禹以功顯而

稱謨何也禹告舜曰后克艱而政又德政養民

而勿壞此禹之嘉謨也使治水之功雖成而不

克艱無德政則水患雖去患有甚于永者是前

日平患之功必有資于此謨以保其終也故夫

于序書以禹謨為先而禹貢為後以見嘉言之

益其在胙賦之功之上也與王氏曰休曰禹

以功畢以謨而禹亦謂之謨者以其功已見于

禹貢此則紀
其謨而已

曰若稽古大禹曰文命敷于四海祇承于帝

命教祇敬也帝謂舜

也文命敷于四海者即禹貢所謂東漸西被朔南暨聲教訖于四海者是也史臣言禹既已布其文教于四海矣于是陳其謨以敬承于舜如下文所云也文命史記以為禹名蘇氏曰以文命為禹名則敷于四海者為何事
輯錄吳氏云此書不專為大禹而作此十有七字當是後世模倣二典為之
此今案此篇稽古之下猶贊禹德而後篇便記皋陶之言其體亦不相類吳氏之說恐或然也
纂註孔氏曰言其外布文德教命內則敬承堯舜
呂氏曰
舜教如此亦已至矣方祇承于帝無一豪自有意見禹有君民之大德有事君之小心然祇承與重華異重華有日月並明之意祇承不過坤承乾之象此帝王之間

也
曰后克艱厥后臣克艱厥臣政乃乂黎民敏德

曰以下即

禹祇承于帝之言也艱難也孔子曰為君難為臣不易即此意也乃者難辭也敏速也禹言君而不收易其為君之道臣而不敢易其為臣之職夙夜祇懼各務盡其所當為者則其政事乃能修治而無邪慝下民自然觀感速化于善而輯錄自后克艱厥后至四夷來王只是有不容已者矣

纂註

林氏曰人知舜恭己以享無為之治深也書說

以艱難為戒惟君臣不忘于克艱此所以享無為之治也陳氏大猷曰君臣克艱乃政化之本原禹謨之綱領也忽其艱則玩愒其難則沮洳以為艱而不克盡其艱則畏而沮與忽而玩者均耳政禹不徒曰艱而必曰克也新安陳氏曰後世言政不及化政又而民敏德政非徒政政即化也此其功用皆本原于共政之君

臣精神心術中若臣克艱憂勤戒懼有未易以言語形容者人知政人而能使民敏德之不易則知若臣克艱之所以不

易者矣

帝曰俞允若茲嘉言罔攸伏野無遺賢萬邦

咸寧稽于衆舍已從人不虐無告不廢困窮惟帝時克

嘉善攸所也舜然禹之言以為信能如此則必有以廣延衆論悉致羣賢而天下之民咸被其澤無不得其所矣然非忘私順理愛民好士之至無以及此而惟堯能之非常人所及也蓋為謙辭以對而不敢自謂其必能舜之克艱于此亦可見矣程子曰舍已從人最為難事已者我之所有雖痛舍之尤懼守已者固而從人者輕也

輯錄

無告困窮也帝謂堯也書說

纂註

孔氏曰舜遂稱堯德以成其義考衆從人矜孤臨窮

凡人所輕聖人所重蘇氏曰無告天民之窮者困窮士之不過者陳氏經曰言罔伏至咸寧此時堯若可

以自足而猶稽衆從人不虐不廢堯之心不自足也使
于此自以為足而不如之意安足以為堯哉孔子以博
施濟衆安百姓為堯舜其猶病諸此足以形容堯之心
矣程子曰苟謂吾治已足則便不是聖人真氏曰
知為君之難易真知其難而能盡其道者難故曰允若
茲為帝時克世之人主謂言已用而不必求言不知伏
于下之難達也賢已得而不求賢不知遺于野者之難
進也惟堯于此一以難視之故能使言不伏賢不遺而
致萬邦之安雖然堯猶慮其難也方且稽衆以求事理
之當舍已以求人情之公易虐者不虐易廢者不廢皆
自克艱一益曰都帝德廣運乃聖乃神乃武乃文皇天
念為之

眷命奄有四海為天下君

廣者大而無外運者行之不息大而能運則變化不測故

自其大而化之而言則謂之聖自其聖而不可知而言則謂之神自其威之可畏而言則謂之武自其英華發

外而言則謂之文恭顧倉蓋也堯之初起不見于經傳
稱其自唐侯持起為帝觀並之言理或然也或曰舜之
所謂帝者堯也羣臣之言帝者舜也如帝德罔愆帝其念
我之類皆謂舜也蓋蓋因舜尊堯而遂美舜之德以勸之
言不持堯能如此帝亦當然也今案此說所引此類固
為甚明但蓋之語接連上句惟帝時克之下未應遽舍
堯而繫舜又徒極口以稱其美而不見其有勸勉規戒
之意恐唐虞之際未遽有此諛佞之風也依舊說贊堯
為輯錄却歎美之辭也都首君子之居鄙者野人
是輯錄之居故古者謂野為鄙謂都為美也書說纂註
孔氏曰蓋因舜言又美堯也言堯有此德故為天所命
所以勉舜也薛氏曰聖神武文即廣運之所發也
陳氏大猷曰廣如天之無不覆運如天之行健不息聖
神如天之造化不測武文如天之春生秋殺聖神自其
妙于無迹者言之武文自其顯于可見者言之知天德
則知帝德矣真氏曰廣運而與天同德故能受天之

命益之勉舜金

禹曰惠迪吉從逆凶惟影響

惠順迪道也逆反道

在廣運二字

者也惠迪從逆猶言順善從惡也禹言天道可畏吉凶之應于善惡猶影響之出于形聲也以見不可不艱者

以此而終

輯錄

書中迪字或解為道或解為行疑只是順字惠迪吉從逆凶以逆對迪可見書

中迪字用得皆輕也書說長孺問先生須得邵堯夫之術先生久之曰吾之所知者惠迪吉從逆凶滿招損謙

受益若明日晴明日吾之知者惠迪吉從逆凶滿招損謙

益曰吁戒哉儆戒無虞罔失法度

罔遊于逸罔淫于樂任賢勿貳去邪勿疑疑謀勿成百

志惟熙罔違道以干百姓之譽罔拂百姓以從己之欲

無怠無荒四夷來王

先吁後戒欲使聽者精審也儆與警同虞度罔勿也法度法則制度

也注過也當四方無可虞度之時法度易至廢弛故戒其失墜迨樂易至縱恣故戒其遊淫言此三者所當謹畏也任賢以小人間之謂之貳去邪不能果斷謂之疑謀圖為也有所圖為揆之于理而未安者則不復成就之也百志猶易所謂百慮也弗逆也九州之外世一見曰王帝于是八省朝夕戒懼無怠于心無荒于事則治道益隆四夷之遠莫不歸往中土之民服從可知今案益言八者亦有次第益人若能守法度不縱逸樂則心正身修義理昭著而于人之賢否孰為可任孰為可去事之是非孰為可疑孰為不可疑皆有以審其幾微絕其蔽惑故方寸之間光輝明白而于天下之事孰為道義之正而不可違孰為民心之公而不可拂皆有以處之不失其理而毫髮私意不入于其間此其懲戒之深旨所以推廣大禹克艱惠迪之謨也苟無其本而是非取舍決于一己之私乃欲斷而行之無所疑惑則其為害反有不可勝言者矣可不戒哉

輯錄

微古
文作

敬開元改今文書說當無虞時須是警戒者何也固失
法度固遊于逸固淫于樂人當無虞時易于失法度
遊淫逸樂故當戒其如此既知戒此則當任賢勿貳去
邪勿疑疑謀勿成如此方能固違道以干百姓之譽固
弗百姓以從已之欲也義剛聖賢言語自有箇血脉貫
在裏如此一段他先便說儆戒無虞蓋制治未亂保邦
未危自其未有可虞之時必儆戒能如此則不至失
法度遊于逸淫于樂矣若無箇儆戒底心欲不至于失
法度不淫佚不遊樂不可得也既能如此然後可以知
得賢者邪者正者謀可疑者無可疑者若是自家身心
顛倒便會以不賢為賢以邪為正所當疑者亦不知矣
何以任之去之勿成之哉蓋此三句便是從上面有三
句了方會恁地又如此然後能固違道以弗百姓之欲
蓋於賢否邪正疑審有所未明則何者為道何者為非道
何者是百姓所欲何者
纂註呂氏曰此蓋又言克難之
非百姓所欲哉憂操

纂註

呂氏曰

此蓋又

言克難之

非百姓所欲

哉憂操

陳氏大猷曰

步第之

徐常情皆知儆戒無事之時明主猶或玩弛儆戒則強
立而清明玩弛則頽放而昏塞林氏曰熙怠無荒所
謂不倦以終之也舜大聖人益所戒乃如此可見聖賢
兢業之誠矣王氏曰國失法度以下修之身者也任
賢勿貳以下修之朝者也周運道以下施之天下者也
新安陳氏曰自克艱至此五節文意相連實一時之
言禹以克艱告舜舜不自居歸時克于堯故益因言帝
德廣運以美堯禹又申其未盡之蘊以迪吉逆凶戒舜
故益因盡言畫一以戒舜若然則禹曰於帝念哉德惟
以廣運一節為美舜者其非明矣

善政政在養民水火金木土穀惟修正德利用厚生惟

和九功惟叙九叙惟歌戒之用休董之用威勸之以九

歌俾勿壞

益言儆戒之道禹歎而美之謂帝當深念益之
所言也且德非徒善而已惟當有以善其政

政非徒法而已在乎有以養其民下文六府三事即養
民之政也水火金木土穀惟修者水克火火克金金克
木木克土而生五穀或相制以洩其過或相助以補其
不足而六者無不修矣正德者父慈子孝兄弟恭夫
義婦聽所以正民之德也利用者工作什器商通貨財
之類所以利民之用也厚生者衣帛食肉不飢不寒之
類所以厚民之生也六者既修民生始遂不可以逸居
而無教故為之惇典敷教以正其德通工易事以利其
用制節謹度以厚其生使皆當其理而無所乖則無不
合矣九功合六與三也教者言九者各順其理而不汨
陳以亂其常也歌者以九功之叙而詠之歌也言九者
既已修和各由其理民享其利莫不歌詠而樂其生也
然始勤終怠者人情之常恐安養既久怠心必生則已
成之功不能保其久而不廢故當有以激勵之如下文
所云也董甯也咸古文作畏其勸于是者則戒勸而休
美之其急于是者則賢責而懲戒之然又以事之出于

勉強者不能久故復即其前目歌詠之言協之律呂播
之聲音用之鄉人用之邦國以勸相之使其歡欣鼓舞
趨事赴功不能自已而前日之成功得以久存而不壞
此周禮所謂九德之歌九韶之舞而太史公所謂伏能
思初安能惟始沐浴膏澤而歌詠勤苦者也葛氏曰洪範五
行水火木金土而已穀本在木行之數焉以其為民食之急
故別而輯錄問水火金木上穀惟修正德利用厚生惟
附之也輯錄和正德是正民之德否曰固是水如隄防
灌漑金如五兵田器火如出火納火禁焚萊之類木如斧
斤以時之類良久云古人設官掌此六府蓋為民惜此物
不使之妄用非如今世之民用財無節也戒之用休言
戒諭以休美之事勸之以九歌感動之意但不知所謂
九歌者如何周官有九德之歌大抵為只說綱目其詳不
可考矣人傑問戒之用休董之用威勸之以九歌林氏
謂自戒自董自勸未知此說如何先生曰九歌今亡其
辭不可稽考以理觀之恐是君臣相戒如賡歌之類答

滿于善韶與武令皆不可考但書所謂正德止九歌此便是作韶樂之本看得此歌本是下之人作歌不知當時如何取之以為樂却以此勸下之人又曰韶樂只是和而已南升功以九叙故樂以九成所謂九德之歌九韶之舞也劉潛夫問成之用休董之用威并九歌曰正是匡之直之輔之翼之之意九歌只是九功之叙可歌想邨時田野自有此歌今不可得見賀孫

纂註

唐孔氏曰此言五行與洪範之次不同洪範以生數

為次此以相克為次新安陳氏曰五行相克正洛書之序此亦禹則洛書之一端王氏炎曰政之大要莫切于養民六府養民之具也正德所以養其心利用厚生所以養其身溝澮之導濬之蓄井之汲水之修也鑽燧有變焚萊有禁火之修也產于地取之有時鎔範而成之金之修也植于山林斬之有時掄材而取之木之修也辨肥瘠相高下以植百物土之修也播種有宜轉穫有節穀之修也水以制火火以鍊金金以治木木以

聖上上以生穀此六府之序無恆產則無恆心六府修
然後可以正民德先富而後教以正德為先三事之序
也織絰而衣求耜而耕釜鬲而饗資六府以利用也老
有奉幼有長鰥寡廢疾皆有養資六府以厚生也六府出于
天地而修之在人三事行于天下而和之在人 息齋余
氏曰六府當以五材言洪範所謂潤下作鹹等皆言材耳
今曰水克火火克金金克木木克土而生五穀似全以
五氣言矣 蘇氏曰利用厚生先言正德者德不正雖
有粟吾得而食諸 張氏曰戒用休若周官大比興賢
能明其有功者屬其治地者之類董用威如周官大比
毛者有里布田不耕者出穀粟與鄉八刑糾萬民之類
是也 夏氏曰人情始勤終怠或忽而不念安保其不
壞故戒以休使知勤于此者有無窮之美董以威使知
急于此者有可畏之刑又勸以九歌使歌詠其事樂而
忘勞如是則民將終身惟六府三事是賴共起而修之
則養民之政豈有壞耶 吳氏曰勸以九歌者民已樂

之又因其情被之強歌以助其樂事赴功周官縣正趨其稼事里宰趨其耕耨籥章吹豳雅頌興夫為春酒殺羔羊及百日之蜡一日之澤古之遺制猶有存者呂氏曰俾字訓詳味消息盈虛者天理之常輔相財成者君道之大天下之理成必有衰成必有壞今九功既叙無也聖人所以成之董之勸之無非使之勿至于壞俾之者蓋聖人財成輔相以贊消息盈虛之理使之盛而不衰成而不壞也聖人無窮之心可見矣

帝曰俞

地平天成六府三事允治萬世永賴時乃功

水土治曰平言水土

既平而萬物得以成遂也六府即水火金木土穀也六者財用之所自出故曰府三事正德利用厚生也三者人事之所當為故曰事舜因禹言

輯錄

地平天成是包養民之政而推其功以美之也

事在義剛劉潛夫問書中六府三事林少穎云六府本乎天三事行乎人吳才老說上是施下是功未知孰是

先生曰林纂註

張氏曰天施地生洪水之患地不得以

說是賀孫

生天雖施之亦無自而成今地既平天

之功始成也

者也

呂氏曰雖歷萬世之遠不能外天地以有生外

六府三事以為治是禹之功與天地相始終也

帝曰格汝禹朕宅帝位三十有

三載耄期倦于勤汝惟不怠總朕師

九十曰耄百年曰

十三矣總率也舜自言既老血氣已衰故倦于勤勞之

事汝當勉力不怠而總率我眾也蓋命之攝位之事堯

命舜曰陟帝位舜命禹曰總朕師者蓋堯欲使

舜真宅帝位舜讓弗嗣後惟居攝亦若是而已纂註張

曰禹惜寸陰過門

不入不怠可知禹曰朕德罔克民不依臯陶邁種德

德乃降黎民懷之帝念哉念茲在茲釋茲在茲名言茲

在茲允出茲在茲惟帝念功

邁勇往力行之意種布降下也禹自言其德不能勝

任民不依歸惟臯陶勇往力行以布其德德下及于民而民懷服之帝當思念之而不忘也茲指臯陶也禹遂言念之而不忘固在于臯陶舍之而他求亦惟在于臯陶名言于口固在于臯陶誠發于心亦惟在于臯陶也蓋反覆思之而卒無有易于臯陶者惟帝深念其功而使之攝位也輯錄念茲在茲釋茲此人名言茲在茲允出茲在茲語默皆在此人名言則名言之允出則誠實之所發見者也人能問念茲在茲釋茲在茲允出茲在茲諸說皆以禹欲舜念臯陶而林氏以為禹自言其念之如此未知二說如何先生曰林說是答禹于善舜命禹宅百揆而禹讓稷契臯陶今不及稷契者史記載稷契皆帝嚳之子與堯為兄弟意其至是必已不復存矣纂注蘇氏曰種德如農之植殖衆人之種德也近朝種而蕃獲報亦狹矣臯之種德

也遠栽培之深厚滋養之豐裕及其充溢不已自沛然
如雨露之降民被其潤澤而懷之也張氏震曰禹所
遜獨皋者孟子論道之傳亦曰若禹皋陶則見而知之
又曰舜以不得禹皋陶為已憂書稱堯舜禹稽古獨以
皋配之揚雄論絕德亦曰舜以孝禹以功皋以讓以是
觀之自禹之外諸臣未有能先皋者也陳氏經曰皋
所掌者刑德安在至威之中至愛存焉慈祥惻怛之寓
雖刑也而實種德也王氏炎曰禹所以宅百揆以平
水之功禹不論功而論德曰已德周克皋陶之德可
以克已及繼以惟帝念功則皋之功亦不可忘也帝

曰皋陶惟茲臣庶罔或干予正汝作士明于五刑以弼

五教期于予治刑期于無刑民協于中時乃功懋哉

犯干

正政弼輔也聖人之治以德為化民之本而刑特以輔
其所不及而已期者先事取必之謂舜言惟此臣庶無

或有干犯我之政者以爾為上師之官能明五刑以輔五品之教兩期我以至于治其始雖不免于用刑而實所以期至于無刑之地故民亦皆能惕于中道初無有過不及之差則刑果無所施矣凡此皆汝之功也懲勉也益不聽禹之讓而稱輯錄法家者流往往常患其過舉陶之美以勸勉之也于慘刻今之士大夫恥為法官更相循襲以寬大為事于法之當死者反求以生之殊不知明于五刑以弼五教雖舜亦不免殺之不從刑以督之懲一人而天下人知所勸戒所謂辟以止辟雖曰殺之而仁愛之實已行于中今非法以求其生則人無所懲懼陷于法者愈眾雖曰仁之道以害之適夫聖人亦不曾使用政刑到德禮既行天下既治亦不曾不用政刑故書說刑期于無刑只是存心期于無而刑初非可廢人曰欽哉惟刑之恤哉只是說恤刑賀濂

纂註

唐孔氏曰無有干犯我正道者林氏曰聖人制刑非期于刑殺人凡以輔吾教之不及而已出教

則入刑出刑則入教使民趨教而刑為無用此聖人本
心也臯能體此意而行之使天下知有契之教而不知
有臯之刑蓋百官以無曠為能惟士不然必使民皆不
犯官若虛設始為能其官也陳氏經曰明刑以弼教
非特期至于治而已又期無刑焉且弼教以刑民猶有
所畏而為善也無刑而協中則無所畏而為善矣陳
氏大猷曰明五刑智也法守也期無刑仁也法外意也
協于中則不犯正不待論也程子曰中則不違于正正
未必中也禹之功脫民于昏墊以全其生臯
之功使民復其所受之中以全其所以生也臯陶曰帝
德罔愆臨下以簡御衆以寬罰弗及嗣賞延于世宥過
無大刑故無小罪疑惟輕功疑惟重與其殺不辜寧失
不經好生之德洽于民心茲用不犯于有司

經過也簡者不煩之

欽定四庫全書

卷一

謂上煩密則下無所容御者急促則衆擾亂嗣世皆謂子孫然嗣親而世疎也延遠及也父子罪不相及而賞則遠延于世其善善長而惡惡短如此過者不識而誤犯也故者知之而故犯也過誤所犯雖大必宥不忌故犯雖小必刑即上篇所謂青災肆赦怙終賊刑者也罪已定矣而于法之中有疑其可重可輕者則從輕以罰之功已定矣而于法之中有疑其可輕可重者則從重以賞之辜罪經常也謂法可以殺可以無殺殺之則恐陷于非辜不殺之恐失于輕縱二者皆非聖人至公至平之意而殺不辜者尤聖人之所不忍也故與其殺之而害彼之生寧姑全之而自受失刑之責此其仁愛忠厚之至皆所謂好生之德也蓋聖人之法有盡而心則無窮故其用刑行賞或有所疑則常屈法以申恩而不使執法之意有以勝其好生之德此其本心所以無所壅遏而得行于常法之外及其流衍洋溢漸涵浸漬有以入于民心則天下之人無不愛慕感悅興起于善而自不

犯于有司也畢陶以舜美其功故言此以歸功于輯錄
其上蓋不敗當其褒美之意而自謂已功也

向蒙誨誨堯舜之世一用輕刑當時嘗以所疑為請勿
勿不及究其說近熟思之亦有不可不論者但觀畢陶
所言帝德罔愆以下一節便是聖人之心涵育發生真
與天地同德而物或自逆于理以干天誅則夫輕重取
舍之間亦自有決然不易之理其有過非私恩其則故非
私恕罪疑而輕非姑息功疑而重非過予如天地四時
之運寒涼肅殺常居其半而涵養發生之心未始不流
行乎其間此所以好生之德洽于民心而自不犯于有
司非既抵罪而復縱舍之也夫既不能止民之惡而又
為輕刑以誘之使得以肆其凶暴于人而無所忌則不
惟彼見暴者無以自伸之為寬而姦民之犯于有司者
且將日以益衆亦非聖人正直輔翼使民遷善遠罪之
意也答鄭景望罪疑惟輕豈有不疑而強欲輕之理
乎王季海當國好出人死罪以積陰德至于奴與佃客

殺主亦不纂註

孔氏曰刑疑從輕賞疑從重忠厚之至

至死人傑纂註呂氏曰自臨下以簡以下皆舜好生之

德此一段苟無刑故無小一句好生之義不備聖人于

故犯雖小必刑蓋不事姑息而濟仁以義乃見聖人好

生不偏處過慈近于姑息反所以害仁吳氏曰與其殺

不辜寧失不經蓋設辭以形容好生之德陳氏大猷曰

天地之大德曰生君得天地生物之心以為心曰好生

上好人之生人亦自好其生仁心之相感也新安陳氏

曰舜以無刑為皋之功皋推原所以無刑本于帝好生

之德而不敢以為已功也舜欲遜禹禹欲遜皋禹皋是

時皆在帝之前數章相聯帝曰俾予從欲以治四方風

皆一時對面應答之言也

動惟乃之休民不犯法而上不用刑者舜之所欲也汝

動莫不靡然是乃汝之美纂註呂氏曰掌刑何以能風

也齊又申言以重歎美之纂註動四方蓋舉之刑非徒

刑乃德教也四方鼓舞
于德教中休孰加焉

帝曰來禹泇水傲予成允成功

惟汝賢克勤于邦克儉于家不自滿假惟汝賢汝惟不
矜天下莫與汝爭能汝惟不伐天下莫與汝爭功予懋

乃德嘉乃丕績天之厯數在汝躬汝終陟元后

泇水洪
水也古

文作降孟子曰水逆行謂之洚水蓋山崩水渾下流淤
塞故其逝者輒復反流而泛濫決溢洚洞無涯也其災
所起雖在堯時然舜既攝位害猶未息故舜以為天警
懼于已不敢以為非已之責而自寬也允信也禹奏言
而能踐其言試功而能有其功所謂成允成功也禹能
如此則既賢于人矣而又能勤于王事儉于私養此又
禹之賢也有此二美而又能不矜其能不伐其功然其
功能之實則自有不可掩者故舜於此復申命之必使

攝位也懋懋古通用懋盛大之意至大績功也懋乃德
者禹有是德而我以為盛大嘉乃不績者禹有是功而
我以為嘉美也歷數者帝王相繼之次第猶歲時氣節
之先後汝有咸德大功故知歷數當歸于汝汝終當升
此大君之位不可辭也是時舜方命策註呂氏曰公孫
禹以居攝未即天位故以終陽言也弘謂堯使禹
治水未開舜有洪水也舜在當時認洪水為已責弘居
百世下乃推而歸之堯聖人小人之相萬也禹解矣
治水人易疑之禹能使人信于未成功之先故功成于人
已信之後夏氏曰常人恃功而怠安能勤矜功而侈安
能儉新安陳氏曰通歷曰禹不貴人璧而重寸陰語曰
禹菲飲食惡衣服克勤克儉之實也孔氏曰自賢曰矜
自功曰伐呂氏曰纔立已便有物與我對對則必爭一矜
伐其功能便有爭之理矜伐者爭之對也不矜不伐無
我也無我則無對無對則無爭陳氏起曰能者忌之媒
巧者爭之府禹以不矜伐之心而起天下不爭之心聖

賢所為盡已而已初無分外之事事親若曾子者可也
初未嘗以曾子為過乎分外益已所當為之事能盡此
者方能免于責爾尚何矜伐之有如禹之功皆是禹所
當然故禹自不見其為功能也王氏曰矜有執持之意
伐有夸大之意故以矜言能以伐言功伐甚于矜也能
過天下而不矜故天下愈服其能功高天下而不伐故
天下愈服人心惟危道心惟微惟精惟一允執厥中
服其功人心惟危道心惟微惟精惟一允執厥中
知覺主于中而應于外者也指其發于形氣者而言則
謂之人心指其發于義理者而言則謂之道心心易
私而難公故危道心難明而易昧故微惟能精以察之
而不雜形氣之私一以守之而純乎義理之正道心常
為之主而人心聽命焉則危者安微者著動靜云為自
無過不及之差而信能執其中矣堯之告舜但曰允執
其中今舜命禹又推其所以而詳言之蓋古之聖人將
以天下與人未嘗不以其治之之法并而傳之其見于

經者如此後之人若其

輯錄

士毅問先生說人心是形

可不深思而敬守之哉
同四肢之屬先生曰固是人問如此則求可便謂之私
欲先生曰但此數件事屬自家體段上便是私自底物
不比道便公共故上面便有箇私底根本且如危亦未
便是不好只是有箇不好底根本問程子曰人心人欲
也文公曰人欲也未全是不好謂之危者危險欲墮未
墮之間若無道心以御之則一而至于邪惡又不止于危
也問聖人亦有人心不知亦危否曰聖人全是道心主
宰故其人心自是不危若只是人心也危故曰惟聖罔
念作狂格言節問人心惟危則當去了人心否曰從道
心而不從人心可敬之謂善欲仁而仁至使所欲如
此人豈可無惟欲其所不欲乃私耳私欲當去心字大
爾雅通擇危者欲陷未陷之辭子靜說得是格言道心
人心之理節道心惟微者難明有時發見些子使自家
見得有時又不見了惟聖人使辨之精守得微頭徹尾

學者則須是擇善而固執之方。子子上以書來云：去冬問人：心道心先生云：此心之靈，其覺于理者，道心；其覺于欲者，人心也。武子問：人心惟危，道心惟微，道心是先得，人心是形氣所有，但地步較闊，道心却在形氣中，所以人心易得，陷了道心也是如此。否曰：天下之物，精細底更難見，鄙人心便是麤底，且如飢渴寒暖便是至麤底，這雖至愚之人亦知得，若以較細者言之，如利害則禽獸已有不能知者，若是義理則愈是難知，這只有些子不多，所以說人之所以異于禽獸者，幾希，言所爭也不多。或問：人之道心之別，曰只是這一箇心，知覺從耳目之欲上去便是人心，知覺從義理上去便是道心，人心則危而易陷，道心則微而難著，微亦微妙之義。學索自人心而收之，則是道心；自道心而放之，便是人心。惟聖周念作狂，惟狂克念作聖，近之人心如卒徒，道心如將伯，明問人：心道心之別，曰如喜怒則人心也，然無故而喜焉，喜至于過而不能禁，無故而怒焉，怒至于甚。

而不能遏是皆為人心之所使也。須是喜其所當喜，怒其所當怒，乃是道心。問：飢食渴飲，此是人心，否？曰：然。須是食其所當食，飲其所當飲，乃不失所謂道心。若飲盜泉之水，食嗟來之食，則人心勝而道心亡矣。問：人心可以無否？曰：如何無得？但以道心為主，而人心每聽命焉耳。又曰：飢欲食，渴欲飲者，人心也得飲食之正者，道心也。須是一心只在道心上，少間那人心自降伏，得不見了。人心與道心為一恰似無了。那人心相似只是要得道心純，一道心都發見在那人心上。問：人心道心曰：飢食渴飲，人心也如是，而飲食如是，而不飲，食道心也。喫做人便有形氣，人心較切近于人道心。雖先得之，然被人心隔了一重，故難見道心。正如清水之在濁水，惟見其濁，不見其清。故微而難見。人心如孟子言耳目之官，不思道心如言心之官，則思故貴先立乎其大者，人心只見那邊情欲利害之私。道心只見這邊道理之公。有道心則人心為人節制，人心皆道心也。伯羽問：人心

道心既云上智何以更有人心曰拙者痛癢者痒此非
人心而何人自有人心道心一箇生于血氣一箇生于
理飢寒痛痒此人心也惻隱羞惡是非辭遜此道心也
雖上智亦同一則危殆而難安一則微妙而難見必使
道心常為一身之主而人心每聽命焉乃善也經云
心為主則人心亦化而為道心矣如鄉黨所記飲食衣
服本是人心之發在聖人分上則渾是道心也當但謂
之人心則固未以為惡皆邪惡但謂之危則固未以為
便至凶咎亦不難矣此其所以為危非若道心之必善而
無惡有安而無傾有準的而可據依也故必致精于一
此兩者之間使公而無不善者常為一身萬事之主而
私而或不善者不得與焉則凡所云為不待擇于過不
及之間而自然無不中矣頃是知將道心去用卽人
心方得人心亦未全是不好故只言危蓋從形體上
言泛泛無定向故言其危聖人不以人心為主而以道

心為主益人心倚靠不得人心如船道心如舵任船則所在無定內若執定舵則去住在我問人心道心惟精惟一曰人心道心元來只是一箇精是辨之明一是守之專卓程子曰人心人欲也道心天理也所謂人心者是血氣和合做成先立以手指身嗜欲之類皆從此出故危道心則是本來稟受得仁義禮智之心聖人以此二者對待而言政欲其察之精而守之一也察之精則兩箇界限分明專一守著一箇道心不令人欲得以干犯譬如一物判作兩片便知得一箇好一箇惡克舜所以授受之妙不過如此德明因論惟精惟一曰虛明安靜乃能精辨而不雜誠篤確固乃能純一而無間斷人心是飢而思食寒而思衣底心思食後思量合當食與不食思衣後思量合當著與不著這便是道心聖人也不能無人心但聖人常常合著卽道心不教人心勝了道心這二者也須子細辨別精去揀擇若揀得不精又便只是人心惟精是要揀擇惟一是要要常守得

令人固有其初揀得精後來被物欲引從人心去所以
又貴于惟一精一是舜教禹做工夫處問堯舜禹大
聖人也允執厥中執字似亦大段喫力如何曰聖人關
不思不勉然使聖人自有此意則周念兩作狂矣經言
此類不一更細思之人傑中只是箇恰好的道理允信
也是真箇執得堯告舜只這一句舜告禹又添人心道
心精一三句又較子細三句是允執厥中以前事是舜
教禹做工夫處堯告舜一句是舜已曉得卿三句了不須
更告如論語後面說謹權量審法度修廢官舉逸民之
類皆是恰好當做底事這便是執中處堯舜禹湯文武
相傳治天下之大法聖門所說也只是這箇道理雖是
聖人治天下纖悉不止此然要處都不出此格言舜禹
相傳只是說人心惟危止允執厥中只就這心上理會也
只在日用動靜之間求之不是去虛空中討一箇物事
來惟皇上帝降衷于下民天叙有典天秩有禮天便是
這箇道理這箇道理只在日用間存養是要養這許多

欽定四庫全書

卷一

道理在中間這裏正好着力寓人心惟危是知覺口之
于味目之于色耳之于聲底末是不好只是危若便說
箇人欲已屬惡了何用說危道心是知覺道理底惟微
是做妙亦是做隱惟精是要別得不雜惟一是要守得
不離惟精惟一所以能允執厥中從周問人心惟危道心
惟微做是做妙難體危是危動難安否曰是危動難安大
凡狗人欲自是危險其心忽然在此忽然在彼又忽然
在四方萬里之外莊子所謂其熱焦火其寒凝冰凡苟
免者皆幸也動不動便是墮坑落壑危孰甚焉又問精
一曰精是精別此二者一是守之固伊川云惟精惟一
所以至之允執厥中所以行之此語甚好文蔚舜功問
人多要去人欲亦太畏之如未上船先作下水計較不
若于天理上理會理會得天理人欲自退曰堯舜不如此天
理人欲是交界處不是兩箇人心不成都流只是占得
多道心不成十全亦是占得多須是在天理則明天理
在人欲則去人欲嘗愛五峯云天理人欲同行異情此

語甚好舜功云陸子靜說人心混混未別曰此說亦不妨大抵人心道心只是交界不是兩箇物觀下文惟情惟一可見德粹問既曰精一何必云執中曰允字有道理惟精惟一則信乎其能執中也可學人心不全是

不好底若人心是全不好底不應只下箇危字蓋為人心易得走從惡處去所以下箇危字若全不好則是都倒了何止于危危是危殆道心惟微微是微妙亦是微味惟精惟一是兩截工夫精是辨別得這物事若說道心天理人心人欲却是兩箇心人只有一箇心知覺從道理上去便是道心知覺從聲色臭味上去便是人心不爭得多只爭得些子辨別了又須固守他若不辨別得時固守箇甚麼辨別得了又不固守則不長遠惟能如此所以能合于中道人心人欲也此語有病即知覺得聲色臭味底便是人心雖上智不能無此豈可謂全不是善哉程子曰人心人欲故危殆道心天理故精微惟精以致之惟一以守之如此方能執中此言盡之矣惟

精者精密之而勿雜也。惟一者有首有尾專一也。此自來
舜以來所傳未有他議論特堯有此言。聖人心法無以易
此經中此意極多。所謂擇善而固執之。擇善則惟精也。固
執則惟一也。又如博學之審問之謹思之明辨之皆惟精也。
且如篤行之是惟一也。至如明善是惟精也。誠身便是惟
一也。大學致知格物非惟精不可能。誠意則惟一矣。學是
學此道理。孟子以後失其傳亦只是失此。洛雖聖人不能無
人心如飢食渴飲之類。雖小人不能無道心。如見孺子入井而
惻隱皆是人心。堯舜不能無道心。桀紂不能無人心。易流故危
道心即惻隱羞惡之心。其端甚微。精字只脉縫上見得分
明。一是守之固守得徹頭徹尾。如顏子擇中是精得一善
拳拳服膺而勿失。便是一允。執厥中是其效也。人心是此身
有知覺嗜欲者。如所謂感于物而動性之欲也。此豈能
無。但為物誘而至于陷溺則為害耳。道心則義理之心
可以為人心之主宰。而人心據以為準者也。且如飲食
言凡飢渴欲得飲食。人心也。然必有義理存焉。有可以

食有不可以食如子路食于孔悝此不可食者當使人
心每聽道心之區處方可耳然此道心却雜出于人心
之間微而難見必須精之一之而後中可執然此又非
有兩心也只是人欲與義理之辨爾允執厥中堯之
所以授舜也人心惟危止厥中者舜之所授禹也堯之
一言至矣盡矣而舜復益之以三言者則所以明大虎
之一言必如是而後可庶幾也蓋當論之心之虛靈知
覺一而已矣而以爲有人心道心之異者則以其或生于
形氣之私或原于性命之正而所以爲知覺者不同是
以或危殆而不安或微妙而難見耳然又莫不有是形
故雖上智不能無人心亦莫不有是性故雖下愚不能無
道心二者雜于方寸之間而不知所以治之則危者愈
危微者愈微而天理之公卒無以勝夫人欲之私矣精
則察夫二者之間而不雜也一則守其本心之正而不
離也從事于斯無少間斷必使道心常爲一心之主而
人心每聽命焉則危者安微者著而動靜云爲自無過

不及之差
無稽之言勿聽弗詢之謀勿庸

無稽者不考于古弗詢者

不咨于衆言之無據謀之自專是皆一人之私心而非天下之公論皆妨害政治之大者也言謂泛言勿聽可矣謀謂計事故又戒其勿用也上文既言存心出治之本此又告之以聽言處事之要內外相資而治道備

矣

可愛非君可畏非民衆非元后何戴后非衆罔與守

邦欽哉慎乃有位敬修其可願四海困窮天祿永終惟口

出好興戎朕言不再

可愛非君乎可畏非民乎衆非君則何所奉戴君非民則誰與守邦

欽哉言不可不敬也可願猶孟子所謂可欲几可願欲者皆善也人君當謹其所居之位敬修其所可願欲者苟有一毫之不善生于心害于政則民不得其所者多矣四海之民至于困窮則君之天祿一絕而不復續豈

不深可畏哉此又極言安危存亡之戒以深警之雖知其功德之盛必不至此然猶欲其戰兢兢兢無暇豫而謹之于毫釐之間此其所以為聖人之心也好善也戎兵也言發于口則有一者之分利害之幾可畏如此

吾之命汝益已審矣豈復更有他

纂註

陳氏大猷曰人

說蓋欲禹受命而不復辭避也心法傳道統也可愛非君以下示治法傳治統也新安陳氏曰堯授舜舜授禹言有詳略而精微之理敬畏之心戒慎之辭一也堯之傳舜曰天之歷數在爾躬允執其中四海困窮天祿永終舜之傳禹凡所得于堯之四句一一為禹言之中間不過增益十有三句今義理益明儆戒益至耳合堯曰禹謨二篇而觀之可見矣

禹曰枚卜功臣惟吉之從帝曰禹官占惟先蔽志昆命于元龜朕志先定詢謀僉同鬼神其依龜筮協從卜不

習吉禹拜稽首固辭帝曰毋惟汝諧

枚卜歷卜之所言人事已盡

禹不容復辭但請歷卜有功之臣而從其告莫自以當之者而已得遂其辭也官占掌占卜之官也蔽斷昆後龜卜筮著習重也帝言官占之法先斷其志之所向然後令之于龜今我之志既先定而衆謀皆同鬼神依順而龜筮已協從矣又何用更枚卜乎況占卜之法不待重吉也固辭再辭也母者禁止之辭言惟汝可以諧此元后之位也

纂註

王氏曰木幹曰枚枝曰條枚有條故數物曰枚數事曰條枚卜人人而卜之也

氏十朋曰古人以昆為兄兄為父後故訓昆為後與後昆之後同

陳氏經曰習重習也如習坎重險也

氏曰卜汝已吉豈有更卜他人而重告者

陳氏經曰

人謀鬼謀雖欲其合大率以人謀為先就人謀中又以人謀為主

正月朔旦受命于神宗率百官若帝之初

神宗

堯廟也蘇氏曰堯之所從受天下者曰文祖舜之所從受天下者曰神宗受天下于人必告于其人之所從受者禮曰有虞氏禘黃帝而郊嚳祖顓頊而宗堯則神宗為堯明矣正月朔旦禹受攝帝之命于神宗之廟總率百官其禮一如帝舜受終之初等事也

纂註

新安陳氏曰朱子訂傳元本有曰正月次年

以神宗為堯廟未知是否如帝之初等事益未嘗實言為堯廟今本云云其朱子後自改乎抑蔡氏所改乎語錄嘗云堯廟當立于丹朱之國又云祭法之說伊川以為可疑更當博考吳氏曰祭法必有所據舜受堯之天下今以授禹其宗堯為宜或謂舜不當立堯廟然堯與舜皆黃帝之後其宗堯何嫌愚案朱子親集書傳自孔序止此其他大義悉口授蔡氏并親索百餘段俾足成之

帝曰咨禹惟時有苗弗

率汝徂征禹乃會羣后誓于師曰濟濟有衆咸聽朕命

蠢茲有苗昏迷不恭侮慢自賢反道敗德君子在野小

人在位民棄不保天降之咎肆予以爾衆士奉辭伐罪

爾尚一乃心力其克有勲

徂往也舜咨嗟言今天下惟是有苗之君不脩教命汝往征

之征正也往正其罪也會徵會也誓戒也軍旅曰誓有會
會有誓自唐虞時已然禮言商作誓周作會非也禹會
諸侯之師而戒誓以征討之意濟濟和整衆威之貌蠢
動也蠢蠢然無知之貌昏迷迷惑也不恭不敬也言苗
民昏迷不敬侮慢于人妄自尊大反戾正道敗壞常德
用舍顛倒民怨天怒故我以爾衆士奉帝之辭罰苗之
罪爾衆士庶幾同心同力乃能有功此上禹誓衆之辭
也林氏曰堯老而舜攝者二十有八年舜老而禹攝者
十有七年其居攝也代總萬機之政而堯舜之為天子
益自若也故國有大事猶稟命焉禹征有苗盡在夫居

攝之後而稟命于舜禹不敢專也以征有苗推
之則知舜之誅四凶亦必稟堯之命無疑 纂註陳氏

曰舜時薄海內外皆迪有功弗率惟有苗耳三苗之君
舜嘗竄之三苗之民又嘗分之至此而猶弗率故征之

孫氏曰指其君長則曰有苗兼其君民言則曰苗
民以種類言則曰三苗 陳氏大猷曰其豫期之辭三

旬苗民逆命益贊于禹曰惟德動天無遠弗届滿招損

謙受益時乃天道帝初于厯山往于田日號泣于旻天

于父母負罪引慝祗載見瞽瞍變變齋慄瞽亦允若至

誠感神矧茲有苗禹拜昌言曰兪班師振旅帝乃誕敷

文德舞干羽于兩階七旬有苗格
三旬三十日也以師臨之閱月苗頑猶不

聽服也。贊佐屈至也。是時益益從禹出征以苗。負固恃強未可滅服。故贊佐于禹。以為惟德可以動天。具感通之妙。無遠不至。益欲禹還兵而增修其德也。滿損謙益。即易所謂天道虧盈而益謙者。帝舜也。歷山在河中府河東縣。仁覆閭下。謂之是日。非一日也。言舜耕歷山。往于田之時。以不獲順于父母之故。而日號呼于天。于其父母。益怨慕之深也。負罪自負其罪。不敢以為父母之罪。引慝自引其慝。不敢以為父母之慝也。祇敬戴事也。瞽長老之稱。言舜敬其子職之事。以見瞽瞍也。齋莊敬也。懷戰慄也。變變莊敬戰慄之容也。舜之敬畏小心而盡于事親者如此。允信若順也。言舜以誠孝感格。雖瞽瞍頑愚亦且信順之。即孟子所謂底豫也。誠感物曰誠。益又推極至誠之道。以為神明亦且感格。而況于苗民乎。昌言盛德之言。拜所以敬具言也。班還振整也。謂盤旅以歸也。或謂出曰班師。入曰振旅。謂班師于有苗之國。而振旅于京師也。誕大也。文德文命德教也。干楮

羽翳也皆舞者所執也而階賓主之階也七旬七十日也格至也言班師七旬而有苗來格也舜之文德非自禹班師而始數苗之來格非以舞干羽而後至史臣以禹班師而歸弛其威武專尚德教干羽之舞雍容不迫有苗之至適當其時故作史者因即其實以形容有虞之德數千載之下猶可以是以而想其一時氣象也

輯

錄

號泣于旻天呼天而泣也于父母呼父母而泣也孟

之意

纂註

呂氏曰苗民障蔽之深譬如春氣既至而陰

廣不矜伐如此而益猶以滿損謙益為言蓋兢業不已之誠猶懼其有一毫非苗而是已之心故以此開端而引帝之負罪變變以實之欲其謙謙之益勉也益又凡三致意謂天道之遠而德可動瞽瞍之頑而孝可若神明之幽而誠可感苗亦人耳豈有德之誠誠之至而不可動者當不煩兵而有服也新安胡氏曰禹誓師曰

爾尚一乃心力欲以力而成功也三旬而力未足以成
功于是益有惟德動天之說欲尚德而不尚力也禹于是
班師帝乃誕敷文德而苗自格焉不尚力爭而務德化
可見唐虞氣象若後世遇逆命自窮兵黷武而已肯班
師乎唐孔氏曰益贊禹修德而帝自誕敷文德見君
臣同心張氏曰帝之文德素敷至此又誕敷之聖人
躬自厚之意呂氏曰禹自會此理聞益之贊神領心
受如曾子之唯便班師而還其從如響略無疑滯干羽
舞階朝廷閒暇自然而然非故為如此而有苗自格正如春
氣流暢寒谷草木自皆發榮也唐孔氏曰九武舞執干
文舞執羽愚謂禹雖以治水為功而功之外有克艱
之謨是謨也大闢萬世為君之道其功其謨非臯益稷
所得而先也且此篇所記又有舜禹授受一大事安得
不以接二典之後冠三謨之首哉大抵一篇之中自后
克艱至時乃功所以發明究竟克艱之旨自格汝禹至
若帝之初皆所以紀述授受之辭而征苗一節則攝位

後事也前一大節中其綱領在后臣克艱後一大節中其綱領在人心道心二者皆于心上用功必能致察于人心道心之間純乎義理之正而不雜于形氣之私則人欲淨盡天理流行自然見得宇宙內事皆職分內事職分內事皆性分內事而於克盡君道之艱自見其當然有不必勉而能之者矣

臯陶謨

今文古文皆有

曰若稽古臯陶曰允迪厥德謨明弼諧禹曰兪如何臯

陶曰都慎厥身修思永惇叙九族庶明勵翼邇可遠在

茲禹拜昌言曰兪

稽古之下即記臯陶之言者謂考古臯陶之言如此也臯陶言為君而信

蹈其德則臣之所謀者無不明所弼者無不諧也兪如何者禹然其言而復問其詳也都者臯陶美其問也慎

者言不可不致其謹也身修則無言行之失思永則非淺近之謀厚叙九族則親親恩篤而家齊矣庶明勵翼則羣哲勉輔而國治矣邇近茲此也言近而可推之遠者在此道也蓋身修家齊國治而天下平矣皋陶此言所以推廣允迪謨明之義故禹復俞而然之也又案典謨皆稱稽古而下文所記則異典主記事故堯舜皆載其實謨主記言故禹皋陶則載其謨后克艱厥后臣克艱厥臣禹之謨也允迪厥德謨明弼諧皋陶之謨也然禹謨之上增文命數于四海祗承于帝者禹受輯錄問舜天下非盡皋陶比例立言輕重于此可見

輯錄 允問

也厥德謨明弼諧疑是稱皋陶先生曰若以為稱皋陶則下句禹曰俞者為何所俞邪此八字是皋陶之言禹善之而問其詳故皋陶復說下句解此八字之義或云此八字是言皋陶之德諧字下別有皋陶之言今脫去未知是否姑存之可也谷滿子善鉢問此二句是形容皋陶之德或是皋陶之言先生曰下文說謹厥身修思

永是允迪厥德意庶明勵翼是謨明弼諧意恐不是形容畢陶底語又問此是就人君身上說否先生曰是就人主身上說謨是人主謀弼是人臣輔翼與之和合同寅協恭之意庶明勵翼庶明是眾賢樣言賴眾明者勉勵輔翼

纂註

蘇氏曰聞虞世而謂禹皋為古可乎曰自今以上皆古何必異代春秋傳引虞書皆

云夏書安知非作于夏時乎林氏曰此篇首尾皆與禹言其實陳于舜前史記曰帝舜朝禹皋陶相與語帝前是也迪如啟迪之迪罔命曰迪上言臣欲允誠以啟迪君德則謨必貴明弼必貴諧不明則不能開陳不諧則祇以抵牾皋欲與禹以此事舜也新安陳氏曰允迪厥德謨明弼諧孔注亦以為皋之言但謂君當信而古人之德耳益迪德之君則臣言易入故謨易以明而弼易以諧皋欲君迪德以為已陳謨之地也呂氏曰此史言皋之為人有德者有言皋以謨聞天下知其謨不知其出于德故指其根本以示人

蘇氏曰禹曰俞

欽定四庫全書

卷一

上當有闕文 李氏南臣曰其謨發端曰慎厥身修思永一書之要領也取人以身修身者知人以安民之本

與新安胡氏曰程子家人卦傳曰正倫理篤恩義家人之道也惇者篤恩義叙者正倫理二字盡齊家之道

陳氏曰九族宜厚其厚之也有次序不至為夷子之二本也 呂氏曰齊家治國平天下皆自修身出故慎

于身修必思永長之理可久而後功用無窮也 陳氏大猷曰治無二本邇可則遠在此矣 王氏炎曰皋陶之

謨有三修身也知人也安民也而修身為本故先言之邇者既可由是推之邇與天下無不可者其本在此而

不在彼也在此者無他修身而已矣 真氏曰皋陶陳謨未及他事首以謹修其身為言蓋人君一身天下國家

之本慎之一言又修身之本也思永欲其悠久不息也為君孰不知身之當修然心或放則能暫而不能久必也

悠久不息常思所以致謹然後謂之永否則朝勤夕怠乍作乍止果何益哉後世人主有初鮮終由不知思永

也慎則敬而不忽思永則久而不忘修身之道備矣然
後以親親尊賢二者繼之九族必有以篤叙之使均被
吾恩眾賢必有以勤勵之使樂為吾輔身為之本而二
者又各盡其道則自家可推之國自國可推之天下其
道在此而巳中庸九經之序其亦有所祖于此與陳
氏經曰禹皋同列之際或都或俞或吁或咈或如何無
非真情實意之所發有合于心則都之俞之不合則吁
之咈之善之在人猶在已也故聞言而拜不為諂善之
言而先曰都不為矜

皋陶曰都在知人在安民禹曰吁

咸若時惟帝其難之知人則哲能官人安民則惠黎民
懷之能哲而惠何憂乎驩兜何遷乎有苗何畏乎巧言

令色孔子

皋陶因禹之俞而復推廣其未盡之旨歎美
其言謂在于知人在于安民二者而已知人

智之事安民仁之事也禹曰吁者歎而未深然之辭也
時是也帝謂堯也言既在知人又在安民二者兼舉雖
帝堯亦難能之哲智之明也惠仁之愛也能哲而惠猶
言能知人而安民也遷竄巧好令善孔大也好其言善
其色而大包藏山惡之人也言能哲而惠則智仁而盡
雖黨惡如驩兜者不足憂昏迷如有苗者不足遷與夫
好言善色大包藏山惡者不足畏是三三者舉不害吾之
治極言仁智功用如此其大也或曰巧言令色孔壬共
工也禹言三凶而不及鯀者為親者諱也楊氏曰知
人安民此舉陶一篇之體要也九德而下知人之事也
天叙有典而下安民之道也非

纂註

陳氏經曰威若是謂慈
在知人安民兩者

知人然後能安民又其序也陳氏經曰威若是謂慈
如上所言皆如是也孔氏曰帝堯亦以知人安民為

難張子曰帝謂舜也堯呂真同吳氏曰孔氏不察謂
帝其難之為堯觀誅及四凶等則此帝為舜明矣新

安陳氏曰此處言帝但當指舜與益曰帝德廣運不同
彼上文有惟帝時克舜方美堯故益承其說美堯此禹
皋相與言于舜前舍舜言堯何所因邪禹于克難之理
實踐深知而知知人安民之為不易故吁以數其難而
謂兼盡之雖舜猶難也帝其難即堯舜其猶病諸之意
知人必哲始能官人安民必惠黎民始懷二者之難可
知矣果能哲且惠則哲可以知人何憂驪之黨惡惠可
安民何遷苗之害民知人視安民尤重而居先故申言
知人之事又何畏巧令孔壬至此則前所謂難之今何
憂何遷何畏不見其為難矣非禹深知篤信克艱之理
孰能發明至此林氏曰舜既流放竈三凶其心惟恐
又有如此之人復出為惡未嘗忘憂畏之心也真氏
曰孔壬古注以為甚佞介甫謂其包藏禍心益以壬為
妊娠之妊胡氏非之以為此訓將以腹誹罪人也不若從
孔注為長

皋陶曰都亦行有九德亦言其人有德乃言曰載

來來禹曰何臯陶曰寬而栗柔而立愿而恭亂而敬擾

而毅直而溫簡而廉剛而塞彊而義彰厥有常吉哉

亦總也亦

行有九德者總言德之見于行者其凡有九也亦言其人有德者總言其人之有德也載行來事也總言其人有德必言其行某事某事為可信驗也禹曰何者問其九德之目也寬而栗者寬弘而莊栗也柔而立者柔順而植立也愿而恭者謹愿而恭恪也亂治也亂而敬者有治才而畏敬也擾馴也擾而毅者馴擾而果毅也直而溫者徑直而溫和也簡而廉者簡易而廉隅也剛而塞者剛健而篤實也彊而義者彊勇而好義也而轉語辭也正言而反應者所以明其德之不偏皆指其成德之自然非以彼濟此之謂也彰著也成德著之于身而又始終有常輯錄亦行有九德泛言人之行有此九德其吉士矣哉輯錄故言其人之有德則當以此論之載

采采古語不可曉當闕之若諸子善據文勢解之當云
亦言其人有德乃言曰載采采言其人之有德當以事
實言之古注謂必言其所行某事某事以為驗是也人
傑九德分得細密問祖九德凡十八種是好底氣質每
兩件一家關合將來人傑舜論直溫寬栗及臯陶九德
皆是反氣質之性者簡而廉廉者隅也簡者泥而不分
明也論語集註廉謂稜角峭厲
與此簡者泥而不分明相發

纂註

蘇氏曰亦行有九德者以此自修也

亦言其人有德者以此求人也論其人則曰斯人也
某德論其德則曰是德也有某事某事載采采者歷言
之也唐孔氏曰恭在貌敬在心愿者運鈍外失於儀
故言恭治者輕物內失于心故稱敬剛彊相近剛是性
彊是志蘇氏曰橫流而濟曰亂故才過人可以濟火
難者曰亂亂臣十人是也才過人者患于恃才而不敬
真氏曰先儒以九德為人之性蓋指胤稟而言若天
命之謂性則渾然全體無所偏也新安陳氏曰臯謂

能以此九德觀人則德之成不成全不全皆可知而知
人之道盡矣孔氏曰吉善也明九德之常以擇人而
官之則政之善一說吉福也用有常則為天下國家
之福劉氏一止曰常之為義大矣曰常人曰吉士其
揆一也皋陶謨曰彰厥有常吉哉立政曰庶常吉士
則知吉士未始不有常德而常德所以為吉士也日

宣三德夙夜浚明有家日嚴祇敬六德亮采有邦翕受
敷施九德咸事俊人在官百僚師師百工惟時撫于五辰

庶績其凝

宣明也三德六德者九德之中有其三有其
六也浚治也亮亦明也有家大夫也有邦諸

侯也浚明亮采皆言家邦政事明治之義氣象則有小
大之不同三德而為大夫六德而為諸侯以德之少寡
職之大小繫言之也夫九德有其三必日宣而充廣之而使之
益以著九德有其六尤必日嚴而祇敬之而使之益以

謹也。俞合也。德之多寡雖不同。人君惟能合而受之。布而用之。如此。則九德之人咸事。其事大而千人之俊小。而百人之人皆在官史。以天下之才任天下之治。唐虞之朝。下無遺才。而上無廢事。良以此也。師師相師。法也。言百僚皆相師。法而百工皆及時以趨事也。百僚百工皆謂百官言其人之相師。則曰百僚言其人之趨事。則曰百工其實一也。撫順也。五辰四時也。木火金水旺於四時。而土則寄旺於四季也。禮運曰。播五行於四時者。是也。凝成也。言百工。輯錄。此問曰。宣三德至九德咸事。如趨時而衆功皆成也。輯錄。此則是天子諸侯大夫九德。各日以三宣德。亦不可。借邦若諸侯大夫皆有九德。顧不美歟。先生曰。九德之目。蓋言取人不可求備。官人常以等耳。豈德不可。借之謂邪。答何叔京問。夙夜浚明。至有邦古注。以為可以為卿大夫及諸侯。林氏謂卿大夫諸侯用此三德六德之人。未知孰是。先生曰。林說恐得之猶孝經說。爭臣之類。蓋曰。如是足矣。非必以是為限。

欽定四庫全書

卷一

也答諸纂註

葉氏曰畢既論知人之事故因言官人之道夏氏曰浚與濬通治而深之謂

林氏曰嚴祇敬敬事之心有加無已也諸便與六德者共事卿大夫則宣達三德而已百工之事各得其時孔氏解惟時太迂馬氏曰張有常乃吉日宣日嚴所謂有常也王氏曰日宣達三德之賢使任有家日嚴祇敬六德之賢使任有邦真氏取之皆作君用賢說無與下文翕受敷施九德之賢相協新安陳氏曰日宣日

嚴作賢者自修之事一說也作人君用人之事又一說也前說出于古注蔡氏用之後說諸家少言之文公又主之後說較優又曰有全德者必有全才俊乂即九德之全才也朝廷視家邦為尤大故受而用之胡氏旦曰五行在地為物在天為時順其時而撫之則五物皆成其材而為人用矣故仲春斬陽木仲夏斬陰木所以撫木辰也季春出火季秋納火所以撫火辰也司空以時相版隲所以撫土辰也秋為徒任春達溝渠所以撫

水辰也又曰春盛德在木布德施惠所以順木辰夏盛德在火勞民勸農所以順火辰秋盛德在金冬盛德在水禁暴誅慢謹蓋藏斂穰聚所以順金水之辰土寄旺四時四辰順土在其中矣 王氏曰五辰分配四時春則寅卯為木之辰夏則巳午為火之辰餘放此 無教逸欲有邦兢兢業業一日

二日萬幾無曠庶官天工人其代之

無與母通禁止之辭教非必教令謂

上行而下效也言天子當以勤儉率諸侯不可以逸欲導之也兢兢戒謹也業業危懼也幾微也易曰惟幾也故能成天下之務蓋禍患之幾藏于細微而非常人之所豫見及其著也則雖智者不能善其後故聖人於幾則兢兢以圖之所謂圖難于其易為大子其細者此也一日二日者言其日之至淺萬幾者言其幾事之至多也蓋一日二日之間事幾之來且至萬焉足可一日而縱欲乎曠廢也言不可用非才而使庶官曠廢厥職也

天工天之工也人君代天理物庶官所治無非天事苟一職之或曠則天工廢矣可不深戒哉 車金幾

理雖已萌事則未著 纂註 孔氏曰不為逸豫貪欲之教微而幽也 通書解 是有國者之常當戒懼萬事

之微位非其人為宜官不可以天官私非其才 陳氏又猷曰功成之後逸欲易生逸豫怠遊宴之類欲聲色

嗜好之類逸欲生治功墮矣惟戒逸欲而存兢業則此心清明剛健事之幾微無不同燭逸欲少肆兢業少間

則此心昏惰何以察微妙而圖之又曰天子能以一心察天下之幾不能以一身兼天下之務任之庶官而已

不可使曠非無其人之為曠非其人以為曠也君雖兢業官或曠廢亦危亂之道終以無曠庶官欲后臣同克

艱以保治也天下之事無一不出于天天不自為人代為之一官曠則一事闕矣天工人代一句結上文以生

下文之意 周子曰動而未形有無之間者幾也又曰幾微故幽 前漢王嘉傳引此作無故逸欲有闕天

叙有典勅我五典五惇哉天秩有禮自我五禮有庸哉
同寅協恭和衷哉天命有德五服五章哉天討有罪五

刑五用哉政事懋哉懋哉

叙者君臣父子兄弟夫婦朋友之倫叙也秩者尊卑貴賤

等級隆殺之品秩也勅正惇厚庸常也有庸馬本作五庸衷降衷之衷即所謂典禮也典禮雖天所叙秩然正之使叙倫而益厚用之使品秩而有常則在我而已故君臣當同其寅畏協其恭敬誠一無間融會流通而民矣物則各得其正所謂和衷也章顯也五服五等之服自九章以至一章是也言天命有德之人則五等之服以彰顯之天討有罪之人則五等之刑以懲戒之蓋爵賞刑罰乃人君之政事君主之臣用之當勉勉而不可怠者也楊氏曰典禮自天子出故言勅我自我若夫爵人於朝與衆共之刑人於市與衆棄之天子不得而私

馬此其立

輯錄

因其生而第之以其所當處者謂之叙
言其異也

天叙便是自然底故君便教他居君之位臣便教他居臣之位父便教他居父之位子便教他居子之位天秩便是那天叙裏面物事如天子祭天地諸侯祭山川大夫祭五祀庶人祭具先天子八諸侯六大夫四士二皆是有這箇叙便是他這箇自然之秩義則許多典禮都是天叙天秩下了聖人只是因而勅正之因而用出去而已此其所謂冠昏喪祭之禮與夫典章制度文物禮樂車與衣服無一件是聖人自啟底都是天敘下了聖人只是依傍他天理行將去如推箇車子本自轉將去我這裏只是略扶助之而已同寅協恭是君臣上下一於敬德之大者則賞以服之大者德之小者則賞以服之小者罪之大者則罪以大底刑罪之小者則罪以小底刑盡是天命天討聖人未嘗加一毫私意于其間只是奉行天法而已綱要五禮有庸五典五惇須是同

寅協恭和衷要五服五章五刑五用頌是纂纂註節初齊
政事懋哉懋哉義剛袁宇語錄詳見湯語纂纂註氏曰人
而無禮則諸侯得以請隧卿得以反站大夫得以雍徹
娼優下賤得以后歸而人道亂矣故聖人為禮以節之
殿陽公所謂順其情而節文之使知尊卑長幼凡人之
大倫也此其高下之宜豐殺之別貴賤偏全之等所以
萌于人心習熟于人之耳目而終其身不敢肆其情欲
於度數之外也此三代帝王防範人心之先務隄防世
變之大端也陳氏大猷曰人受天地之中以生能者
善之以福不能者貶以取禍故全是衷者為德是不失
天之所賦也故天命之君必體福善之天制五等之服
以章其德戾是衷者為罪是失天之所賦也故天討之
若必體禍淫之天用五等之刑以威其罪爵賞刑罰乃
政事之大者當勉勉而不可怠也與禮教化也所以盡
感發之妙服刑政事也所以盡勸懲之方皆承天以施
事而寅恭懋勉又四者之本也非寅恭懋勉則典禮服

刑將失其當焉能與天無間哉至是則君師之道代天
理民之責盡矣此盡發上文天工人代之意 呂氏曰
寅恭惇典庸禮之根源也君臣聚精會神與天無間則
所惇所庸皆天之典禮否則為虛文矣賞罰當純乎天
此心當懋勉不已一有怠息賞罰我之賞罰非天之賞
罰矣 蔡氏元庵曰周官司服公服衮冕而下九章之
服如王之服侯伯服鷩冕而下七章之服如公之服子
男服毳冕而下五章之服如侯伯之服孤服絺冕而下
三章之服如子男之服卿大夫服玄冕而下一章之服
如孤之服士服皮弁無章數也孔氏以天子言之非也
馬氏曰周天子與上公皆服九章然公有降龍無升
龍別于天子 新安陳氏曰蔡傳政事懋懋處亦云君
主之臣用之諸家所忽最有照應蓋自無曠庶官已引
上臣與君各盡其責政同寅協恭政事懋懋皆當合君
臣說有庸當作五庸五禮 天聰明自我民聰明天明畏
當主吉凶軍實嘉者為是

自我民明畏達于上下敬哉有土

威古文作畏二字通用明者顯其善畏者

威其惡天之聰明非有視聽也因民之視聽以為聰明天之明畏非有好惡也因民之好惡以為明畏上下通天下民也敬心無所慢也有土有民社也言天人一理通達無間民心所存即天理之所在而吾心之敬是又合天民而一之者也有天
輯錄
問聰明畏不知明畏下者可知所以敬之哉
是以為聰明言視聽明畏言好惡未知如何先生曰林氏似是明畏言天之所明所畏所明如明明揚側陋之明上明字所畏如董之用威
纂註
新安陳氏曰此因上文威用六極之意
而申言天人合一之理
林氏曰天明畏馬本作天明威自我民明威古文作自我民明畏威不必分也
唐孔氏曰天無心以民心為心即泰誓所謂天視自我視天聽自我民聽
陳氏解曰有上之君惟敬則不

忽乎民是乃不忽乎天不敬則徒知天之當嚴而以民為易虐是天民有二理也此畢安民之謨必推極於此歟王氏炎曰以君臨民敬心不存則所以安民者必未盡也自天子以至諸侯卿大夫有四封有采地者皆為有土之君有土必有民皆當以敬臨之真氏曰武王胡氏嘗舉皋陶謨天叙至有土章曰皋陶之學極醇粹皋陶曰朕言惠可底行禹曰俞乃言底可績皋陶曰予未

有知思曰贊贊襄哉

思曰之曰當作日襄成也皋陶謂我所言順于理可致之於行焉然其言

以為致之於行信可有功皋陶謙辭我未有所知纂註言不敢計功也惟思日贊助于帝以成其治而已纂註

林氏曰思曰孔氏作曰張橫渠王介甫蘇東坡作曰考之于經曰日多相亂洛誥今王即命曰釋之音作日呂

刑由慰日勤釋文音作曰張氏曰贊贊所助非一事也陳氏大猷曰贊而又贊贊之不已也林氏曰左

定十五年菲定公而不克襄事注襄成也王訓襄為成
本此孔訓為上不及事愚謂畢陶發明知人之謨尤覺
詳于安民之謨者蓋二者雖均為難事而知人為尤難
必明于知人則安民有不難者矣然於言知人之餘則
戒逸欲崇兢業惟恐人君不知戒懼而至於曠官廢事
于安民之中則懋敬事敬有土惟恐人君不知懋敬而
至于喪天玩民益以人君一
心又知人安民之根柢歟

益稷

今文古文皆有但今文合于畢陶謨帝曰
來禹汝亦昌言正與上篇末文勢接續古

者簡冊

以竹為之而所編之簡不可以多故

釐而二之非有意于其間也以下文禹稱益稷

二人佐其成

輯

錄義剛問益稷篇禹與畢陶只

功因以名篇輯錄管自叙其功是如何先生曰

不知怎生也卽變前而且做是脫簡後而却又

有一段卽禹前西時只是說他無可言但于思

日孜孜畢陶問他如何他便說他要德的孜孜却不知後面一段是怎生地良久云他上面也是說卽丹未後故恁地說丹未緣如此故不得為天子我如此勤苦故有功以此相成教莫如丹未而如我便足古人直不似今人便要瞻前顧後

帝曰來禹汝亦昌言禹拜曰都帝予何言予思日孜孜皋陶曰吁如何禹曰洪水滔天浩浩懷山襄陵下民昏墊予乘四載隨山刊木暨益奏庶鮮食予決九川距四海濬畎澮距川暨稷播奏庶艱食鮮食懋遷有無化居烝民乃粒萬邦作乂皋陶曰俞師汝昌言

孜孜者勉力不息之謂也

以臯陶既陳知人安民之謨因呼禹使陳其言禹拜而
歎美謂臯陶之謨至矣我更何所言惟思日勉勉以務
事功而已觀此則上爲禹臯陶答問者蓋相與言於帝
舜之前也如何者臯陶問其孜孜者何如也禹言住者
洪水泛濫上漫于天浩浩盛大包山上陵下民昏瞽熱
溺困于水災如此之甚也四載水乘舟陸乘車泥乘輻
輳山乘櫟也輻輳史記作輻輳漢書作輻輳以板爲之其狀如箕
輳行泥上櫟史記作橋漢書作橋以鐵爲之其形似錐
長半寸施之履下以上山不蹉跌也蓋禹治水之時乘
此四載以跋履山川踐行險阻者隨循刊除也左傳云
井陘未刊刊除木之義也蓋水涌不洩泛濫滿漫地之
平者無非水也其可見者山耳故必循山伐木通蔽障開道
路而後水工可興也奏進也血食曰鮮水土未平民未
粒食與益進衆鳥獸魚鼈之肉于民使食以充飽也九
川九州之川也距至濬深也周禮一畝之間廣尺深尺
曰畝一同之間廣二尋深二仞曰澮畝澮之間有遂有

溝有洫皆通田間水道以小注大言畝澮而不及遂溝
洫者舉小大以包其餘也先決九川之水使各通于海次
潘畝澮之水使各通于川也播布也謂布種五穀也艱
難也水平播種之初民尚艱食也懋勉也懋勉其民使
有子無交易變化其所居積之貨也然衆也求食曰粒
益水患悲平民得播種之利而山林川澤之貨又有無
相通以濟匱乏然後庶民粒食萬邦興起治功也禹因
攷攷之義述其治水本末先後之詳而敬戒之意實存
於其間蓋欲君臣上下相與勉力不怠以保其治
於無窮而已師法也臯陶以其言為可師法也纂註
新安陳氏曰舜禹好善之心皆無窮當時昌言滿前舜
猶渴聞不倦方使禹亦如臯之昌言此舜好善無窮之
心也禹聞此言歎美此心謂臯言已至我復何言讓善
於人也思曰攷攷力行不息勉為善於已也此禹好善
無窮之心也孟子曰禹聞善言則拜大舜有大馬舜禹
之所以聖其亦以此與蘇氏曰禹曰子何言亦猶臯

之子未有知也曰予思日孜孜亦猶臯之思日贊贊襄
哉也皆相因之辭伏生以益稷合于臯陶謨有以也

陳氏大猷曰勤者萬事所由成不勤萬事所由廢臯問
禹所以思日孜孜者如何禹但述其治水之勤勞以答
之而不及其他益以平生受用惟在孜孜勤勞而已意
在言外也王氏曰大水決而有所歸小水滫而有所
入治水之次第也不決川則雖濬畎澮不能除水患也
林氏曰糧食謂稼穡之事艱難而後成陳氏曰益

稷非人人而飲食之亦孜孜之有方耳呂氏曰禹用功
如此艱難然後民乃粒食須看乃字蔡氏元度曰水

平之後天下知禹之功而已禹以益稷與有功焉故言
益益暨稷是禹不自有其功而與益稷同之不矜不伐

乃在於此呂氏曰禹不矜不伐今乃歷舉其功若矜
伐何也益艱難之念易忘乎成之功難保今雖平成昔

日之心不可忘也所思日孜孜者正在此雖不陳謨乃
陳謨之大者使自言其功而非有深意何以謂之昌言

哉 玉篇摘丑倫 反標力追反 橈丘喬反 亦作轎 又子
純反 揭居錄反 惡謂禹為司空 稷為田正 益為虞土

田山澤鳥獸魚鼈其所掌也 是三人者均主水土治水
之役所當偕行隨時施宜因利乘便以救斯民于墊溺
窮饑之中故所至之處烈山澤之餘有可採捕以供食
者益致其利有可播種漁取以得食者稷授其方奏進
也 益專言之稷言播奏于艱食言播于鮮食言奏也既
而有無相通貨食兼足始也不足終乃有餘禹不忘益
稷相從于艱苦之中而述其功如 禹曰都帝慎乃在位
此微禹之言後世孰從而知之

帝曰俞禹曰安汝止惟幾惟康其弼直惟動丕應後志

以昭受上帝天其申命用休

禹既嘆美又特稱帝以告
之所以起其聽也慎乃在

位者謹其在天子之位也天位維艱一念不謹或以貽
四海之憂一日不謹或以致千百年之患帝深然之而

禹又推其所以謹在位之意如下文所云也止者心之所止也人心之靈事事物物莫不各有至善之所而不可遷者人惟私欲之念動搖其中始有昧于理而不得其所止者安之云者順適乎道心之止而不陷于人欲之危動靜云為各得其當而無有止而不得其止者惟幾所以審其事之發惟康所以省其事之安即下文庶幾康哉之義至于左右輔弼之臣又皆盡其繩愆糾繆之職內外交修無有不至若是則是惟無作則天下無不丕應固有先意而俟我者以是輯錄止守也惟幾昭受于天天豈不重命而用休美乎

輯錄 止守也惟幾幾惟康當求箇安穩處弼直以直道輔之應之非惟人應之天亦應之元德問惟幾惟康其弼直呂東萊解幾作動康作靜如何先生曰理會不得

纂註 葉氏曰慎乃伯恭解經多巧良久云恐難如此說

命禹所謂慎乃有位君臣更相告戒也禹之言即帝所與言真氏曰人之一心靜而後能動定而

後能應若其膠膠擾擾將為物役之不暇又何以宰萬物乎先儒謂心者人之北辰辰惟居其所故能為二十八宿之綱維心惟安所正故能為萬事之樞紐夏氏曰安汝止而下皆謹在位之事又曰動則大應天下後望之志後望于君欲其治安帝曰吁臣哉鄰哉鄰哉臣我爾丕應後志猶丕從厥志

哉禹曰俞

鄰左右輔弼也臣以人言鄰以職言帝深感上文弼直之語故曰吁臣哉鄰哉鄰哉臣哉

反復詠歎以見弼直之義如此其纂註

孔氏曰鄰近也陳氏曰曰臣

重而不可忽禹即俞而然之也
當親近我而助我故曰臣哉鄰哉親我助我乃盡為臣之道故曰鄰哉臣哉張氏綱曰臣以分言鄰以情言一于分則離一手情則繫鄰氏補之曰臣謹其分也鄰忘其分也臣而復鄰嚴不至於背鄰而又臣和不至于流新安陳氏曰一說耶親君如居有鄰也臣當如鄰以親君能如鄰以親君乃臣也臣鄰皆指禹言帝

曰臣作朕股肱耳目予欲左右有民汝翼予欲宣力四方汝為予欲觀古人之象日月星辰山龍華蟲作會宗彝藻火粉米黼黻絺繡以五采彰施于五色作服汝明予欲聞六律五聲八音在治忽以出納五言汝聽

此言臣所

以為鄰之義也君元首也君資臣以為助猶元首須股肱耳目以為用也下文翼為明聽即作股肱耳目之義左右者輔翼也猶孟子所謂輔之翼之使自得之也宣力者宣布其力也言我欲左右有民則資汝以為助故宣力四方則資汝以有為也象像也日月以下物象是也易曰黃帝堯舜垂衣裳而天下治蓋取諸乾坤則上祿下裳之制創自黃帝而成于堯舜也日月星辰取其照臨也山取其鎮也龍取其變也華蟲雉取其文也會

繪也宗彙虎雖取其孝也藻水草取其潔也火取其明也粉米白米取其養也黼若斧形取其斷也黻為兩已相背取其辨也師鄭氏讀為蕭然也統以為繡也日也月也星辰也山也龍也華蟲也六者繪之于衣宗彙也藻也火也粉米也黼也黻也六者繡之于裳所謂十二章也衣之六章其序自上而下裳之六章其序自下而上采者青黃赤白黑也色者言施之于繒帛也繪于衣繡于裳皆雜施五米以為五色也女明者女當明其小大尊卑之差等也又案周制以日月星辰畫于旂服九章登龍于不登大乎宗彙以龍山華蟲火宗彙五者繪于衣以藻粉黼黻四者繡于裳彙是九章以龍為首驚是七章以華蟲為首是五章以虎雉為首是亦增損有虞之制而為之耳六律陽律也不言六呂者陽統陰也有律而後有聲有聲而後八音得以依據故六律五聲八音言之叙如此也在察也其治之反也審音之道與政通故審音以知樂審樂以知政而治之得失可

知也五言者詩歌之協于五聲者也自上連下謂之出自下連上謂之納汝聽者言汝當審樂而察政治之得失者

輯錄

義剛問點尚書作會作一句先生曰公點得是前人點作會宗彙不是元德問予欲聞六

律五聲八音在治忽以出納五言汝聽先生云亦不可曉漢書在治忽作七始詠七始如七均之類又問五言東萊釋作君臣民事物之言先生曰君臣民事物是五聲所屬如宮亂則荒其君驕宮屬君最大羽屬物最小此是論聲若商放緩便是宮聲尋常琴家最取廣陵操以某觀之其聲最不平有臣陵其君之意出納五言却恐是審樂知政之類如此作五言說亦頗通問以出納五言林氏以為宮商角徵羽之言古注以為仁義禮知信之言未知當孰從先生曰未詳當纂註新安陳氏闕自信之言未知當孰從先生曰未詳當纂註曰臣當為我之身非但為鄰以與君親近也王氏曰汝翼作朕汝為作朕汝明作目汝聽作耳也孔氏曰天子服日

月而下諸侯自龍而下至黼黻士服藻大夫加粉米上
得兼下下不得僭上作尊卑之服汝明制之唐孔氏
曰天數不過十二天子服十二章象天數也鄭氏曰
自日月至黼黻所取義皆若德也服所以象德服是服
必有是德當觀象而自省焉陳氏大猷曰五采五種
華采之物藍丹砂粉墨之類是也彰施施其采以彰明
之五色采施之為青黃赤白黑也蘇氏曰忽不治也
五言詩也以諷詠之言寄于五聲也陳氏大猷曰納
采詩而納之于上如命大師陳詩以觀民風興工以納
言是也出詩而播之樂章如關雎用之鄉人用之邦
國與時而聽之是也五德之言謂詩詠之合于五常者
吳氏曰五言不可被之弦歌者出之其可者則納之
呂氏曰五言樂之成言者如三百篇之詩是也葉
氏曰五言即五聲詩言志歌永言聲依永律和聲雖言
也播于律之所和則為五聲雖聲也本于詩之所詠則
為五言大之乎音則為出操之于下則為納呂氏曰

作服禮之大者也六律五聲八音樂之大者也治定功
成制禮作樂之時也禮樂非可以虛文舉言禮樂必在
左右宣力之後民氣和洽然後可以興禮樂固有次序
也陳氏大猷曰舜以臣鄰命禹見君臣之忘勢繼之
以作股肱耳目見君臣之忘形君臣猶一身也君猶心
臣猶體臣作朕股肱耳目君以臣為體也女翼為明聽
以遂予之所欲臣以君為心也王氏曰敬敷五教司
徒掌之豈非左右有民授掌阻飢畢治姦宄豈非宣力
四方夷作秋宗豈非制衣服變典樂豈非察音聲然彼
皆各治一官禹則總百官而治之者也帝兼舉四事而
寄以股肱耳目益如此廣韻雖余救以季二反以猴
而鼻仰尾長四五尺有歧而則懸于樹以尾塞鼻鬬諸
凡反鍼縷所紕紕持予違汝弼汝無面從退有後言欽
栗反驚并列反雉屬

中結上文弼直鄰哉之義而深責之禹者如此纂註王氏曰拂我而相之謂之

曰予違汝弼不獨合禹為股肱耳目至此舜連一身是非之責盡付之禹檢點孫氏曰聖人無違自處

而以有違求弼不居其聖也陳氏大猷曰上言予欲汝則翼為明聽謂常將順乎我也此言予違汝弼謂不

當苟順乎我也林氏曰舜大聖人豈有違待乎弼禹亦大聖人豈有而從後言而猶以為警戒所以為聖

呂氏曰舜非有未慊而畏人之後言非容受未至而致人之後言禹又非肯欺君而為面是背非省聖人畏敬無

已惟恐過之不聞言之不盡故其求之之切如此孔氏曰四鄰四近前後左右之臣勅使敬其職唐孔氏

曰鄭元以四鄰為四近之臣左輔右弼前疑後丞惟伏生書傳有此言文王世子有師保疑丞此外經傳無此

官惟周命云實賴左右前後有位之士新安胡氏曰既責禹以弼違又欲其欽四鄰謂所與同列之近臣當

敬之使同心而弼我也陳氏大猷曰四鄰諸臣各有其職而奔悉以責焉者禹百揆無所不統也於此可觀
君道亦可以觀相道矣王氏亮曰無面從于上不諂
欽四鄰于下不瀆新安陳氏曰一說欽四鄰即中庸
敬大臣之義又曰傳語欠明當云不可不敬爾為四鄰
近臣之職也又案欽四鄰上下疑有闕文朱子嘗疑之
今於此等處姑據衆說雖略可通然庶頑讒說若不
繹之與上下文意皆不貫闕之可也

在時侯以明之捷以記之書用識哉欲並生哉工以納

言時而賜之格則承之庸之否則威之

此因上文而慮庶頑讒說之不

患不直也讒說即舜所聖者時是也在是指忠直為言
侯射侯也明者欲明其果頑愚讒說與否也益射所以
觀德頑愚讒說之人其心不正則形乎四體而動靜
其容體必不能比于禮其節奏必不能比于樂其中必不

欽定四庫全書

卷一

能多審如是則其為頑惡說也必矣周禮王大夫佐廉侯皆
供虎侯熊侯豹侯諸侯供熊侯豹侯卿大夫佐廉侯皆
設其鹄又梓人為侯廣與宗方三分其廣而鹄居一焉
應古制亦不相遠也捷扑也即扑作殺刑者蓋懲之使
記而不忘也識誌也錄其過惡以識于用如周制卿黨
之官以時書民之孝弟睦姻有學者也聖人不恣以惡
頑讒說而遽棄之用此三者之教啟其情發其性使之
遷善改過欲其並生于天地之間也工掌樂之官也格
有恥且格之格謂改過也承薦也聖人于庶頑讒說之
人既有以啟發其情性遷善之心而又命掌樂之官以
其所納之言時而賜之以觀其改過與否如其改也則
進之用之如其不改然後刑以威之以見聖人之教無
所不極其至此即龍之所典而此命伯禹總之也輯錄
棄人也如此此即龍之所典而此命伯禹總之也輯錄
元德問工以納言正否則威之一段上文說欽四鄰庶
頑讒說止欲並生哉皆不可曉如命龍之辭亦曰朕聖

護說殄行止惟允皆言護說此須是當時有此制度今不能知又不當杜撰胡說只得置之元德謂侯以明之捷以記之乃是賞罰先生云既是賞罰當別有施設如何只靠射豈有無狀之人繞得中便為好人乎

纂

註

孔氏曰不在時所行不在于是而為非者當察之樂官誦詩以納諫當是正其義而聽之呂氏曰槌記

書識非絕之也存其過所以存其恥則善心生矣或曰書用識其善惡書其孝悌睦姻有學者書其善也

如左氏雙豹欲焚丹書書其惡也呂氏曰詩可見人真情春秋會盟賦詩一有不類便能知之葉氏曰鄭

伯季趙孟七子從趙孟使賦詩以觀其志子展賦草蟲伯有賦鵲之奔奔叔向知伯有將為戮子展後亡亦猶

是也葵初王氏曰案易氏王大射解云大射祭祀之射也王將有郊廟之事以射擇諸侯及羣臣與邦國所

貢之士取其中多而可以與祭者于是有三侯二侯一侯焉天子射虎侯其道九十弓六尺為弓弓二寸為侯

中則虎侯之中廣一丈八尺三分其廣以其一為之鵠則鵠方六尺侯之上中下皆用布而兩旁飾以虎其中設鵠為的馬諸侯射熊侯七十弓卿大夫射麋侯五十弓其鵠賦其弓之數而降殺之凡侯天子以三諸侯以二卿大夫以一人材人為侯曰張皮侯而棲鵠則存以功皮侯即熊虎豹之三侯天子大射之侯也張五采之侯則連國屬五采即五正之侯天子賓射之侯也張獸侯則王以息燕此又天子燕射之侯也其侯雖不見於經而卿射記言天子熊侯曰賓諸侯康侯亦賓大夫布侯畫以虎豹士布侯畫以鹿豕即獸侯爾燕大射以鵠賓射以正燕射以賓不可以不辨鄭氏周禮注云燕高也方猶等也高廣等謂侯中也畫布曰正棲成曰鵠凡氏詩疏正鵠皆鳥名難禹曰俞哉帝光天之下至於海

隅蒼生萬邦黎獻共惟帝臣惟帝時舉數納以言明庶

以功車服以庸誰敢不讓敢不敬應帝不時敷同日奏

罔功

俞哉者蘇氏曰與春秋傳公曰諾哉意同口然而心不然之辭也隅角也蒼生者蒼蒼然而生視遠之

義也獻賢也黎獻者黎民之賢者也其同時是也敷納者下陳而上納也明庶者明其衆庶也禹雖俞帝之言而有未盡然之意謂庶頑譏說加之以威不若明之以德使帝德光輝達於天下海隅蒼生之地莫不昭灼德之遠著如此則萬邦黎民之賢孰不感慕興起而皆有帝臣之願惟帝時舉而用之爾敷納以言而觀其蘊明庶以功而考其成旌能命德以厚其報如此則敢不讓子善敢不精白一心敬應其上而庶頑譏說豈足慮乎帝不如是則今任用之臣遠近敷同率為誕慢日進於無功矣豈特庶頑譏說為可慮哉輯錄以功恐庶字誤纂註林氏曰禹不盡然帝之言又廣帝之是試字廣纂註意謂輔弼之責雖在臣鄰然當廣延

萬邦之賢無以為止此而已孫氏曰敷同猶普同新
安陳氏曰舜典所言以待諸侯此以待黎獻諸侯親天

子故直言奏自下而奏上也舜方求賢故特言納下陳
而上納也左傳作賦納以言王氏十朋曰諸侯以

黜陟為重故言試黎獻以多得為盛故言庶或曰明
示衆庶以功使衆人皆見賢者之功也陳氏大猷曰

納言或以言揚明功或以事舉也無若丹朱傲惟慢遊是好傲虐是作

罔晝夜頡頏罔水行舟勿淫于家用殄厥世予創若時

娶于塗山辛壬癸甲啓呱呱而泣予弗子惟荒度土功

弼成五服至于五千州十有二師外薄四海咸建五長

各迪有功苗頑弗即工帝其念哉帝曰迪朕德時乃功

惟叙臯陶方祗厥叙方施象刑惟明

漢志堯處于朱於丹淵為諸侯丹朱

之國名也顧頤不休息之狀周水行舟如界蓋舟之類
朋誼者朋比小人而淫亂于家也殄絕也世者世堯之
天下也丹朱不肖堯以天下與舜而不與朱故曰殄世
程子曰夫聖莫聖於舜而禹之戒舜至曰無若丹朱好
慢遊作傲虐且舜之不為慢遊傲虐雖愚者亦當知之
豈以禹而不知乎蓋處崇高之位所以儆戒者當如是
也創懲也禹自言懲丹朱之惡而不敢以慢遊也塗山
國名在今壽春縣東北禹娶塗山氏之女也辛壬癸甲
四日也禹娶塗山甫及四日即往治水也啓禹之子呱
呱泣聲荒大也言娶妾生子皆有所不暇顧念惟以大
相度平治水土之功為急也孟子言禹八年于外三過
其門而不入是也五服甸侯綏要荒也言非特平治水
土又因地域之遠近以輔成五服之制也疆理宇內乃
人君之事非人臣之所當專者故曰弼成也五十者每

服五百里五服之地東西南北相距五千里也十二師者每州立十二諸侯以為之師使之相牧以糾羣后也薄迫也九州之外迫于四海每方各建五人以為之長而統率之也聖人經理之制其詳內略外者如此即就也謂十二師五長內而侯牧外而蕃矣皆蹈行有功惟三苗頑慢不率不肯就工帝當憂念之也帝言四海之內蹈行我之德教者是汝功惟叙之故其頑而弗率者則皋陶方敬承汝之功叙方施象刑惟明矣曰明者言其刑罰當罪可以畏服乎人也上文禹之意欲舜知其鞭扑之威益廣其文教之及而帝以禹之功叙既已如此而猶有頑不即工如苗民者是豈刑法之所可廢哉或者乃謂苗之凶頑六師征之猶且逆命豈皋陶象刑之所能敷是未知聖人兵刑之叙與帝舜治苗之本末也帝之此言乃在禹未攝位之前非徂征後事蓋滅以象刑而苗猶不服然後命禹征之征之不服以誑之諫而又增修德教及其來格然後分背之舜之此言雖

在三謾之末而實則輯錄問禹稷三過其門而不入若禹未攝位之前也

然事亦須量箇緩急若只是卽九年泛泛底水未便會傾國覆都過家見父母亦不妨若洪水之患甚急有傾國溺都君父危亡之災也只得奔君父之急雖不過家見父母亦不妨也開苗頑弗卽工此是禹治水時調役他國人夫不動也後方征之既格而服則治其前日之罪而竄之竄之而後分北之今說者謂苗既格而又叛恐無此事又曰三苗想只是如今之溪洞相似溪洞有數種一種謂之猫未必非三苗之後史中說三苗之國左洞庭右彭蠡在今湖北江西之界其地亦甚闊矣唐先生慶元丙辰著九江彭蠡說以示諸生書其後曰頃在湖南見說溪洞蠻獠略有四種曰花曰玗曰獠而其最輕捷者曰猫近年數出剽掠為邊患者多此種也其三苗之遺民乎古字少而通用然則所謂三苗者亦當正作猫字耳近日又見唐元善說苗民之國三徙其都初

在今之筠州次在今之興國軍皆在深山中人不可入而已亦難出其最後在今之武昌縣則據江山之險可以無所不為人不得而過之

纂註

新安陳氏曰丹朱之

矣未及問所據聊併記之
而已慢遊虐淫皆自傲出罔晝夜顧頌凶人為不善惟日不足之意
東陽馬氏曰隆古君臣告戒乃如此後世諂諛忌諱者可以戒矣
真氏曰舜以大聖之資安有可戒之事而益以怠荒戒
畢以逸欲戒禹人以傲虐戒
豈憂其有是而豫防之邪抑知其無是而姑為是言邪人心惟危自昔所畏雖聖主不敢怠操存之功大臣事聖主不敢廢規箴之益後之君臣宜視以為法
新安陳氏曰州十有二師有三說孔云治水一州用三萬人益以二千五百人師此說非呂云每州各立一師十二州立十二師如十二牧養民故曰牧為一州師師政曰師唐孔云薄逼近也從京師外近四海謂九州之外也王制五國以為屬屬有長即五長也
咸池內外皆建也

九州之內有師有長九州之外無師有長詳內略外之制也此說優于蔡蔡每方各建五人以為之長乃用林說似欠的當又曰此章禹欲帝無恃刑威之用而益廣明德之及以丹朱為帝戒復以己之懲戒丹朱者繼之末言天下皆順而苗民獨頑若以為不止于庶頑之頑者欲帝念之也夏氏曰洪水未平九功未叙人殺死不服何暇迪德舜謂今天下所以迪行我德而各迪有功者實汝之九功惟叙故也皋方敬承汝功之叙又慮迪德者怠方施象刑明示人以儆之則已迪德者益勉未迪德者益懼而勉矣此正如九功惟叙之後董之用威不容已也惡謂禹戒舜以無若丹朱無怪其然也他山之石可以攻玉舜禹初不自知其聖則其引以進戒豈為過哉當時衆民於變此屋可封而內則有丹朱之可戒外則有苗頑之可憂未能忘情惟此二者比聖所以益

變曰憂擊鳴球搏拊琴瑟以詠祖考來格虞賓

在位羣后德讓下管鼗鼓合止祝敔笙鏞以間鳥獸踰

蹌蕭韶九成鳳凰來儀

屢擊考擊也鳴球玉磬名也搏主附循也樂之始作升歌于堂

上則堂上之樂惟取其聲之輕清者與人聲相比故曰以詠蓋屢擊鳴球搏拊琴瑟以合詠歌之聲也格神之格思之格廣賓丹朱也虎之後為賓于虞猶微子作賓于周也丹朱在位與助祭羣后以德相讓則人無不和可知矣下堂下之樂也管猶周禮所謂陰竹之管孤竹之管殊竹之管也鼗鼓如鼓而小有柄持而搖之則旁耳自擊祝敔郭璞云祝如漆桶方二尺四寸深一尺八寸中有椎柄連底撞之令左右擊鼓狀如伏虎背上有一十七組鉤刻以燕鰲之類長一尺以木為之始作也擊祝以合之及其將終也則鰲鼓以止之蓋節樂之器也笙以匏為之列管于匏中又施簧于管端鏞大鍾也京氏曰鐘與笙相應者曰笙鐘與歌相應者曰頌鐘頌或

謂之鏞詩賁鼓維鏞是也大射禮樂人宿懸于阼階東笙磬西而其南笙鐘西階之西頌磬東而其南頌鐘頌鐘即鏞鐘也上言以詠此言以間相對而言蓋與詠歌迭奏也卿飲酒禮云歌鹿鳴笙南陔間歌魚麗笙由庚或其遺制也蹌蹌行動之貌言樂音不獨感神人至于鳥獸無知亦且相率而舞蹌蹌然也蕭古文作箭舞者所執之物說文云樂名蕭韶季札觀周樂見舞韶箭者則箭韶蓋舜樂之總名也今文作蕭故先儒誤以蕭管釋之九成者樂之九成也功以九叙故樂以九成九成猶周禮所謂九變也孔子曰樂者象成者也故曰成鳳凰羽族之靈者其雄為鳳其雌為凰來儀者來舞而有容儀也戩擊鳴球搏拊琴瑟以詠堂上之樂也下管鼗鼓合止祝敔笙鏞以間堂下之樂也唐孔氏曰樂之作也依上下而述奏間合而後曲成祖考尊神故言於堂上之樂為獸傲物故言於堂下之樂九成致鳳尊異靈瑞故別言之非堂上之樂獨致神格堂下之樂偏能舞

獸也或曰笙之形如鳥翼鏞之虞為獸形故於笙鏞以
間言鳥獸蹠蹠風俗通曰舜作簫笙以象鳳凰因其形
聲之似以狀其聲樂之和豈真有鳥獸鳳凰而蹠蹠來
儀者乎曰是未知聲樂感通之妙也匏巴鼓瑟而游魚
出聽伯牙鼓琴而六馬仰秣聲之致祥召物見于傳者
多矣况舜之德致和于上變之樂召和于下其格神人
舜獸鳳豈足疑哉今案李札觀周樂見舜韶簡者曰德
至矣盡矣如天之無不覆如地之無不載雖甚盛德茂
以加矣夫韶樂之奏曲而感神則祖考來格明而感人
則羣后德讓微而感物則鳳儀獸舞原其所以能感化
如此者皆由舜之德如天地之無不覆幬也其樂之傳
歷千餘載孔子聞之于齊尚且三月不知肉味也曰不
圖為樂之至于斯則當時感召從可知矣又案北章變
言作樂之效其文自為一段不與上下文勢相屬蓋舜
之在位五十餘年其興禹皋陶夔益相與答問者多矣
史官取其尤彰明者以詔後世則是其所言者自有尤

後史官集而記之非其一日之言也諸儒之說自畢陶謨至此篇末皆謂文勢相屬故其說亦合不通今皆下

取纂註

唐孔氏曰功成道洽禮備樂和史述變言繼於

為之實之以棘所以節樂陳氏大猷曰憂亦擊也意

其有輕重之異球擊能鳴故稱鳴球王氏炎曰搏猶

擊也搏輕手取聲林氏曰揚子雲長楊賦云憂滴鳴

球劉良注云憂滴搏擊也以是知鳴球可以憂擊古語

云拊鳴琴吹洞簫又曰手拊五絃目視雲漢以是知琴

瑟可以搏拊唐孔氏曰以詠歌詠詩章也鄭氏曰

琴五弦瑟二十四弦管如篪而有六孔十二簧為笙

夏氏曰以間與堂上之樂閒作也林氏曰饗禮曰升

歌清廟示德也下管象舞示事也燕禮曰升歌鹿鳴下

管新宮益堂上之樂以歌為主堂下之樂以管為主其

實相合以成別而言之則有堂上堂下之異合而言之

則總名為簫韶王氏炎曰凡樂以人聲為主歌於堂

下者謂之間歌以詠堂上之登歌也以間堂下之間歌也新安陳氏曰此章變言作樂之效乃史官載之以結典謨之終蓋功成作樂帝者致治之盛也卻特牲曰歌者在上下匏竹在下賁人聲也即此統以證此章及儀禮皆無不合古文簡質下之一字別管鼓等為堂下之樂顯見鳴球琴瑟為堂上之樂矣要擊之搏拊之以詠歌詩章所謂歌者在上也管鼓箠祝敔笙鏞皆堂下之樂管竹也笙匏也皆在堂下以間此衆樂與堂上之樂更代而間作也所謂匏竹在下也奏石絲以詠歌之時則堂下之樂不作奏匏竹等衆樂之時則堂上之樂不作以今人之樂觀之亦如此耳今諸解者徒見儀禮鄉飲酒禮燕禮並有間歌魚麗之文遂引以證此章林氏書于前蔡氏述于後其辭欠明至若王氏災則首儀禮似欠子細而陳氏大猷便引儀禮分注于其下改本文尤非衆儀禮鄉飲酒禮云工入升自西階北面坐小臣授瑟工歌鹿鳴四牡皇者華卒歌主人獻工笙入堂下

北·面立樂南陵白華華泰主人獻之乃間歌魚麗笙由庚歌南有嘉魚笙崇邱歌南山有臺笙由儀鄭元注云間代也謂一歌則一吹歌歌詩也吹吹笙也南陵等六題皆有聲無辭不可歌只可案其譜以吹笙故曰笙曰樂或曰奏而不言歌七題今見詩小雅中乃元無詩辭非本有而亡之小序不悟而妄云云耳燕禮與鄉飲酒禮大概相似蓋間歌魚麗南有嘉魚南山有臺與笙由庚崇邱由儀相更替也與此之以間初不相干不過一間字同間代更替之義亦同耳王以為堂上登歌堂下間歌直引間歌魚麗之間歌以解笙鏞以間之以間謂以間即是間歌殊不知堂下安得有歌乎下侑捉對議論似可喜細考之誤乃如此學者必即儀禮朱子詩傳細觀之可也

玉篇疏之人反

變曰於予擊石拊石百獸率舞庶尹允諧

重擊曰擊輕擊曰拊石磬也有大磬有編磬有歌磬磬有小大故擊有輕重八音獨言石者蓋石音屬角

最難諧和記曰磬以立辨夫樂以合為主而石聲獨立
辨者以其難和也石聲既和則金絲竹匏土革木之聲
無不和者矣詩曰既和且平依我磬聲則知言石者總
樂之和而言之也或曰玉振之也者終隆理之事故衆
磬以終焉上言鳥獸此言百獸者考工記曰天下大獸
五脂皆膏者羸者羽者鱗者羽鱗總可謂之獸也百獸
舞則物無不和可知矣尹正也庶尹者衆百官府之長
也允諧者信皆和諧也庶尹諧則人無不和可知矣

纂註

新安陳氏曰於音鳥有禹曰於可證讀如字而連
予字者非王氏矣曰八音以石為君而詔樂以

球為首宜於此又單言石也孫氏曰前此先言鳥獸而後
賓羣后而後及鳥獸以貴賤為序也此先言鳥獸而後
及庶尹以難易為序也王氏矣曰此又自為一節辨
禹之議論既載於前變之作樂所以形容治功之成故
以其言次之於後亦非一日之言史臣此而書之爾受
工於樂者也有舜之德不可無變之樂以發人有變之

樂不可無舜之德以本之二
帝庸作歌曰勅天之命惟
者交致而天下之至和極矣

時惟幾乃歌曰股肱喜哉元首起哉百工熙哉臯陶
拜手稽首颺言曰念哉率作興事慎乃憲欽哉屢省乃
成欽哉乃賡載歌曰元首明哉股肱良哉庶事康哉又
歌曰元首叢脞哉股肱惰哉萬事墮哉帝拜曰俞往欽

哉庸川也歌詩歌也勅成勅也幾事之微也惟時者無
時而不戒勅也惟幾者無事而不戒勅也蓋天命無
常理亂安危相為倚伏今雖治定功成禮備樂和然頃
刻敬畏之不存則怠荒之所自起豪髮幾微之不察則
禍患之所自生不可不戒也此舜特欲作歌而先述其
所以歌之意也股肱臣也元首君也人臣樂于趨事赴

功則人君之治為之興起而百官之功皆廣也拜手指
首者首至手又至地也大言而疾曰颺率總率也臯陶
言人君當總率羣臣以起事功又必謹其所守之法度
蓋樂于興事者易至于紛更故深戒之屢數也興事而
數考其成則有課功覈實之效而無誣慢敗蔽之失而
言欽哉者興事考成二者皆所當深敬而不可忽者也
此臯陶將敬儆歌而先述其所以敬之意也晉靖載成
也續帝歌以成其義臯陶言若明則臣民而衆事皆安
所以勸之也衆勝煩碎也情懈怠也隨順也言若行
臣職煩瑣細碎則臣下懈怠不肅任事而萬事廢壞所
以戒之也舜作歌而責難丁臣臯陶儆歌而責難于君
君臣之相責難者如此有虞之治此所以為不可及也
與帝拜者重其禮也重其禮然其言而曰汝等往治其
職不可以不敬也林氏曰舜禹臯陶之儆歌三百篇之
禮典也學詩
蔡註陳氏大猷曰詩三百至子功而作
者當自此始然臯陶之儆帝也亦治安之極

聖人安不忘危上下交相警戒故史既載韶樂復記歌
詩歌詩亦樂之本也蕭韶九成舜之治已極於至盛惟
時惟幾舜之心方慮其至微治功雖已極聖人本無極
也新安陳氏曰歌者和樂之發也當和樂之時不忘
戒謹之意惟虞舜能之後世歌功頌美之歌安識此意
又曰歌之序意在於戒天命而謹時幾歌之所謂喜喜
於乘時圖幾也所謂起起而乘時圖幾也所謂熙則其
乘時圖幾之效驗也若臣能如此庶可戒天命而永
保之矣真氏曰范太史曰君以知人為明臣以任職
為良君知人則賢者得行其所學臣任職則不肖者不
得苟容于朝此庶事所以康也若夫君行臣職則叢脞
矣臣不任君之事則惰矣此萬事所以墮也斯言得之
然帝之歌本為勅天命而作君臣唱和乃無一語及天
者修人事所以勅天命也後之人主宜深體焉陳氏
大猷曰喜起熙帝欲振厲克廣也臯意謂无妄不可以
復往極治不可以更加故因帝振奮增廣之意而欲其

加謹慎省察之心凡作興必謹守成憲而欽哉不可輕
於有為也又必屢察已成之治而欽哉不可玩矣已為
也於是廢成其歌謂君臣惟當明良而已不必過于喜
起也庶事惟底于康安而已不必過於熙廣也乃所以
凝泰和也君有賴于臣故先股肱臣有望於君故先元
音畢意猶未已謂明非聰察之謂聰察則流於叢脞良
非較熟之謂較熟則流于惰偷君叢脞則臣惰偷萬事
墮壞矣前言庶事此言萬事甚言叢脞之害事也不過
而失于廢亦不急而失于廢真可以疑泰和而保天命
矣往欽哉君臣自此以往無不敬也典謨之書皆以欽
終之九疇之韶勅天之歌非可以二觀也虞之韶不可
得而聞帝之歌猶可得而詠韶雖亡不亡者存焉學者
宜深玩繹也

書傳輯錄纂註卷一